

Maaron Igham Mulin Yes Israela Pa Patanani Todi Kisim Bek—Eksodus

Yes Israela to tizila Isip ne izadi

¹⁻⁵ Yes Israela to yesna tamandi Yakop, ve ndizwadi ve ndinatudi tizila pa Isip ne izadi tovene: Ruben, Simeon, Levi, Yuda, Isakar, Zebulun, Benyamin, Dan, Naptali, Gat ve Aser. Yakop iza ite Israel. Papaghu toni to yesna tizila Isip, yes irau tamoot tol saangul (70). Ve natu Yosep, ye imuun ila ineep pataghaan wa. *Mbnp 46:8+*

⁶ Yosep imaat, ve tazi toman nditogha ve tamtoghon todi pida to yesna tizila Isip pa sawa tone-nen, tineep tonowe le tisob timatmaat paam.

⁷ Eemoghon yes Israela tipopoop, ve papaghu todi timasa le tinim ival kat ve taan to yes Isipa ivon padi. Tovenen tapiridi ighaze ilib padi. *Mbanj 7:17*

Kinik paghu to Isip ighur patanani pa yes Israela

⁸ Yes Israela tineep tonowe irau ndaman ndaman, ghorokinik paghu eez ivot ve igham pooz izi Isip. Kinik paghu tonowen, ye iwatag Yosep uraat toni rita maau. *Mbanj 7:18*

⁹ Tovenen isaav pa yes Isipa ighaze: “O, aghita ghiit wa? Aazne, yes Israela timasa tinim naol ve paam tapiridi ilib pait.

¹⁰ Tovenen iit irau tagham ngar pooi, ve takaal ataam eta pa tatatan tapiridi. Pa vene, tivot tinim ival kat ve tilib pait. Ve ighaze malmal eta

imundig, nene pale tila toman koiaad, ve tiparab toman ghiit ve tilib pait, ghoru tipul taan toit ve tighau tila.” *Mbanj 7:19*

¹¹ Tovenen yes Isipa tigham yes Israela tinim mbesoonja sorok padi, ve tighur nginiinja ariajadi pa tinjin di. Yes nginiinja tonowen tighur uraat patajani kat padi, lesu titatan di. Tigham di tipamundigin ndug papaghu ru, lesu tilup anijn toman mbeb pida to kinik tila tonowe. Ndug eez, iza Pitom, ve ite iza Ramses.

¹² Yes Isipa tigham samin yes Israela ve tighur uraat patajani naol padi. Lesu titatan di ve tapiridi isob. Eemoghon tiraua maau. Yes Israela tivotvot tinim naol le naol kat, ve tila tineep irau taan isob to yes Isipa. Tovenen yes Isipa timatughez padi.

¹³ Tauto tinjal matadi pa uraat pida paam to patajani le patajani kat. Lolodi isamin di rita maau. *Mbnp 15:13*

¹⁴ Tigham le yes Israela nepoonjadi isami kat. Pasa, tighurghur uraat patajani kat padi. Tigham di tigharaat brik ve tirei ruum, ve tigham uraat arianja pa uum paam. Ve sawa isob to yes Israela tighamgham uraat, yes Isipa lolodi isamin di rita maau.

¹⁵⁻¹⁶ Ghoru kinik to Isip ipoi Hibru tidi ru tinim. Eez iza Sipra, ve ite iza Pua. Yesuru uraat todi to tipapopan ndiliva to yes Hibrua. Kinik isaav padi ighaze: “Aloon. Sawa to apapopan Hibru tidi, aghita ndinatudi. Ighaze nditamoot, arab di timaat. Ve ighaze ndiliva, ghoru apul di tineep.”

¹⁷ Eemoghon ndiliva ru tonowen timatughez pa Maaron. Tovenen titaghon kinik aliija maau, ve

tipul ndipain nditamoot tineep. *Mbanj 5:29*

¹⁸Tovenen kinik ipoi yesuru timuul tinim, ve ighason di ighaze: “Pughu vena to yamru azoor alinjag, ve apulpul ndipain nditamoot to yes Hibrua tineep?”

¹⁹Yesuru tipamuul aliņa tighaze: “Wai, Hibru tidi, popaan todi, inimale Isip tidi maau. Pasa, yes ndiliva ariņadi, ve tipopoop rikia moghon. Sawa to yeru nilaghlagh sone, yes tipoop wa!”

²⁰⁻²¹Ndiliva ru tonenen timatughez pa Maaron ve titaghon ņgar toni. Tovenen ye igham poian di, le anadi tipoop ledi ndinatudi paam. Ve yes Israela tivotvot le tinim ival le ival kat. Ve tapiridi paam ivot inim tiina kat.

²²Tovenen kinik * isaav ariņa pa ival tiina to Isip ighaze: “Ndipain nditamoot to Hibru tidi tipoop di, yam apiyaav di tisob tila ya Nil. Ve ighaze ndiliva, ghoru apul di tineep.” *Mbanj 7:19*

2

Mose tina ipoopa

¹Sawa tonenen, tamoot eez ve liva eez to Israel, yesuru tivai. Pughudi ee moghon. Yesuru tivot ila to Levi.

²Liva apo, ve ipoop tamoot. Ye ighita natu poia kat. Tovenen iņgooza ineep irau kaiyo tol le inim olman ris. *Hib 11:23*

* **1:22:** Yes Isipa tiwatwaat saveņj ‘kinik’ ila taudi aliņadi tighaze ‘Paro.’ Tauto Baibol pida tiwaat kinik to Isip ‘Paro.’ ‘Paro’ nene kinik to Isip iza maau. Nene isavia uraat toni to ye kinik. Ngara katindi matadi iņgal tighaze kinik to igham samın yes Israela ne, ye iza Ramses.

³ Ghoro irau ingooza muul maau. Tovenen igham ti to tivavaii pa mbeb inimale vivib, ve ingal mbeb inimale ndimir ma bagil ila ipoon ti tonowen sambudi, lesu ya iloon ila sob. Ghoro ipagheen natu iloon ila, ve ighami ila ighuri ila vivib lolo to titub titaghon ya Nil dige.

⁴ Pain tonowen livu iyoon sagan, ve mata ilala pani ighaze ighita sa mbeb pale ivot pani.

⁵ Sawa tonenen kat, kinik to Isip natu liva toman ndiliva mbesoonja toni pida, tizila pa ya Nil, lesu kinik natu liva iririu. Tovenen ndiliva mbesoonja toni tilaghlaagh taghon ya dige, ve ye iriririu. Mata ila le ighita ti tonowen ipotpot ila vivib lolo. Tovenen imbaan liva mbesoonja toni eez ila ighami inim.

⁶ Kinik natu liva ikaak ti avo, ve ighita pain kinaanen ighengheen ve itanjan. Tovenen lolo isamini, ve isaav ighaze: “Ale, nene avaat Hibru tidi eta natu!”

⁷ Rikia moghon ve pain kinaanen livu inim peria todi, ve ighason kinik natu liva ighaze: “Vena? Irau nala nakaal liva eta to yes Hibru, ve naghama inim? Lesu ingin pain tonanan payom, ve igham payamyam pani.”

⁸ Kinik natu liva iyok pa ngar toni ighaze: “Poia kat. Ula.”

⁹ Tovenen ye ila igham pain tiina ve yesuru timuul tila to kinik natu liva. Ghoro kinik natu liva isaav pa pain kinaanen tiina ighaze: “Ugham pain tonene ula, ve ungini payou ve ugham payamyam pani. Pale nagharaat ghom.” Tovenen pain kinaanen tau tiina ighami ila, ve igham payamyam pani.

¹⁰ Pain tonowen itub le inim olman ris, ghoru tiina ighuri imuul ila to kinik natu liva, ve ighami inim natu. Kinik natu liva iwaat pain tonenen iza Mose. Pasa, mata ingal ighaze: “Pain tonene ineep ya dige, ve naghami iza.” * *Mbanj 7:21*

Mose ighau ila ineep toman yes Midiana

¹¹ Mose itub inim olman, ve sawa eez, ye ila ighaze ighita ndita Hibrua. Ila ivot todi ve ighita uraat patanjani to tighamghami. Ve ighita ngeu eez to Isip irab tonvetaz toni eez to Hibru.

¹² Mose mata ines, le ighita tamtoghon eta maau. Tovenen ila ivool to ita ite, ve irab Isip taamdi tonowen imaat. Ghoru italaaz magargaar ve izeev paatu ila ve ilalai, lesu ingooza.

¹³ Mbonj ndugizau, ve ila ighaze ingig ndita tonowen muul. Ilaghlaagh ila le ighita Hibrua ru tipaparab. Tovenen ighason ngeu to igham sosor ve ipamundigin malmal ighaze: “Wai, urab sorokin itam ite pasa?”

¹⁴ Ye ipamuul aliņa ighaze: “Yom sei ighur ghom unum tiina pa ungin ghei ve ugharaat patanjani tiei? Ma vena? Yom ughaze urab ghou namaat nanimale Isip taamdi to noor urabi imaat ne?”

Mose iloonj saveenj tonene, ve mata ingal ighaze: “Wai, ngar to you naghami, tamtoghon avaat ti-watagi wa.” Tovenen imatughez ve ighau.

¹⁵ Sawa to kinik to Isip iloonj Mose varu pa ngar to ighami, ikaala ighaze irabi imaat. Eemoghon Mose ighau ila pa yes Midiana taan todi wa. Ila

* **2:10:** Ila Hibrua aliņadi, tiwaat Mose iza ‘Moshe.’ Pisis tonene igharau pa saveenj waaro ‘masha’ to pughu ‘ighami iza.’

ivot tonowe, ve ate izi igharau ya tain eez dige.
Mbanj 7:29

¹⁶ Ndug tonowen, ngeu eez inepneep, iza Reguel. [Reguel iza ite Yetro.] Ye ighamgham uraat pa wa-toonrau to yes Midiana, ve ndinatu liva irau liim ve ru. Sawa to Mose ineep igharau ya tonowen dige, Reguel ndinatu liva tinim tighaze titib ya ve tipaghun sipsip ve mekmek todi.

¹⁷ Mala maau ve nginiinj ngaia pida tinim tivot, ve tighaze tizurun ndiliva tonowen tighau. Eemoghon Mose imundig ivool todi, ve ipaghun sipsip toman mekmek todi.

¹⁸ Ghoro ndiliva tonowen timuul tila pa tamandi Reguel. Ye ighita di, ve ighason di ighaze: “Wai, pughu vena to ngaramus ala ve rikia moghon amuul anim?”

¹⁹ Yes tipamuul aliija tighaze: “Yei nila nivot izi ya, ve nginiinj ngaia pida tinim tighaze tizurun ghei. Eemoghon ngeu eez to Isip ivool tiei, ve iuul ghei pa tibuun ya, ve ipaghun sipsip ve mekmek toit paam.”

²⁰ Tamandi iloon saveen todi, ve ighason di ighaze: “Wai, tau sine? Pughu vena to apuli ineep? Aghami ve yamja anim maau? Rikia moghon amuul ala, ve aghami inim. Leso itija taghan.” Tovenen tila tigham Mose, ve yesja timuul tinim.

²¹ Reguel ighaze Mose ineep toman di. Tovenen Mose iyok pa ngar toni, ve Reguel igham natu liva eez pa Mose ve ivaii. Iza Sipora.

²² Yesuru tineep le Sipora apo, ve ipoop natu tamoot. Mose iwaat iza Gersom. Pasa, mata injal

ighaze: “Muuṅ, naneep nanim loom tonowe.” †

Maaron ighita patañani to yes Israela

²³ Ndaman katindi inim ila, ghoru kinik to yes Isipa imaat. Eemoghon yes Isipa tighamgham samin yes Israela, ve tighurghur uraat patañani padi sone. Tigham le matadi sini iyaat. Tovenen yes Israela titañtaṅ ve tikausim pa ledi ulaaṅ.

²⁴ Maaron ilooṅ tañiiz todi, ve mata ingal imuul ila pa saveeṅ to muuṅ ye imbua toman nditim-budi Abaram, Isak ve Yakop. *Mbnp 15:13+, 26:24, 28:13*

²⁵ Ye ighita yes Israela tineep ila patañani tiina lolo. Tovenen igham ṅgar tiina padi.

3

Maaron ivot to Mose ve ighur uraat pani

¹ Mose inginṅgin sipsip ve mekmek to rawa Yetro. Yetro, ye ṅgeu to ighamgham uraat pa watoonrau to yes Midiana. Sawa eez, Mose igham sipsip ve mekmek to Yetro, ve ila pa ndug balim. Ipul ndug to moghon moghon ilaghlaagh pani, ve isakia laghoon ila ivot lolooz Orep pughu. Lolooz tonowen, nene lolooz patabuaṅ to Maaron. Iza ite Sinai.

² Mose inepneep tonowe, ve Mbanjoonja to Yoova *

† **2:22:** Ataam ite to tator saveeṅ waaro tonene, nene vene: “You naneep nanim loom.” * **3:2:** Mbanjoonja to Yoova igham Yoova nagho ve ivotvot to tamtoḡhon. Baibol pida tiwaata tighaze ‘ensel bilong Bikpela,’ ma ‘angel of the LORD.’ Saveeṅ to mbanjoonja tonowen, nene inimale Yoova tau isavsaaṅ. Tovenen ṅgara pida matadi ingal tighaze mbanjoonja tonenen, nene Krisi.

ivot toni inimale yab ighan ila ai kainanjen eez. Mose ighita yab tonowen iyaryaar kat, eemoghon ighan ai maau. *Mbanj 7:30+*

³ Tovenen igham ngar naol ighaze: “Wai, nowe sa? Mbeb tonowen, ghitoonja ite kat. Pughu vena to yab iyaryaar ila ai tonowen, eemoghon ighani maau? You pale nala nagharaui, ve naghita poiiani.”

⁴ Tovenen Mose ilaagh injarua ai tonowen ila ighaze ighita poiiani. Eemoghon Yoova ineep ila ai tonowen, ve ighita Mose inim, ve ipoi ighaze: “Mose, Mose!”

Mose iyok pa aliņa ighaze: “Taug nene.”

⁵ Yoova isaav ila pani ighaze: “Unum ugharau malep! Uyoon tonanan, ve upas duduunja to aghem izi. Pasa, taan to yom uyondyood izala na, nanan patabuanj. *Yos 5:15; Mbanj 7:33*

⁶ You Maaron to tamam. Ve you Maaron to Abaram, Isak, ve Yakop.” *Mt 22:32; Mk 12:26; Lu 20:37*

Mose iloonj saveen tonene, ve rikia moghon imbotoon nagho. Pasa, imatughez pa ighita Maaron.

⁷ Yoova isaav pani muul ighaze: “Tamtoghon tiou to tineep izi Isip we, you naghita pataņani todi wa. Yes daba to tinġin di pa uraat, tighamgham samin di, le matadi siņi iyaat ve titanj tiina. Eemoghon tanjiz todi, you naloonja wa. Tovenen pataņani todi, you nakankaan pani maau. Nawatagi le isob. *Mbanj 7:34*

⁸ “Tauto aazne, nazi nanim naghaze naghham mulin di ila yes Isipa nimadi. You pale naghham di tipul Isip, ve tila tineep izi taan to yes Kanaana, Hita, Amora, Peresa, Hivia, ve Yebusa. Pasa, taan

tonowen soso tiina, ve ngoreenja tiina kat. Ve igham mbeb naol titub pool.

⁹ Tovenen taniiz to yes Israela inim ivot tiou ve naloona wa. Ve patanjani to yes Isipa tighurghuri padi pa titatan di, you naghita wa.

¹⁰ Tovenen aazne, you naghaze nambaanj ghom umuul ula pa Isip ve ughita kinik todi, leso ugham tamtoghon tiou Israela tipul taan Isip ve tinim.”

¹¹ Eemoghon Mose isaav pa Maaron ighaze: “Wai! You sa ngeu, to irau nala nayoon ila kinik mata, ve naghham yes Israela tipul Isip? You irau naghham uraat tovene maau.”

¹² Maaron isaav pani muul ighaze: “You taug pale naneep toman ghom ve napalot ghom. Tovenen yom pale ugham tamtoghon tiou Israel tipul Isip, ve yamja anim avot sualen, ve asun ve ambees payou izi lolooz tonene pughu. Sawa to mbeb tonenen ivot, ghoro uwatag ughaze you taug to nambaanj ghom.”

Maaron ivotia iza pa Mose

¹³ Mose ipamuul Maaron aliija ighaze: “Nene poia. Ve ighaze namuul nala, ve nasaav pa yes Israela naghaze: ‘Maaron to nditimbuud, to imbaanj ghou nanim tiam,’ yes pale tighason ghou tighaze: ‘Sa Maaron tonanan. Iza sei?’ Pale napamuul ghasoniin todi vena?”

¹⁴ Maaron isaav pani ighaze: “You Taug Nanep-

neep. †

Nene you izag ve gabuag. Tovenen usaav pa yes Israela ughaze: ‘YE TO INEPNEEP’ tauto imbaan ghou nanim tiam.” *Syg 1:4,8*

¹⁵ Ve Maaron isaav pa Mose muul ighaze: “Usaav pa yes Israela tovene: ‘Yoova, Maaron to nditambuud Abaram, Isak, ve Yakop, to imbaan ghou nanim tiam. Ye iza “YOU TAUG NANEPNEEP.” ’ Izag tonene pale ineep le alok. Tovenen tamtoghon to muri pale tivot, irau matadi ingal izag tonene itaghoni taghoni gha ila.

¹⁶ “Tovenen yom ula ulup ndolman to yes Israela, ve usaav padi tovene: ‘Yoova, Maaron to nditambuud Abaram, Isak, ve Yakop timbesmbees pani, tauto ivot tiou, ve aliņa ilat payam ighaze: Mata payam irau sawa isob. Tovenen ngar sam-samia naol to yes Isipa tighamgham di payam, ye ighita di wa.

¹⁷ Ve ye isaav tovene: Taan Isip to aazne andeen pataņani tiina pani, ye pale igham gham apuli, ve

† **3:14:** Maaron iza kat, nene yes Yuda timbooda tovene: YHWH. Tiwaat iza tonene tovene: ‘Yahweh.’ Eemoghon tironon pa tiwaat Maaron iza kat. Tovenen tiwatwaat Maaron tighaze ‘Adonai.’ Saveeņ Adonai, pughu tovene: ‘Tiina’ ghoru ‘Ngeu Tiina.’ Ila saveeņ English tighaze ‘Lord.’ Saveeņ ‘nanepneep,’ nene yes Israela ti-savia ila taudi aliņadi tighaze: ‘Ehyeh.’ Tovenen igharau ris pa Maaron iza Yahweh. Ighaze uwaat Baibol ila English aliņadi, Baibol katindi titaghon ngar to yes Yuda, ve tiwaat Maaron iza kat maau. Tighaze ‘LORD’ (timbood leta tintina). Tauto Tok Pisin Baibol paam iwaat Maaron ighaze ‘Bikpela.’ Eemoghon ‘Ngeu Tiina’ nene Maaron iza kat maau. Nene isavia uraat toni, to ye tiina toit ve ingin mbeb tisob. English Baibol munginadi pida tiwaat Maaron iza tighaze ‘Jehovah.’ Sawa pida, iit tawaat Maaron iza ila aliņaad taghaze ‘Yoova.’ Eemoghon iza kat, nene Yahweh.

ala aneep izi taan to yes Kanaana, Hita, Amora, Peresa, Hivia, ve Yebusa. Taan tonowen ngoreenja tiina, ve igham mbeb naol titub pooi.’

¹⁸ “Tovenen yom ula usavia alinjag tonene pa ndolman to yes Israela. Yes pale tiloonj ghom. Ghoru ugham di ve yamja ala avot to kinik to yes Isipa, ve asaav pani aghaze: ‘Yoova, Maaron to yei Hibrua, ivot tiei wa. Tovenen nighaze uyok payei leso nila ndug balim, ve nigham watoonrau pani izi tonowe. Pale nilaagh irau mbonj tol, ghoru nila nivot.’

¹⁹ “Eemoghon you nawatag: Kinik to Isipa, ye irau iyok payam sorok maau. You irau napatoonj tapirig pani le isob, ghoru iyok payam.

²⁰ Tovenen you pale napatoonj tapirig pa yes Isipa, ve naghams mbeb gharatoonjadi tintina to ite kat tivot ila lolodi. Leso natatan tapiridi, ve kinik todi ipul gham ala.

²¹ Sawa to yam apamundigin laghoonj, you pale naghams yes Isipa lolodi payam, ve tirei lemim mbeb pida. Leso ala toman nimamim nginija sob.

²² Tovenen ndiliva tiam irau tisob tila ve tighason yes Isip tidi to tineep toman di ne, pa tigham ledi nonogiinja popoiadi toman mbaliinj todi pida to tigharaat di pa gol ve silva. Yes pale tigham payam. Mbeb todi tonowen pale tisob tinim ndinatumim ledi pa tindud di pani. Tovenen yam pale ayu mbeb todi le isob, ghoru amundig ala.”
Mbnp 15:14; Igham 12:35+

4

Maaron ighur tapiri ila to Mose leso igham mbeb gharatoonjadi pida

¹ Yoova isavsaav le isob, ve Mose isaav pani ighaze: “Poia. Eemoghon ighaze yes Israela tighur ila saveeᅇ tiou maau, ve tilooᅇ ghou maau, ve ti-saav payou tighaze: ‘Waa, Yoova ivot tiom onoon, ma ugham kaarom?’ Nene pale nasaav padi vena?”

² Tovenen Yoova ighasoni ighaze: “Yom ukiskis sa tonanan?”

Mose isaav pani ighaze: “Nene titi tiou.”

³ Yoova isaav pani muul ighaze: “Upiyaava izi taan.” Tovenen Mose ipiyaav titi toni izi taan, le itoora inim moot. Mose ighita moot tonowen, le ruᅇa iza pani ve ighau ila sagan.

⁴ Yoova isaav pani muul ighaze: “Nimam izi ukis uvu.” Sawa to Mose nima izi ikis moot uvu, nene itoora inim titi muul ila nima.

⁵ Ghoru Yoova isaav pani ighaze: “Ulooᅇ. Sawa to yom ula uvot to yes Israela, ugham tovene. Leso tighur ila tighaze you Yoova, Maaron to nditim-bumim Abaram, Isak ve Yakop, to navot tiom, ve tilooᅇ aliᅇam.”

⁶ Ve Yoova isaav pani muul ighaze: “Uzeev nimam ilooᅇ ila nonogiiᅇa tiom.” Mose igham tovene, ve sawa to ipas nima ivot, ighita kolekole igham nima, le isami ve ipisosoᅇ.

⁷ Yoova isaav pani muul ighaze: “Uzeev nimam imuul ilooᅇ ila.” Tovenen Mose izeev nima ilooᅇ ila nonogiiᅇa toni muul. Ve sawa to ipasi ivot, ighita nima poia muul.

⁸ Ghoru Yoova isaav pani tovene: “Ighaze yes Israela tighur ila saveeᅇ tiom maau, ugham mbeb gharatooᅇa ivot pa titi muuᅇ, lesu ipatooᅇ ghom ighaze you naneeᅇ toman ghom. Ve ighaze tighur

ila sone, upatoon mbeb ite tonanan padi, lesu tighita ve tighur ila.

⁹ Ve ighaze mbeb gharatoonjadi ru tonanan igham di tighur ila saveen tiom maau, ghoru utib ya Nil rita, ve ulinji izi taan mamaasa. Ya tonanan pale itoora inim sin.”

¹⁰ Ghoru Mose isaav pa Yoova ighaze: “O Tiina, you tonene, ngeu to savsaveen maau. Muun ve inim, avog ipatanan pa savsaveen. Ve aazne paam, yom uvot tiou ve usavsav toman ghon, eemoghon avog ipapatanan sone.” *Igham 6:12; 1Kor 2:1+*

¹¹ Tovenen Yoova isaav pani ighaze: “Sei ighur tamtothon avodi? Ve sei igham tamtothon talinadi ipam ve avodi ivool? Ve sei igham tamtothon matadi iyaryaar ve tighita ndug, ve igham matadi ipis? You Yoova moghon. Ite paam maau. *Mbo 94:9*

¹² Tovenen aazne, umundig ve ula. You taug pale naneep toman ghom, ve napariaan ghom pa savsaveen, ve napatoon ghom pa sa saveen to naghaze usavia.” *Mt 10:19*

¹³ Eemoghon Mose ipamuul Maaron alina ighaze: “Aa Tiina tiou, you naraua maau. Umbaan tamtothon ite paam ila.” *2Kor 3:5+*

¹⁴ Tovenen Yoova ate yabyab pa Mose, ve isaav pani ighaze: “Ve vena pa togham Aron? Ye sin to Levi paam. You nawatagi: Ye ngeu to savsaveen. Uloon. Ye ilaagh itaghon ataam inim ighaze ighita ghom. Sawa to inim peria ve ighita ghom, ye pale lolo poia kat.

¹⁵ Tovenen sa saveen to nasavia payom, yom irau usavia pani ve iloonja. Ghoru ana igham avom,

ve ivotia alinam pa tamtoghon. You taug pale napariaan gham pa savsaveen, ve napatoon gham pa sa ngar to pale aghami.

¹⁶ Tovenen Aron pale igham avom ve ivotia alinam pa ival tiina. Yamru pale ataghon ngar inimale you Maaron naghhamgham pa yes propeta tiou. Pasa, yom pale usavia alinam ila toni, ghero ana isavia ila pa ival tiina.

¹⁷ “Ve matam ingal titi tiom paam. Ukisi ve ula. Pasa yom pale ugham mbef gharatoonadi pida tivot pani. Mbef tonanan pale tinim ghilaloon payom tighaze you naneep toman ghom.”

Mose imuul

¹⁸ Mose yesuru Yoova tisavsaav le isob, ghero imuul ila to rawa Yetro, ve ighasoni ighaze: “Olmán, naghaze namuul nala Isip ve nangig tonvetaz tiou. Tisob tinepneep, ma pida timatmaat wa?”

Rawa iyok pani ighaze: “Poia. Ula toman lolom poia.”

¹⁹ Sawa to Mose ineep izi Midian, Yoova isaav pani ighaze: “Umuul ula pa Isip. Pasa, ndiran to muun tighaze tirab ghom umaat, yes tisob timatmaat wa.

²⁰ Tovenen Mose igham azuwa toman ndinatu, ighur di tizala esele, ve ikisi titi to Maaron, ve tipamundigin laghoon todi tighaze tizila pa Isip.

²¹ Tilaghaagh tila, ve Yoova isaav pani ighaze: “You naghur tapirig iza tiom, lesó ugham mbef gharatoonadi naol naol. Sawa to yom ula uvot Isip, ugham mbef gharatoonadi tonanan tisob tivot ila kinik todi mata. Eemoghon you pale naghham ngar toni iyaryaan kat. Lesó ipul yam Israela ala rikia sob.

²² Ghoru uvotia alinag pani ughaze: ‘Yoova isaav payom tovene: Tamtoghon to Israel, yes tinimale natug aidaba.

²³ You nasaav payom wa naghaze upul ndinatug tinim, leso timbees payou ve tisuṅ payou. Eemoghon yom uzoor alinag, ve unḡuruut di. Tovenen you pale narab natum aidaba imaat.’ ” *Igham 12:29*

²⁴ Mose yesuru azuwa ve ndinatu tilaghlaagh tila le mboṅ izi, ghoru tineep izi ndug eez ve atedi izi. Sawa tonenen, Yoova ivot to Mose, ve ighaze irabi imaat.

²⁵ Eemoghon Mose azuwa Sipora rikia moghon igham gharghar ve ighorot natu waar toni uli, ve ighuri ila Mose aghe, ve isaav pani ighaze: “Yom azuwag kat. Pasa, siṅ izala poghom wa.” *Mbnp 17:9+*

²⁶ Yoova ighita mbeb tonenen, tauto irab Mose imaat maau, ve ipuli ineep. [Ghoru tipamundigin laghoon todi muul ve tila.]

²⁷ Mose togha Aron inepneep izi Isip, ve Yoova ila ivot toni, ve isaav pani ighaze: “Umundig ula pa ndug balim, ghoru ughita tazim Mose tonowe.” Tovenen Aron imundig ila, ve ivot to Mose izi lolooz to Maaron pughu. Ye ighita tazi Mose, le lolo poia kat ve iyaṅin pani.

²⁸ Ghoru Mose ipaes pani pa saveeṅ isob to Yoova imbaaṅa pa ivotia. Ve ipaesia mbeb ghara-toonadi to Yoova isaav pani pa ighami ne paam.

²⁹⁻³⁰ Ghoru yesuru tilaagh muul. Tila tila le tivot Isip, ghoru tipoi ndolman tisob to yes Israela tinim ve yesṅa tilup di, ve Aron ipaes padi pa saveeṅ isob

to Yoova isavia pa Mose. Ve ipatoonj mbeb ghara-toonjadi pida tonenen paam ila ival tiina matadi ve tighita, lesa tighur ila tighaze Yoova ineep toman di pa uraat todi.

³¹ Tovenen ival tiina tighur ila saveenj todi. Sawa to ival tiina tiloonj tighaze Yoova ighita patanjanj todi ve ighaze iuul di, yes tiput aghedi, ve tipait Maaron iza.

5

Mose yesuru Aron tila tighita kinik to Isip

¹ Mose yesuru Aron tilup yes Israela le isob, ghero tila tighita kinik to Isip, ve tisaav pani tighaze: “O kinik, uloonj. Yoova, ye Maaron to yei Israela, aliņa ilat payom ighaze: Upul tamtothon toni tila pa ndug balim. Lesa tilup di tonowe, ve tigham sunjuunj tiina pani.”

² Eemoghon kinik isaav padi ighaze: “Yoova, ye sei, to pale naloonj aliņa ve napul yam Israela ala? You nawatag Yoova maau. Tovenen irau naloonj aliņa, ve napul yam Israela ala ne maau.”

³ Tovenen yesuru tisaav pani muul tighaze: “Yoova, Maaron to yei Hibrua, ivot tiei wa. Tovenen nighaze upul ghei nila pa ndug balim. Lesa nilup ghei pa sunjuunj tonowe, ve nigham watoonjrau pani. Pale nilaagh irau mbonj tol, ghero nila nivot. Ighaze nila toni maau, ye pale igham moroghoonj samia eta ivot payei ve iwaghamun ghei, ma igham malmal ivot ve timbut ghei pa buza.”

Igham 3:18

⁴ Eemoghon kinik ipamuul aliņadi ighaze: “Pughu vena to yamru aghaze agham tamtothon

tipul uraat todi? Rikia moghon ve amuul ala pa uraat tiam!

⁵ Aazne, yam loomba sorok amasa anim ival kat. Tauto yamru aghaze agham nditamim tipul uraat todi ne?”

Kinik to Isip ighur patanjani ite paam pa yes Israela

⁶⁻⁷ Ndag ee moghon tonenen, kinik to Isip imundig ve isaav ariana pa tau uraata toni pida to tighurghur uraat pa yes Israela, toman Israela pida to tingin nditadi pa uraat, ighaze: “Aloonj. Wit ve bali ayadi to Israela titoor taan tomani ve tigharaat brik pani, auul di pani muul malep. Aneep, ve taudi tila tikaala ve tighami.

⁸ Eemoghon uraat to aghuri padi, anduura izi malep. Ineep toman ina. Pasa, yes maatedi kat pa uraat. Tauto titaņ roran ghou tighaze napul di tila lesu tigham watoonrau pa Maaron todi.

⁹ Tovenen yam aghur uraat patanjani kat padi. Lesu tigham njar pa saveeņ kaarom muul sob.”

¹⁰ Kinik isavsaav toman di le isob, ghoru yes uraata toni tonowen yesna yes Israela to tingin nditadi pa uraat, tila tivot to ival tiina to Israel, ve tipaes padi tighaze: “Kinik aliņa ilat payam tovene: Ye irau iuul gham pa wit ve bali ayadi muul maau.

¹¹ Aazne ve ila, ye ipul uraat tonenen ila yam taumim nimamim. Tovenen yam ala pa sa ndug to irau andeeņ mbeb ayadi, ve ayou lemim. Eemoghon uraat to yei nighuri payam, nene irau ninduura izi maau. Brik piiz to yei nighur di payam pa agharaat di, yam irau apasob di raraate inimale muuņ.”

12 Tovenen yes Israela timbiriis tirau taan isob to Isip, ve tiyouyou wit ve bali ayadi to timbut motmotin di. Leso titoor taan tomani ve tigharaat brik pani.

13 Yes daba to tighurghur uraat padi, tipasul di tighaze: “Ai, yam awaghamgham kat pa uraat! Ndag to naol ne, brik piiz to yei nighur di payam pa agharaat di, yam irau apasob di inimale muun, sawa to niuluul gham pa mbeb ayadi.”

14 Ve yes daba tonowen tila to yes Israela to tingin nditadi pa uraat, ve tilos di, ve tisaav padi tighaze: “Muun, brik piiz to yei nighur di payam pa agharaat di, yam aghagharaat di rikia ve apasob di. Pughu vena to noor ve aazne, ninin brik tiam le imbool?”

15 Tovenen yes Israela to tingin nditadi pa uraat, tila to kinik ve titan rorani tighaze: “Tiina tiei, yei mbesoonja tiom. Pughu vena to ugham ngar tonene payei?”

16 Aazne, tilos katin ghei le tinimai isami. Pasa, tighaze yei nigham uraat iraua maau. Ve sei inim pughu pani? Nene yes uraata tiom. Pasa, yes tisaav pa yei mbesoonja tiom tighaze nigharaat brik inimale muun. Eemoghon tiuul ghei pa mbeb ayadi muul maau. Tauto nigharaat naol maau.”

17 Kinik iyaan di ighaze: “Yam maatemim pa uraat! Arau uraat maau! Tauto anoknok saveen payou aghaze napul gham ala, lesa agham watoonrau pa Maaron tiam Yoova.

18 Eemoghon pale maau. Rikia moghon amuul ala pa uraat tiam. Irau tiuul gham pa mbeb ayadi muul maau! Ve brik piiz to tisaav payam pa agharaat di, yam irau apasob di.”

¹⁹ Yes tiloon saveen tonene, ve tighilaal tighaze yes tineep ila pataņani tiina lolo wa. Pasa, kinik isaav padi ighaze: Brik piiz to tighuri padi to tigharaat di, irau tinduura izi maau. Yes irau tipasob di le tisob.

²⁰ Ghorotipul kinik ve tivot tila, le tindeen Mose yesuru Aron. Pasa, yesuru tineep pumuri ve tisanan di.

²¹ Tighita di, ve tiyaan yesuru tighaze: “Ngar to agham payei, Yoova ighita wa. Ve ye tau pale ighur atia payam! Pasa, yamru to agham kinik yesna uraata toni atedi yabyab kat payei. Yes tighita ghei tighaze yei samsamiamai kat. Aazne, yamru aghur buza ila nimadi, leso timbut ghei nisob nimatmaat.”

Mose lolo ipataņan ve itaņ roran Maaron

²² Tovenen Mose imuul ila, ve ighason Yoova ighaze: “O Tiina, pughu vena to yom ugham pataņani tiina tonene ivot pa tamtoghon tiom? Yom umbaan ghou nanim sualen pasa?”

²³ Sawa inim mata to nala navotia aliņam pa kinik to Isip, ve inim aazne, ye ighurghur pataņani naol pa yes Israela. Eemoghon yom uul di rita pa pataņani todi maau.”

6

Maaron ipariaaņ saveen mbuaaņ toni muul

¹ Tovenen Yoova isaav pa Mose ighaze: “Aazne, yom pale ughita katin ngar to you pale naghama pa kinik to Isip. You pale napatoon tapirig tiina pani, leso ipul yes Israela tila. Ye pale ighita katin you

tapirig le isob, ghoru izurun gham aghau pa ndug toni.”

² Ve Maaron isaav pa Mose muul ighaze: “You Yoova nanepneep.

³ Muun, sawa to navot to Abaram, Isak, ve Yakop, navotia taug padi naghaze: You Maaron Arianag To Nalib Pa Ndimaronja Tisob. Eemoghon izag Yoova, nene navotia padi maau. *Mbnp 17:1, 26:24, 28:13+*

⁴ Ve nambua saveen toman di naghaze yeina pale nilup ghei ninim ee moghon, ve naghama taan to yes Kanaana to tineep tinim loomba pani ne, inim ledi. *Mbnp 12:7; Hib 11:8+*

⁵ “Aazne, yes Israela titañ tiina pasa, yes Isipa tighamgham samin di, ve tighurghur patañani naol padi. Eemoghon taniiz todi, you naloona wa. Ve matag ingalngal saveen mbuaan tiou. *Igham 2:24*

⁶ “Tovenen yom ula ve uvotia alinag pa yes Israela ughaze: ‘You Yoova nanepneep. Aazne, yam anim mbesoona sorok pa yes Isipa, ve titatan gham pa tapiridi, ve lemim ataam eta maau. Eemoghon you pale naghama mbeb gharatoonadi tintina pida, lesa naghama mulin gham ila yes Isipa nimadi. Pale napatoon tapirig tiina ivot ighazon, ve naghur atia injarua yes Isipa pa sosor todi. Lesa napas gham avot pa patañani tiam.

⁷ Ve you pale naghama gham anim tamtooghon tiou, ve you Yoova nanim Maaron tiam. Ve yam pale awatag katin ghou, ve aghazon pa gabuag toman ngar tiou. Pasa, uraat to naghaze naghama payam, nene pale ipatoon gham pa ngar tiou. Onoon, aazne yes Isipa titatan gham pa tapiridi.

Eemoghon you pale naghham mulin gham ila ni-madi, ve nagharaat ataam payam, leso apul ndug todi ve ala.

⁸ Muun, you nambua saveen ve naporiana le iyaryaan kat naghaze you pale naghham taan to yes Kanaana inim Abaram, Isak, ve Yakop ledi. Tovenen you pale naghham gham ala avot taan tonowen, ve naghami inim lemim, leso aneep tonowe itaghoni taghoni gha ila. Pasa, you Yoova nanepneep.’ ”

⁹ Yoova isavia saveen tonene le isob, ghoros Mose ila ipaesia Yoova aliya pa yes Israela. Eemoghon uraat pataani to yes tighamghami, nene itatan di le tapiridi isob kat. Tovenen lolodi pa tiloon saveen toni maau.

¹⁰⁻¹¹ Ghoros Yoova isaav pa Mose muul ighaze: “Ula ughita kinik to Isip, ve usaav pani ughaze iyok pa yes Israela, leso tipul taan toni ve tila.”

¹² Eemoghon Mose ipamuul Yoova aliya ighaze: “You ngeu to savsaveen maau. Ighaze yes Israela tiloon saveen tiou maau, nene kinik paam, irau iloon ghou maau.”

Igham 4:10

¹³ Ghoros Yoova isaav pa Mose yesuru Aron ighaze timuul tila to yes Israela ve kinik to Isip. Ve ighur uraat pa yesuru ighaze tigham yes Israela tipul Isip ve tila.

Pitiin to Mose yesuru Aron

¹⁴ Nene yes Israela pughudi.

Yakop natu aidaba iza Ruben. Ve Ruben nd-inatu, nene Anok, Palu, Ezron, ve Karmi. Yes tonene tivot tinim ival, ve muri ghoros tinim rumai paan.

¹⁵ Yakop natu Simeon ndinatu, nene Yemuel, Yamin, Oat, Yakin, Zoar, ve Saul. (Saul tina, ye Kanaan tidi.) Yes tonene to tivot ila to Simeon. Yes tivot tinim ival, ve muri ghoru tinim rumai liim ve eez.

¹⁶ Yakop natu Levi ndinatu izadi, nene Gerson, Koat, ve Merari. Levi ineep irau ndaman 137, ve imaat.

¹⁷ Gerson ndinatu, nene Libni ve Sime.

¹⁸ Koat ndinatu, nene Amram, Izar, Ebron, ve Usiel. Koat ineep irau ndaman 133, ve imaat.

¹⁹ Merari ndinatu, nene Mali ve Musi. Yes tonene to tivot ila to Levi. Nene pitiinj to Levi toman papaghu toni. Yes tivot tinim ival, ve muri ghoru tinim rumai tol.

²⁰ Amram ivai wagha liva Yokopet. Ve Yokopet ipoop Aron yesuru Mose. Amram ineep irau ndaman 137, ve imaat.

²¹ Izar ndinatu, nene Kora, Nepek, ve Zikri.

²² Ve Usiel ndinatu, nene Misael, Elzapan, ve Sitri.

²³ Aron ivai Eliseba to Aminadap natu liva, ye Nason livu. Eliseba yesuru Aron tipoop paanj: Nadap, Abiu, Eleasar, ve Itamar.

²⁴ Kora ndinatu, nene Asir, Elkana, ve Abiasap. Kora ndinatu tol tonene tivot tinim ival, ve muri ghoru tinim rumai tol.

²⁵ Aron natu Eleasar ivai Putiel natu liva, ve tipoop Pineas.

Yes tonene to Levi papaghu toni, ve tinim daba pa rumai todi todi.

²⁶⁻²⁷ Nenen Aron yesuru Mose pughudi. Yoova ighur yesuru pa timuunj pa yes Israela, ve tigham di tipul Isip, ve tilaagh ila rouj rouj itaghon

rumai todi todi, ve tila pa taan Kanaan. Ve yesuru to tisaav pa kinik to Isip tighaze iyok padi lesu tigham yes Israela tipul Isip ve tila.

²⁸⁻²⁹ Sawa to Mose inepneep izi Isip, Yoova isaav pani ighaze: “You Yoova nanepneep. Saveen isob to you nasavia payom, yom irau usavia pa kinik to yes Isipa lesu iloonḡa.”

³⁰ Eemoghon Mose isaav pa Yoova ighaze: “You ḡeu to savsaveen maau. Pale kinik iloonḡ ghou vena?”
Igham 4:10, 6:12

7

Maaron ipaesia ḡgar to ye pale ighami izi Isip

¹ Yoova isaav pa Mose muul ighaze: “Uloon. You Maaron to naghur ghom pa ugham naghog, ve uyoon ila kinik to Isip mata. Ve togham Aron pale inim propet tiom, ve ivotia alinḡam pa kinik.

² Tovenen sa saveen to you nasavia payom, yom irau usavia pa Aron. Lesu ana isavia alinḡag ila to kinik. Ye pale isaav pa kinik lesu iyok pa yes Israela ve tipul ndug toni.

³ Eemoghon you pale naghām kinik ḡgar toni iyaryaḡ kat. Lesu leg soso pa napatoon tapirig izi taan to yes Isipa, ve naghām di tighilaal tighaze you nanepneep. Pale naghām mbeb gharatoonḡadi naol to ite kat.
Mbanḡ 7:36; Ro 9:17+

⁴ Tovenen kinik to Isip irau iloonḡ gham rikia maau. Pale ikis gham ris. Eemoghon muri, you pale napatoon nimag pa yes Isipa, ve naghur patanani tintina iza todi inim atia pa sosor todi. Ghoru naghām tamtoḡhon tiou Israela tipul taan to Isip

ve tila. Pale tilaagh ila rouņ rouņ tinimale yes ndaaba.

⁵“Sawa to napatoon tapirig ivot ighazoon pa yes Isipa, ve naghām yes Israela tipul ndug todi, nene yes Isipa paam pale tighilaal tighaze: You Yoova nanepneep, ve tighazoon pa gabuag toman ngar tiou.”

⁶Yoova isavsaav le isob, ghorō Mose yesuru Aron tila ve titaghon katin saveeņ to ye isavia padi.

⁷Sawa tonenen, Mose ndaman toni irau tamoot paan (80). Ve Aron ndaman toni irau tamoot paan ve tol (83).

Titi to Aron inim moot

⁸Yoova isaav pa Mose yesuru Aron ighaze:

⁹“Aloon. Ighaze kinik to Isip isaav pa yamru pa agham mbeb gharatoonja eta, ghorō usaav pa Aron igham titi toni, ve ipiyaava izi taan ila kinik mata. Titi toni pale itoora inim moot.”

¹⁰Tovenen yesuru tila tivot to kinik, ve titaghon katin saveeņ to Yoova isavia padi. Aron ipiyaav titi toni izi taan ila kinik toman uraata toni matadi, ve titi toni itoora inim moot.

¹¹Kinik ighita mbeb tonenen, ve ipoi tamtoghon ngara pida yesņa mura pida to Isip tinim, ve yes paam tigham mur todi le ivot inimale Aron ighami. *2Tim 3:8*

¹²Yes enjaeņja tipiyaav titi todi todi tizi taan, ve titi todi titoor di tinim moot paam. Eemoghon titi to Aron to inim moot, itoon moot todi tonowen tisob.

¹³Kinik ighita mbeb gharatoonja tonenen pa tau mata. Eemoghon ngar toni iyaryaan kat ighaze

izoor Maaron aliņa. Ngar to ye ighami, nene denja kat pa saveeņ to muuņ Yoova isavia pa yesuru.

Pataņani to ivot pa yes Isipa muuņ: Ya inim siņ

¹⁴ Muri ghoru, Yoova isaav pa Mose muul ighaze: “Kinik to Isip, ngar toni iyaryaan kat ighaze ye irau ipul yes Israela tila maau.

¹⁵ Bozo mboņmaagh, ye pale izila ya Nil. Tovenen yom ugham titi to itoora inim moot, ve umuuņ uzila usaņani izi ya dige. Sawa to ye ilat peria,

¹⁶ ghoru usaav pani ughaze: ‘Yoova, Maaron to yei Hibrua, imbaaņ ghou nanim, ve nasavia aliņa payom wa. Ye ighaze yom upul tamtoghon toni Israel tila, lesu timbees pani ve tisun pani izi ndug balim. Eemoghon sawa tonenen ve inim aazne, yom ulooņ aliņa rita maau.

¹⁷⁻¹⁸ Tovenen Yoova aliņa ilat payom muul ighaze ye pale igham ngar ite paam. Lesu uwatag ughaze ye inepneep, ve ughazooņ pa gabua toman ngar toni. Ughita. You pale nalos ya Nil pa titi tiou to nakiskisi ne, ghoru ya Nil pale itoora inim siņ, ve iigh to tineep ila ya lolo tisob timatmaat. Ve ya pale vuzi mbuuzā kat. Tovenen tamtoghon to Isip pale lolodi pa tighuni muul maau.’ ”

¹⁹ Ve Yoova isaav muul pa Mose ighaze: “Usaav pa togham Aron igham titi toni, ve ipatooņa inarua ya tisob to yes Isipa. Ya tintina, ve ya gegegeu to tirereer taghon uum lolodi, ya naliu, ve ya todi to ghunuun to ineep ila uur ve rubruub lolodi ne paam. Ya tonowen pale tisob tinim siņ moghon. Tovenen siņ pale irau taan isob to Isip.”

²⁰ Tovenen Mose yesuru Aron tila ve titaghon katin saveeņ to Yoova isavia padi. Aron ila iyoon

ila kinik to Isip yesɲa uraata toni matadi, ve iit titi toni iza, ghoros ilos ya Nil pani, ve ya Nil itoora inim siɲ.

²¹ Tovenen iigh to tineep ila ya lolo, tisob timatmaat le ya vuzi. Ya to yes Isipa, eta poia muul maau. Tisob tinim siɲ moghon. Tovenen yes Isipa irau tighun ya Nil muul maau.

²² Eemoghon yes mura to Isip timundig, ve anadi tigham mur todi pa ya, le ivot inimale Mose yesuru Aron tighami. Tovenen kinik ɲgar toni iyaryaɲ muul, ve ilooɲ yesuru saveeɲ todi maau. ɲgar to ye ighami, nene denja kat pa saveeɲ to Yoova isavia pa Mose yesuru Aron muuɲ.

²³ Ghoros kinik itoora, ve imuul ila pa ruum toni, ve mata ila pa mbab tonenen muul maau.

²⁴ Yes Isipa irau tighun ya Nil muul maau. Tovenen titai saambu katindi itaghon ya Nil dige, lesos titib adi ya pa tighun.

²⁵ Yoova iwaghamun ya Nil, ve ineep tovene irau mboɲ liim ve ru.

8

Pataɲani inim ru: ɲgob katindi tivot

¹ Mboɲ liim ve ru tonenen isob, ghoros Yoova isaav pa Mose ighaze: “Ula ughita kinik to Isip muul, ve usaav pani ughaze: ‘Yoova aliɲa ilat payom ighaze upul tamtoɲhon toni Israel tila, lesos timbees pani ve tisunɲ pani.

² Ighaze unɲguruut di, upatum ghom. Pasa, ye pale nawaghamun taan dodoli to Isip pa ɲgob.

³ ɲgob ndiɲndiɲ ndiɲndiɲ pale tivot pa ya Nil, ve tipul ya, ve tiɲarua ruum tiom tilat. Ghoros tilooɲ

tila ruum, ve tiyatov di tizala inam to ghenoon paam. Ve tiloon tila ruum to uraata tiom, ve tiyatov di tizala ival tiina to Isip poghodi paam. Ve ngob pale tiloon tila inamim to naznazuun, ve tiyatov di tiloon tila uur to toraan mberet lolodi paam.

⁴ Tovenen yamņa uraata tiom, ve ival tiina to Isip paam, ngob pale tiyatov di tizala poghomim.’ ” [Yoova isavsaav le isob, ghoros Mose ila ipaesia aliņa tonenen pa kinik. Eemoghon kinik iloonņa maau.]

⁵ Tovenen Yoova isaav pa Mose muul ighaze: “Usaav pa Aron iit titi toni iza, ve ipatoonņa inarua ya tisob to Isip: Ya tintina, ve ya gegegeu to tirereer taghon uum lolodi, ve ya naliu paam. Leso ngob tivot pa ya to naol, ve tineep irau taan isob to Isip.”

⁶ Tovenen Aron iit titi toni iza, ve ipatoonņa inarua ya tisob to yes Isipa. Ghoros ngob ndinđinđin ndinđinđin tivot, le tineep irau taan isob to yes Isipa.

⁷ Eemoghon yes mura to Isip tigham mur todi, ve yes paam tigham ngob katindi tivot izi taan to Isip.

⁸ Ghoros kinik to Isip ipoi Mose yesuru Aron tinim, ve isaav padi ighaze: “Yamru aghason Yoova pa indiiir ngob tonene tighau payou ve tamtoghon tiou paam! Leso napul yes Israela tila tigham watoonrau pa Yoova.”

⁹ Mose isaav pani ighaze: “Poia. Yom taum ughur sawa eta pa nasun pa Yoova. Leso lolo isamin ghom toman yes uraata tiom ve ival tiina to Isip, ve indiiir ngob tighau pa ruum tiam.

Eemoghon ngob to tineep ya Nil dige, pale tinepneep tovene.”

¹⁰⁻¹¹ Tovenen kinik isaav pani ighaze: “Bozo, ghoru usunj.”

Mose isaav pani ighaze: “Poia. Pale nataghon alinjam. Leso uwatag kat ughaze Yoova, Maaron to yei Israela, ye Maaron tau. Ye raraate inimale ndimaronnja pida maau. Bozo ghoru, ngob tisob tipul ghom toman ruum tiom, ve tipul yes uraata tiom, ve ival tiina to Isip paam, ve tisob tighau tila. Eemoghon ngob tau tineep ya Nil dige, pale tinepneep tovene.”

¹² Tovenen Mose yesuru Aron tipul kinik, ve timuul tila. Ghoru Mose itanj roran Yoova ighaze ngob to injal kinik mata pani ne, indiidir di tighau tila.

¹³ Ve Yoova iloonj sunjuunj toni. Tovenen ngob tisob to tineep ila ruum to yes Isipa lolodi, ve taghon ruum digedi ve uum lolodi, nene tisob timatmaat.

¹⁴ Ghoru yes Isipa tindou di ila ndoun ndoun, ve timbuuz le vuzidi ikau ndug.

¹⁵ Sawa to kinik to Isip ighita patanani to ngob isob, ye isaav ighaze: “Suleem! Aazne ghara, atemai izi!” Eemoghon ngar toni iyaryaan muul ighaze izoor Yoova alina. Tovenen iloonj Mose yesuru Aron alinjadi maau, ve injuruut yes Israela muul. Ngar to ye ighami, nene denja kat pa saveen to Yoova isavia pa Mose yesuru Aron.

Patanani inim tol: Suum tivot

¹⁶ Sawa pida inim ila, ghoru Yoova isaav pa Mose ighaze: “Usaav pa Aron igham titi toni, ve

ilos taan. Leso ghavuur irau taan isob to Isip itoora inim suum.”

¹⁷⁻¹⁸ Tovenen yesuru titaghon Maaron aliņa. Sawa to Aron igham titi toni ve ilos taan pani, ghavuur isob to Isip itoora inim suum, ve tiņut yes Isipa toman ņgai todi le tisami kat. Ghoros yes mura anadi tighaze titoov tapiridi lesos tigham suum pida paam tivot. Eemoghon tiraua maau.

¹⁹ Tovenen tila tipaes pa kinik tighaze: “Wai, mbeb tonene ivot ila Maaron tau nima.” Eemoghon kinik ņgar toni iyaryaņ kat ighaze izoor Maaron aliņa. Tovenen ilooņ Mose yesuru Aron maau. Nene denja kat pa Yoova aliņa to muuņ isavia.

Patariņani inim paariņ: Raariņ samsamiadi tivot

²⁰ Muri ghoros, Yoova isaav pa Mose ighaze: “Bozos ndoromaņa, ve umundig uzila ya Nil dige, ve usaņan kinik to Isip. Ighaze inim ivot, ghoros uņarua ula, ve usaav pani ughaze: ‘Yoova aliņa ilat payom ighaze upul tamtoghon toni tila, lesos timbees pani ve tisuiņ pani.

²¹ Ighaze unġuruut di, upatum ghom. Pasa, ye pale imbaaņ raariņ tintina ndiņndiņ ndiņndiņ tilat, ve tiņut ghom toman yes uraata tiom, ve ival tiina to Isip paam. Ndug tiam toman ruum tiam pale tivon pa raariņ tintina.

²²⁻²³ Eemoghon ye pale ipoon taan suruvu to Gosen to tamtoghon toni Israel tineep ila, ve raariņ eta irau ivot padi maau. Lesos yom uwatag ughaze ye ineep izi taan tiom paam. Pasa, ye pale itaghon ņgar eez pa tamtoghon toni, ve ņgar ite pa tam-

toghon tiom. Bozo, ghoru igham mbeg gharatooŋa tonene ivot, leso ipatooŋ tapiri payom.’ ”

²⁴ Yoova itaghon aliŋa tonene, ve igham anooŋa ivot. Ye igham raanŋ tintina ndiŋndiŋ ndiŋndiŋ tivot. Raanŋ tonowen tilooŋ tila kinik ruum toni, ve ruum to yes uraata toni, ve tineep irau taan isob to yes Isipa. Tiwaghamun yes Isipa le tisami kat.

²⁵ Tovenen kinik imbaanŋ pa Mose yesuru Aron tinim, ve isaav padi ighaze: “Iraua lak! Yam Israela ala agham watoonŋrau pa Maaron tiam. Eemoghon ala ndug mala malep. Aneep tatanŋan izi taan to yei Isipa, ve agham uraat tonanan.”

²⁶ Eemoghon Mose isaav pani ighaze: “Vana maau. Ighaze nirab ŋgai tiei tinim watoonŋrau pa Maaron tiei Yoova ila yes Isipa matadi, nene pale irau ŋgar todi maau, ve timundig ve tirab ghei pa yaam.

²⁷ Tovenen nighaze yom uyok payei, leso nila ndug balim, ve nigham watoonŋrau pa Maaron tiei Yoova tonowe itaghon saveeŋ to ye tau isavia payei. Pale nilaagh irau mbonŋ tol, ghoru nila nivot.”

²⁸ Kinik ilooŋ saveeŋ tonene, ve ighaze: “Poia. You nayok. Yam irau ala ndug balim ve agham watoonŋrau pa Maaron tiam Yoova. Eemoghon ala ndug mala malep. Ve matamim iŋgal ghou paam ila suŋuunŋ tiam.”

²⁹ Mose ipamuul aliŋa ighaze: “Ulooŋ. You naghaze namundig nala tonene. Sawa to napul ghom ve nala, you pale nasuŋ pa Yoova, leso bozo indiiŋ raanŋ tonene tighau payam. Yamŋa uraata tiom, ve ival tiina to Isip paam, raanŋ pale tighau pa yam asob. Eemoghon kinik, you nasaav

payom: Ugham kaarom payei ve uᅅguruut ghei muul malep. Upul ghei nila nigham watoonᅅrau pa Yoova.”

³⁰ Ghoru Mose ipul kinik, ve ila isunᅅ pa Yoova.

³¹ Yoova iloonᅅ sunᅅunᅅ toni, ve indiir raanᅅ tisob tighau pa kinik toman uraata toni ve ival tiina to Isip, le raanᅅ eta ivot muul maau.

³² Eemoghon kinik ᅅgar toni iyaryaanᅅ muul ighaze ikis yes Israela tineep. Tauto ipul di tila maau.

9

Pataᅅani inim liim: Maaron ighur moroghoonᅅ inᅅarua ᅅgai to yes Isipa

¹ Sawa pida inim ila, ghoru Yoova isaav pa Mose ighaze: “Ula to kinik to Isip, ve usaav pani ughaze: ‘Yoova, Maaron to yei Hibrua, aliᅅa ilat payom ighaze upul tamtoghon toni tila, leso timbees pani ve tisunᅅ pani.

² Ighaze uzoor saveenᅅ, ve upul di tila maau, ve unoknok ᅅgurutaanᅅ di, upatum ghom.

³ Pasa, ye pale ipatoonᅅ tapiri payom, ve ighur moroghoonᅅ samia kat pa ᅅgai tiam to tilaghlaagh pumuri. Hos, esele, kamel, makau, sipsip, ve mekmek tiam pale timatmaat.

⁴ Eemoghon ᅅgai to yes Israela, eta irau imaat maau. Pasa, Yoova pale igham ᅅgar eez pa yes Israela ᅅgai todi ve ᅅgar ite pa yam Isipa ᅅgai tiam.

⁵ Ve Yoova ighur sawa ighaze bozo, ghoru igham mbeb tonene ivot izi taan tonene.’ ”

⁶ Ve onoon, mbonᅅ ndugizau, ghoru Yoova igham mbeb tonenen ivot, le yes Isipa ᅅgai todi katindi

timatmaat. Eemoghon yes Israela, ngai todi eta imaat maau.

⁷ Kinik to Isip imbaan tamtoghon pida tila titiir ndug, ve tighita ngai to yes Isipa moghon to timatmaat. Ve Israela todi, popoiadi moghon. Eta imaat maau. Eemoghon mbep tonowen ipamundigin ngar to kinik maau. Ngar toni iyaryaan kat ighaze injuruut yes Israela tineep. Tauto ipul di tila maau.

Patañani inim liim ve eez: Mbotmboot samsamia igham yes Isipa

⁸ Muri ghoru, Yoova isaav pa Mose yesuru Aron muul ighaze: “Yamru ala ndug to tipatuntun uur, ve akor avab le nimamim borokia, ghoru ala aghita kinik to Isip. Ala avot toni, ghoru Mose iyoon ila kinik mata, ve itir avab iza.

⁹ Avab tonanan pale imbiriiis irau taan isob to yes Isipa. Ve sawa to itap izala tamtoghon ve ngai poghodi, nene pale sambor toman mbotmboot samsamia igham di.”

¹⁰ Yoova isavsaav le isob, ghoru yesuru tila ndug to tipatuntun uur, ve tikor avab. Yesuru tila tiyoon ila kinik nagho, ve Mose itir avab iza le imbiriiis. Sawa to avab ghavuura tonowen itap izala tamtoghon ve ngai poghodi, sambor toman mbotmboot samsamia igham di. *Syg 16:2*

¹¹ Yes mura paam, sambor igham di le tisami kat tinimale ival tiina to Isip. Tovenen tapiridi irau Mose maau.

¹² Eemoghon Yoova igham kinik ngar toni iyaryaan le iyaryaan kat. Tovenen ye iloon Mose yesuru Aron maau. Ngar to kinik ighami, nene denja pa Yoova aliña to muun isavia pa Mose.

Pataņani inim liim ve ru: Ais patu patu titaptap tizi

¹³⁻¹⁴ Pataņani to mbotmboot isob ve muri ghoru, Yoova isaav pa Mose ighaze: “Bozo mbonmaagh, ghoru umundig ula ve usaņan kinik to Isip. Sawa to inim ivot, ghoru usaav pani ughaze: ‘Yoova, Maaron to yei Hibrua, aliņa ilat payom ighaze upul tamtoghon toni tila, leso timbees pani ve tisun pani. Ighaze upul di tila maau, upatum ghom. Pasa, ye pale inġal yamņa uraata tiom ve ival tiina to Isip matamim pa pataņani pida to tintina kat. Leso yom uwatag kat ughaze: Maaron eta to taan raraate inimale ye maau.

¹⁵ Inimale ye ipatoon katin tapiri payom, tone iwaghamun ghom toman tamtoghon tiom pa moroghoon tiina, ve ipasob gham pa taan alok wa.

¹⁶ Eemoghon igham tovene maau. Pasa, ye ighur ghom pa pughu tonene: Ye ighaze ipatoon tapiri ivot le ighazoon payom, leso muri tamtoghon tivotia varu irau taan isob. *Ro*

9:17
¹⁷ Aazne, yom upakur ghom, ve utatan tamtoghon toni, ve unġuruut di ughaze tila malep.

¹⁸ Tovenen bozo mbonmaagh, sawa tovene, ye pale igham ais patu patu titaptap tizi. Sawa to nditimbum tipamundigin Isip inim ndug paghu, ve inim imuul aazne, ais patu patu tovene titap tizi ndug tiam pa eta sone.

¹⁹ Tovenen usaav pa uraata tiom tigham nġai tiom toman mbep tiom to tineep pumuri, ve tighur di tisob tiloon tila ruum, leso ruum ipoon di. Mbep eta ineep pumuri malep. Pasa, ais patu patu to pale tizi, nene pale tirab mbep tisob to tineep

pumuri, le timatmaat.’ ” [Yoova isavsaav pa Mose le isob, ghoru Mose ila ipaesia Yoova aliņa pa kinik.]

²⁰ Yes uraata to kinik to tighur ila Yoova aliņa ve timatughez pani, rikia moghon tighur ņgai ve mbesooņa todi tisob tilooņ tila ruum.

²¹ Eemoghon yes to tighur ila maau, tipul mbesooņa ve ņgai todi tineep pumuri.

²² Ghoru Yoova isaav pa Mose ighaze: “Ukaak nimam iza, leso ais patu patu titaptap tizi irau taan isob to yes Isipa, ve tirab mbep tisob to tineep pumuri: tamtoğhon, ņgai, ve aniiņ isob to uum paam.” *Mbo 78:47+, 105:32*

²³ Tovenen Mose iit titi toni iza, ghoru Yoova igham ndug milia, ve lalaav kiliiņa izizi pa taan toman avolutu tiina, ve ais patu patu titaptap tizi irau taan isob to yes Isipa.

²⁴ Ais patu patu tintina kat titaptap tizi, ve ndug milia le ndug isami kat. Sawa to yes Isipa nditim-budi tipamundigin Isip inim ndug paghu ve inim, mbep tovene ivot pa ndug todi pa eta maau. *Syg 8:7, 16:21*

²⁵ Tovenen ais patu patu titaptap tizi irau taan isob to yes Isipa, ve tirab mbep tisob to tineep pumuri: tamtoğhon, ņgai, ve aniiņ isob to uum. Ve tirab ai paam le bogadi tipolpol. Tovenen mbep tisob tisami.

²⁶ Ndug ee moghon kat to ais izi pani maau. Nene taan suruvu to Gosen to yes Israela tineep pani.

²⁷ Tovenen kinik to Isip imbaan pa Mose yesuru Aron tinim, ve isaav padi ighaze: “Iraua lak! Aazne, you naghilaal naghaze naghām sosor wa.

Yoova ngar toni, nene denja. Ve yeiņa tamtoghon tiou nisosor.

²⁸ Tovenen yamru ala ve asuņ pa Yoova. Pasa, ais patu patu ve lalaav tonene iwaghamun ghei le nisami kat. You pale napul gham ala. Irau nanguruut gham muul maau.”

²⁹ Mose isaav pani ighaze: “Poia. You pale napul ndug tiina ve navot nala pumuri, ghoru nakaak nimag iza, ve nasuņ pa Yoova. Leso ipasob lalaav, ve ais patu patu titap muul sob. Sawa to mbeg ru tonenen putia, yom pale uwatag ughaze: Taan to naol ne, nene taan to Yoova. *Mbo 24:1; 1Kor 10:26*

³⁰ Eemoghon you nawatag: Yamņa uraata tiom amatughez pa Maaron tiei Yoova sone.”

³¹ Sawa to ais patu patu tonowen titaptap tizi, tirab aniiņ bali ve mbeg ite to tighagharaat nonogiiņa toman mbeg pida pani ne, le tisami. Pasa, bali itub iza ve anoņa ighaze ivot, ve mbeg ite tonowen irug paam.

³² Eemoghon aniiņ wit toman aniiņ todi ite to tiwaata tighaze ‘spelt,’ nene tipaar sone. Tauto ais patu patu tonowen tiwaghamun di maau.

³³ Mose ipul kinik, ve ivot ila pa ndug tiina dige, ghoru ikaak nima iza, ve isuņ pa Yoova. Tovenen Yoova ipasob uman toman lalaav ve ais, ve titap muul maau.

³⁴ Eemoghon sawa to kinik ighita uman toman lalaav ve ais putia, ye igham sosor muul. Yesņa uraata toni ngar todi iyaryaan muul tighaze tiņguruut yes Israela tineep. Lolodi pa tiloon Maaron aliņa maau.

³⁵ Kinik ngar toni iyaryaan kat. Tauto iņguruut yes Israela muul. Ngar to ye ighami, nene denja kat

pa Yoova aliņa to Mose isavia.

10

Pataņani inim liim ve tol: Isis tivot

¹ Muri ghoru, Yoova isaav pa Mose ighaze: “Ula ughita kinik to Isip muul. Pasa, you taug to naghām yesņa uraata toni ngar todi iyaryaan. Leso naghām mbēb gharatoonādi tintina tivot ila lolodi, ve napatoon tapirig padi.

² Ve muri inim kamos pa yam Israela, lesu asavia pa ndinatumim ve nditimumim, ve asaav padi aghaze: ‘Muun, Yoova ipatoon tapiri pa yes Isipa. Ye ighām mbēb gharatoonādi tintina tivot ila lolodi, ve ipamogheran di le tiwaghāmghām kat.’ Ve yam asob pale awatag aghaze you Yoova nanepneep, ve aghazoon pa gabuag toman ngar tiou.”

³ Yoova isavsaav le isob, ghoru Mose yesuru Aron tila tivot to kinik, ve tisaav pani tighaze: “Yoova, Maaron to yei Hibrua, aliņa ilat payom muul ighaze: Yom ukaria zoraan saveen wa. Pale nēez o uput aghem pani ve unēep ila samba? Upul tamtoğhon toni tila, lesu timbees pani ve tisun pani.

⁴ Ighaze unğuruut di muul, upatum ghom. Pasa, bozo mbonmaagh, ye pale ighām isis tivot, ve tiwaghāmun ndug tiom.

⁵ Isis to pale tivot, nene sorok maau. Pale titatab taan tiam, le aghita taan maau. Tovenen aniin enaenā to ais iwaghāmun di maau, isis pale tipasob di le tisob kat. Ve ai tisob to titub ila uum tiam lolodi ne paam, isis pale tighan suvun rauadi.

⁶ Yamña uraata tiom ve ival tiina to Isip paam, ruum tiam pale tivon kat pa isis. Muun kat, sawa to nditimbumim tinim tigham ndug tonene, ve inim imuul aazne, aghita isis tovene tivot pa eta sone.”

Mose isavia saveen tonene le isob, ghorotoora, ve ipul kinik, ve ivot ila pumuri.

⁷ Yes uraata to kinik tisaav pani tighaze: “Wai kinik, pa piiz to yom ughaze upul ngeu tonowen igham patajani pait? Yom uwatag maau? Ndug to Isip isami wa. Upul nditamoot to Israel tila tisun pa Maaron todi Yoova.”

⁸ Tovenen tila tigham Mose yesuru Aron timuul tinim, ve kinik isaav padi ighaze: “Aazne, you nayok payam pa ala asun pa Maaron tiam Yoova. Eemoghon naghaze nawatag: Sei masin kat to pale tila?”

⁹ Mose ipamuul aliña ighaze: “Yei nisob pale nila. Ndolman, ndipain, ndinatumai nditamoot ve ndiliva, toman sipsip, mekmek, ve makau tiei tisob paam. Pasa, nighaze nila nigham lupun tiina ve nisun pa Yoova.”

¹⁰ Tovenen kinik isaav pani muul tovene: “Ighaze nayok payam pa ala, nene avaat Yoova ineep toman gham ve poia toni iza tiam. Eemoghon irau napul ndizwamim ve ndinatumim tila toman gham ne maau. Maau le maau kat! Pasa, ngar samia eta avaat ineep ila lolomim.

¹¹ Tovenen yam nditamoot moghon irau ala ve asun pa Yoova. Pasa, mbeb tonenen, to yamru azorzoornug pani.” Ye isavsav padi le isob, ghorotoora izurun Aron yesuru Mose tighau pa mata, ve tivot tila pumuri.

¹² Ghoro Yoova isaav pa Mose ighaze: “Ukaak ni-mam iza, ve upatoonja injarua taan isob to yes Isipa. Leso isis ndinndin ndinndin tivot, ve tiwaghamun aniiñ toman mbeb pida to titub ila taan todi. Sa mbeb to ais iwaghamuni maau, nene pale isis tipasobi.”

¹³ Tovenen Mose iit titi toni iza, ve ipatoonja injarua taan isob to yes Isipa. Ghoro Yoova igham yaghur tiina ilaagh pa taan dige to ineep ila pa ndag iza, ve inim. Yaghur ilaagh pa ndag le mbon mbon ve ndugizau. Tauto iviviir isis tivot.

¹⁴ Isis to tivot ne, sorok maau. Katindi kat. Ve tineep irau taan isob to Isip, ve tiwaghamun ndug todi. Muuñ ve inim, isis tovene tivot izi Isip pa eta sone. Ve muri paam, irau tivot muul maau.

¹⁵ Tovenen isis titatab taan isob to yes Isipa, ve tigham taan iyasosoon. Ve tighan suvun mbeb tisob to ais iwaghamun di maau ne le tisob kat. Tighan kikiliñ, ndoor, aniiñ, ai rauadi, ve anonadi paam. Taan isob to yes Isipa, mbeb mbiti eta ineep muul maau.

¹⁶ Tovenen rikia moghon kinik to Isip imbaan pa Mose yesuru Aron tinim, ve isaav padi ighaze: “You naghham sosor tiina kat pa Maaron tiam Yoova, ve naghham sosor pa yamru paam.

¹⁷ Lolomim isamin ghou muul, ve apul sosor tiou tonene. Irau naghham sosor muul maau. Ve asuñ Maaron tiam Yoova pa indiiir patañani tonene payei. Pa vene, nisob nimatmaat.”

¹⁸ Tovenen Mose ipul kinik ineep, ve ila isuñ pa Yoova.

¹⁹ Yoova iloon suñuñ toni, ve itoor yaghur ve ilaagh pa ndag izila ve inim toman tapiri, le iviviir

isis tonowen tisob tila pa Te Kaviaanja. Eta ineep muul izi Isip maau.

²⁰ Eemoghon Yoova igham kinik ngar toni iyaryaan muul. Tovenen ipul yes Israela tila maau.
Igham 4:21

Patañani inim liim ve paan: Ndoroom tiina ivot izi Isip

²¹ Muri ghero, Yoova isaav pa Mose ighaze: “Ukaak nimam iza, leso ndoroom tiina ivot izi Isip. Ndoroom tiina to pale ivot, nene ite kat. Yes Isipa pale tiyamaana tighaze nene poia maau, ve igham di titañtaan ve tiwandabndab tinimale yes to matadi pisi.”

²² Tovenen Mose ikaak nima iza, ve ndoroom tiina ikau Isip, le ineep irau mbonj tol ve ndag tol.
*

Syg 16:10

²³ Ndoroom tiina tonowen ivot le yes Isipa irau tiwaghiton di maau. Tovenen mbonj tol ve ndag tol tonenen, yes irau tilaagh maau. Tineep ila ruum todi moghon. Eemoghon ndug to yes Israela tineep pani, nene ghazonja.

²⁴ Tovenen kinik to Isip ipoi Mose imuul inim, ve isaav pani ighaze: “Yam Israela ala asun pa Yoova. Yamja ndizwamim ve ndinatumim asob ala. Eemoghon yam irau apul makau, sipsip, ve mekmek tiam tineep izi Isip.”

²⁵⁻²⁶ Eemoghon Mose isaav pani ighaze: “Ee-e, vana maau. Pale nimundig toman ngai tiei

* **10:22:** Maaron kaarom eez to yes Isipa, iza Ra. Yes Isipa tighur ila tighaze ye maaron to ingin ndag. Ngeu Tiina igham ndoroom tiina ikau Isip, leso yes Isipa tiwatag tighaze ye tapiri ilib pa maaron todi tonowen.

tisob. Irau nipul eta ineep maau. Pasa, yei taumai nikankaan pa sa mbeb to pale nigham di tinim watoonrau pa Maaron tiei Yoova. Tovenen yei irau niyou di tisob tila toman ghei. Nila nivot sa ndug to Yoova ighaze nineep pani ve nisun, ghoru ye tau pale isaav payei pa sa mbeb to pale nigham di tinim watoonrau pani. Mbeb pida, pale nimos suruvu moghon inim watoonrau. Ve pida, yab pale ighan suvun di.”

²⁷ Eemoghon Yoova igham kinik ngar toni iyaryaan muul. Tovenen lolo pa ipul yes Israela tila maau.

²⁸ Ve izurun Mose ighaze: “Ughau pa matag. Ve umuul unum sualen malep! Ighaze naghita ghom muul, yom pale umaat.”

²⁹ Tovenen Mose ipamuul aliņa ighaze: “Poia. Saveņ tauto usavia. Irau ughita ghou muul maau.”

11

Mose ipaes pa kinik ighaze Maaron pale irab Isipa ndinatudi aidaba tisob timatmaat

¹ Muri ghoru, Yoova isaav pa Mose ighaze: “You pale nangal kinik toman ival tiina to Isip matadi pa patanani ite paam. Muri pa patanani tonene, ye pale iyok payam ve ala. Ye pale izurun gham, ve ipasul gham ighaze rikia ve asob ala. Irau tiam eta ineep maau.

² Tovenen aazne, yom ula ve usaav pa Israela tisob, nditamoot ve ndiliva, tovene: Yes irau tila to yes Isipa to tineep tigharau di, ve tighason di pa tigham ledi mbaliin pida to tigharaat di pa gol ve silva.”

Mbnp 15:14; Igham 3:21+

³ Yoova isaav tovene pasa, ye igham yes Isipa lolodi poia pa yes Israela. Ve Mose paam, yes uraata to kinik toman ival tiina to Isip tighita tighaze ye ngeu tiina eez, ve titandag pani.

⁴ Tovenen Mose isaav pa kinik ighaze: “Uloon! Yoova aliņa ilat payom tovene. Ighaze: ‘Mbon anonja, you pale nazi nanim, ve nalaagh irau taan isob to Isip.

⁵ Ve ndinatumim aidaba tisob pale timatmaat. Irau napul eta ineep maau. Yom to unepneep ila inam to ghamuun pooz, taum natum aidaba pale imaat. Ve itaghoni tovene ila ila le yes ndiliva mbesonja to ledi izadi maau ve timumum wit inim palawa ne ndinatudi paam. Tamtoghon tisob to Isip ndinatudi aidaba, toman nğai todi ndinatudi to nditinandi tipoop di muun ne, pale tisob timatmaat.

⁶ Tovenen tanjiiz tiina pale ivot irau taan isob to Isip. Muun ve inim, tanjiiz tovene ivot izi ndug tiam pa eta sone. Ve muri paam, irau ivot muul maau.

⁷ Eemoghon yes Israela toman nğai todi tisob pale tineep pooli. Ngavuun eta irau isuul maau. Leso yom uwatag kat ughaze you Yoova naghham nğar raraate pa yam Isipa ve tamtoghon tiou Israel maau. Naghham nğar ite ite payam.” *Igham 8:22, 10:23, Syg 7:3, 9:4*

⁸ Ve Mose isaav muul ighaze: “O kinik, mbeb tonene ighaze ivot, uraata tiom tonene pale tisob tinim tiput aghedi payou, ve titan roran ghou tighaze: ‘Yamja tamtoghon tisob to titaghon ghom, apul ghei ve aghau ala!’ Muri pa mbeb tonenen, you pale napul ghom.” Mose ate yabyab kat. Tovenen ipul kinik ineep, ve ivot ila pumuri.

⁹ Ghoru Yoova isaav pani ighaze: “Kinik to Isip irau iloon alinam maau. Ve nene poia. Pasa, ighur soso payou, leso naghram mbeb gharatoonadi naol izi Isip.”

Igham 7:3

¹⁰ Tovenen Mose yesuru Aron tigham mbeb gharatoonadi naol ila kinik to Isip mata. Mbeb tonowen ite kat. Eemoghon Yoova igham kinik ngar toni iyaryaan le iyaryaan kat. Tauto iyok pa yes Israela tipul taan toni ve tila ne maau.

12

Tutuun to Pasova

¹ Mose yesuru Aron tinepneep izi taan to Isip, ve Yoova isaav padi ighaze:

² “Kaiyo tonene, nene ilib pa kaiyo tisob. Pasa, kaiyo tonene, you pale naghram mbeb paghu ivot payam. *

Tovenen yam Israela irau aghur kaiyo tonene imuun pa ndaman tiam tisob.

³ Yamru ala alup Israela tisob, ve asaav padi tovene: Mbon inim saangul to kaiyo tonene, ghoru nditamoot tisob irau timbit sipsip ma mekmek papaghu enaenja irau ruum todi todi.

⁴ Yam enaenja irau anjabiiz poian sipsip to ambit di: Tamtoghon piiz kat to irau tighani le tipasobi? Ighaze ruum eta tamtoghona naol maau, ve tigham ngar tighaze engendi irau tighan suvun sipsip todi maau, yes irau tisaav pa nditadi to tineep tigharau

* **12:2:** Mbeb paghu to ivot pa sawa to Pasova, nene vene: Maaron igham mulin yes Israela, ve ilup di tinim ee moghon, ve igham di tinim lupuun toni. Muri, ye isavia tutuun toni padi paam. Tovenen sawa tonenen ve ila, nepoon todi inimale muun maau. Nepoon todi ite.

di tinim, ve yesna tilup di ve tighanghan. Leso tipasobi.

⁵ Yam irau aghita sipsip ma mekmek nditamoot to popoiadi moghon, ve ndaman todi enaena, ghoru ambit di. *1Pe 1:19*

⁶⁻⁷ Anjin poian di le mbonj inim saangul ve paan (14) to kaiyo tonene, ve rabrab izi, sawa to taghita sapirin ghiit, ghoru arab di. Ve ruum sine to aneep ila, agham mbeb to arab di ne sinjidi, ve apeli ila ataam avo dige ru, ve izala pa sala paam. Leso inim ghilaloonj payam ighaze yam tamtoghon to Yoova to alup gham pa ghanghaniinj ila ruum tonanan lolo.

⁸ “Mbonj ee moghon tonenen, amoz sipsip tonanan izala yab, ve aghani toman mberet to le yis maau, ve ndoor papaii. *1Kor 5:8*

⁹ Sipsip minda to ighaze mbiti ma nazuun, yam aghani malep. Aghan moziinj moghon. Tovenen amoz sipsip anona dodoli, toman daba, ngoi, ve kodkoda izala yab, ve aghan suvuni.

¹⁰ Apul pida ineep inim naar malep. Ighaze aghan le apomim isun, ve pida ineep, aghuri ila yab ighan suvuni le isob, ghoru ndugizau.

¹¹ Ve agharaat taumim pataghaan pa laghoonj. Apool nonogiinja tiam ila tuku, aghur duduuna to aghemim, ve akis titi tiam paam. Ghoru mbolemim izi ve aghanghan. Eemoghon aghan rikia. Aniin tonanan, nene aniin to Pasova. Yam irau aghani, lesu matamim ingal sawa to you Yoova nasalib payam, ve nala narab yes Isipa ndinatudi timatmaat.

¹² “Mbonj tonenen, you pale nalaagh irau taan isob to Isip, ve narab ndinatudi aidaba, toman

ngai todi ndinatudi to nditinandi tipoop di muun, le tisob timatmaat. Leso naghur atia pa maaron kaaromņa todi, ve natatan tapiridi. Pasa, you Yoova nanepneep.

¹³ Tovenen sinj to apeli ila ataam to ruum tiam avodi dige, nene pale ipatoon ruum tiam payou. Sawa to nalaagh pa narab yes Isipa, ve naghita sinj tonanan, you pale nasalib payam, ve navool pa ruum ite. Leso nawaghamun gham sob.

¹⁴ “Sawa tonene, sawa tiina ve sawa patabuanj. Tovenen yam Israela yamņa papaghu tiam to muri pale tivot, irau apakur sawa tonene, ve matamim ingali irau sawa isob. You naghur tutuun payam tovene: Ndaman isob, ighaze sawa tonene ivot, yam irau agham lupuun tiina, ve asun payou toman lolomim poia. Tutuun tonene pale iyaryaaj tovene itaghoni taghoni gha ila.

Lupuun to mberet to le yis maau

¹⁵ “Sawa to lupuun tiina tonene, ighaze lolomim pa aghan mberet, ghoru aghan mberet to tighur yis ila maau ne. Yam pale aghan mberet tovene moghon irau mbonj liim ve ru. Tovenen sawa to lupuun tiina tonene ighaze imundig, yam agham yis †

† **12:15:** Yes Yuda tigharaat mberet tovene: Tigham palawa ris, ve titooru toman ya, ghoru tipuli ineep sawa mala ris, leso injaraanj. Palawa njaraanja tonenen, nene igham palawa isar inimale yis. Ila saveenj English tiwaata tighaze ‘leven.’ Ghoru tigham palawa njaraanja tonenen, ve titooru toman palawa paghu, leso ighami isar. Ghoru tigham palawa tonenen ngiira ris, ve tighuri ila saguan, leso injaraanj ve isanjaan pa sawa to tigharaat palawa paghu muul.

isob to ineep ila ruum tiam lolodi, ve apiyaava ilale. Apul rita ineep malep. Mbonj liim ve ru to lupuuñ tiina tonene, ighaze tamtoghon tiam eta izoor saveeñ ve ighan mberet to titoora toman yis, yam azuruni ighau ila sagan pa yam Israela. Ilup toman gham muul malep. *1Kor 5:6-8*

¹⁶ Sawa to lupuuñ tiina tonene imundig, ve sawa inim liim ve ru to isob pani, yam Israela asob irau alup gham ve agham suñuuñ tiina. Sawa ru tonenen, nene umbom patabuanj. Agham uraat eta malep. Eemoghon aniiñ, ghoru yam irau agharaata.

¹⁷ “Lupuuñ tiina to mberet to le yis maau ne, ndaman isob, yam irau matamim iñgali ve ataghoni. Pasa, sawa tonene kat, to you naghham gham alaagh ila rouñ rouñ animale yes ndaaba, ve apul taan to yes Isipa. Tauto naghur tutuuñ ariana pa yam ve papaghu tiam to muri pale tivot ne tovene: Ndaman to naol ne, yam irau matamim iñgal sawa tonene, ve alup gham ve agham suñuuñ tiina payou. Tutuuñ tonene pale ineep tovene itaghoni taghoni gha ila. *Igham 23:15, 34:18*

¹⁸⁻¹⁹ “Tovenen ndaman tisob, kaiyo to ivot muuñ, mbonji inim saangul ve paan, ve rabrab toni, nene sawa to lupuuñ tiina tonene imundig. Ve ila isob pa rabrab to mbonj inim tamoot ee ve eez (21). Mbonj liim ve ru tonenen, ighaze aghan mberet, ghoru aghan mberet to tighur yis ila maau. Tovenen sawa tonenen, yis eta ineep ruum tiam lolodi malep. Ighaze taumim eta, ma loom eta to ineep ila lolomim izoor saveeñ ve ighan mberet to titoora toman yis ila sawa tonenen lolo, azuruni ighau ila sagan pa yam Israela.

Ilup toman gham muul malep.

²⁰ Tovenen mboŋ liim ve ru tonenen, ndug sine to yam aneep pani, aghan mbeb eta to yis ineeep ila malep. Agharaat mberet to le yis maau ne moghon.”

Mose ipaesia tutuuŋ pida to Pasova pa yes Israela

²¹ Yoova isavsaav toman Mose le isob, ghoros Mose ila ve ilup ndolman tisob to Israel, ve isaav padi ighaze: “Ala rikia moghon, ve apas lemim sipsip papaghu irau ruum tiam tiam, ve arab di. Leso agharaat aniin to Pasova.

²² Sipsip tonanan siŋidi, awato ila oon, ve agham ai ‘isop’ boga, ve azeeva ila siŋ tonanan. Ghoros apeli ila ataam tiam avodi dige. Ila dige ru, ve izala pa sala paam. Tiam eta ivot ila pumuri malep. Yam asob aneep ila ruum tiam tiam lolodi le ndugizau.

²³ Sawa to Yoova izi inim, ve ilaagh pa irab yes Isipa ndinatudi ve mbeb todi, ighaze ighita siŋ tonanan ineeep ataam tiam avodi dige, ye pale isalib payam, ve ila ivool ruum ite. Irau ipul aŋela to rabuuŋ tamtoŋhon ilooŋ ilat ruum tiam ve irab gham maau. *Hib 11:28*

²⁴ “Tutuuŋ to aazne nasavia di payam ne, nene arianaadi. Pale tinepneep tovene irau sawa isob. Tovenen yamŋa papaghu tiam to muri pale tivot ne matamim kisin di, ve ataghon katin di itaghoŋi taghoŋi gha ila.

²⁵ Sawa to ala avot taan to Yoova imbua saveeŋ pani ighaze igham payam, matamim inŋal lupuuŋ

tiina to Pasova, ve ataghon katin ngara izi tonowe. Apuli malep.

²⁶ Ve sawa to ndinatumim tighason gham pa lupuuñ tonene pughu, ghoru apaes padi tovene.

²⁷ Aghaze: ‘Iit tarab mbep tonene inim watoonrau pa Yoova. Leso tapaiti, ve mataad ingal sawa to Pasova to Yoova isalib pa ruum toit izi Isip, ve ipul ghiit taneep, ve ila irab yes Isipa ndinatudi.’ ”

Yes Israela tiloon saveñ tonene, ve tiput aghedi ve tipait Yoova iza.

²⁸ Ghoru tila ve titaghon katin tutuunñ tisob to Yoova isavia di pa Mose yesuru Aron.

Patañani inim saañgul: Maaron irab Isipa ndinatudi aidaba tisob timatmaat

²⁹ Yes tineep le mbonñ anonña, ghoru Yoova izi inim, ve irab yes Isipa ndinatudi aidaba tisob timatmaat. Ipul eta ineep maau. Kinik to igham pooz pa taan Isip ne natu aidaba, ve ila ila le yes to tineep ila ruum to yabyabuunñ lolo ne ndinatudi aidaba paam, tisob timatmaat. Ve Isipa ngai todi paam. Ye irab ndinatudi to nditinandi tipoop di muunñ ne, le tisob timatmaat.

³⁰ Tovenen mbonñ tonenen, kinik yesña uraata toni ve ival tiina to Isip, timundig le tighita ndinatudi timatmaat. Ghoru taniiz tiina imundig irau ruum ruum to yes Isipa. Pasa, mateenñ irau ruum tisob.

Yes Isipa tizurun yes Israela tila

³¹⁻³² Mbonñ tonenen, kinik imbaañ ila pa Mose yesuru Aron tinim, ve isaav padi ighaze: “Rikia moghon ve amundig apul ndug tiou, ve aghau ala!

Ve yamru moghon maau. Ival tiina to Israel paam. Yam asob ayou sipsip, mekmek, ve makau tiam, ve ala agham sunjuun pa Yoova itaghon ghasoniin tiam. Apul tamtoghon tiou, ve aghau ala! Ve aghason Maaron tiam pa igham poian ghou.”

³³ Yes Isipa tipasul yes Israela tighaze tipul ndug todi rikia moghon. Pasa, tigham ngar tovene: “Ighaze yes Israela tineep toman ghiit, nene pale tasob tamatmaat.”

³⁴ Ghoru yes Israela tigham oon todi to palawa ineep iloon ila, ve tindun di pa uli, lesu timbaad di ila avaradi. Palawa tonowen, titoora toman yis sone.

³⁵ Ve titaghon Mose aliņa ve tighason yes Isipa pa ledi mbaliin naol naol to tigharaat di pa gol ve silva, ve tighason di pa ledi nonogiņa paam. *Mbnp 15:14; Igham 3:21+*

³⁶ Yoova igham yes Isipa lolodi poia pa yes Israela. Tovenen mbeb tisob to yes Israela tighason di pani, yes Isipa tigham padi moghon. Tauto yes Israela tikarasim di kat.

Yes Israela tipul Isip

³⁷ Tovenen yes Israela timundig ve tipul ndug Ramses, ve tila tivot ndug eez iza Sukot. Yes ival le ival kat. Nditamoot todi to tirau malmal, yes irau 600,000 ma venen. Ve yes ndiliva toman ndinatudi, tinin di maau.

³⁸ Yes Israela ledi sipsip, mekmek, ve makau katindi kat. Tauto tiyou di tisob, ve tilaagh toman di. Ve ndug pida to Israela maau ne timundig tila toman di paam.

³⁹ Tilaagh tila le tivot ndug eez, ghoru atedi izi. Tineep tonowe, ve tigham palawa todi to

tigharaata izi Isip, ve timozi inim adi taman. Palawa tonowen, titoora toman yis maau. Pasa, sawa to timundig, yes Isipa tipasul di. Tauto ledi sawa eta pa tigharaat poian taman todi maau.

⁴⁰ Yes Israela tineep izi Isip irau ndaman 430, ghoru tipul Isip ve tila. *Mbnp 15:13; Ga 3:17*

⁴¹ Tovenen sawa kat to ndaman 430 tonenen isob, ghoru yes Israela tisob timundig tipul Isip ve tila. Tilaagh ila rouj todi todi tinimale yes ndaaba. ‡

⁴² Mbon tonowen, Yoova mata ingal yes Israela, ve igham di tipul Isip itaghon saveen mbuaan toni. Tauto ndaman isob, sawa to Pasova ighaze ivot, yes Israela tisob irau tipamaat ve matadi ingal mbeb to ivot pa mbon tonowen, ve tipait Yoova. Ngar tonene pale ineep tovene itaghoni taghoni gha ila.

Tutuun pida to injarua Pasova

⁴³ Yoova isaav pa Mose yesuru Aron ighaze: “Nene tutuun pida to injarua ghanghaniin to Pasova.

Ndug ndug to ighaze tinim tineep ila yam Israela lolomim, todi eta irau ighan sorokin aniiin to Pasova maau.

⁴⁴⁻⁴⁵ Ve ighaze agham tamtoghon to ndug ite inim lemim uraata, nene ye paam irau ighan sorokin aniiin to Pasova maau. Eemoghon ighaze aghol tamtoghon to ndug eta inim lemim mbe-soonja ve aziri, nene ye irau ighan.

‡ **12:41:** Yes Israela tinim ndaaba (o ami) to Maaron. Tovenen yes irau tiwalaghlaagh maau. Yes irau tilaagh denja itaghon rouj todi todi. Ughita Namba 10:11-33.

⁴⁶ Ighaze alup gham pa ghanghaniin to Pasova ila ruum eta lolo, yam aghan suvun sipsip tiam to-nanan. Agham minda rita ivot ila pumuri malep. Ve tua tovene paam, angoor eta malep. *Yo 19:36*

⁴⁷ Tamtoghon to Israel tisob irau matadi ingalngal lupuuñ tiina to Pasova ve titaghon katin ngara.

⁴⁸ “Ighaze ngeu eta to ndug ite ilat ineep toman gham, ve ighaze ilup toman gham pa ghanghaniin to Pasova, yam irau aziri toman ndita nditamoot tisob to tineep ila ruum toni. Leso aghita di aghaze yes raratedi tinimale yam to Israela kat. Le isob, ghoros yes irau tighan aniin to Pasova. Eemoghon sei to ighaze tiziri maau, nene irau ighan aniin to Pasova maau.

⁴⁹ Tutuuñ tonene pale igham pooz pa yam asob. Yes to sin kat to Israel, ve yes loomba to tineep ila lolomim ne paam.”

⁵⁰ Tovenen yes Israela tisob titaghon katin tu-tuuñ tisob to Yoova isavia pa Mose yesuru Aron.

⁵¹ Ve sawa kat tonenen, Yoova igham di tipul Isip. Tilaagh ila rouñ todi todi, ve tila.

13

Yes Israela irau tighur ndinatudi aidaba tinim Maaron le

¹ Yoova isaav pa Mose muul ighaze:

² “Yam Israela irau aghur ndinatumim aidaba toman ngai tiam ndinatudi to nditinandi tipoop di muuñ tisob tinim leg.” *Igham 22:28+, 34:19; Lu 2:23*

Lupuuñ tiina to ghaniin mberet to le yis maau

³ Mose isaav pa yes Israela ighaze: “Matamim ingal sawa tonene. Muuñ, yam anim mbesoonja

sorok izi taan Isip. Eemoghon aazne, Yoova ipa-toon tapiri tiina, ve ipas gham ila yes Isipa nimadi, ve apul ndug todi wa. Tauto aazne, anim mbe-soonja muul maau. Tovenen ndaman isob, sawa tonene ighaze ivot, yam aghan mbeb eta to yis ineep ila ne malep.

⁴Matamim ingal kaiyo Abib *

tonene. Pasa kaiyo tonene, to yam apul taan to yes Isipa.

⁵⁻⁶Muun, Yoova imbua saveen toman nditimbumim ighaze ye pale igham taan to yes Kanaana, Hita, Amora, Hivia, ve Yebusa inim lemim. Taan tonowen ngoreenja ve poia pa mbeb naol titub pani. Tovenen muri, sawa to Yoova igham gham ala avot tonowe, matamim ingal pa ataghon ngar tovene: Ndaman to naol ne, ighaze kaiyo Abib ivot, ghoru alup gham ve asun pa Yoova. Mbon liim ve ru, yam irau aghan mberet to le yis maau ne moghon. Ve mbon inim liim ve ru to lupuun tiina tonenen isob pani, yam alup gham ve agham sunuun tiina, ve apait Yoova iza toman lolomim poia.

Igham 34:18

⁷Mbon liim ve ru tonenen, ighaze aghan mberet, aghan mberet to le yis maau. Tovenen sawa tonenen, yis eta ineep ila yam Israela ndug tiam lolo malep.

⁸“Ighaze sawa to lupuun tiina tonene ivot, yam enjaenja apaesia pughu pa ndinatumim aghaze: ‘Tit ataghon ngar tonene, leso mataad ingal sawa to Yoova iuul ghiit, ve igham ghiit tapul Isip ve tanim.’

* **13:4:** Kaiyo Abib ivotvot pa Mas ve Epril. Nene inimale kaiyo Tabogar.

⁹ “Lupuunj tiina tonene pale inim ghilalooj to ineep ila nimamim ve ndamomim, ve ipei mulin ngar tiam pa sawa to Yoova ipatoonj tapiri tiina, ve igham gham apul ndug to yes Isipa ve anim. Leso lolomim imaagh pani sob, ve avomim imbesm-bees pa saveenj to ye igham pait ne irau sawa isob.

¹⁰ Tovenen Yoova ighur tutuunj payam tovene: Ndaman to naol ne, ighaze sawa to lupuunj tonene ivot, yam alup gham pa sunjuunj ve ataghon ngar tonene.”

Ataam to yes Israela tighur ndinatudi aidaba tinim Maaron le

¹¹ Mose isaav muul ighaze: “Yoova pale igham gham ala avot izi taan Kanaan. Taan tonowen, ye ighaze ipuli inim lemim itaghon saveenj mbuaan toni ariana to imbua toman nditimbumim. Saveenj tonenen injarua gham paam.

¹² Sawa to ala aneep izi taan tonowen, yam irau ataghon ngar tovene: Ndinatumim aidaba, toman ngai tiam ndinatudi to nditinandi tipoop di muunj, yam aghur di tisob tinim Yoova le. Tovenen ngai tiam ndinatudi nditamoot to tipoop di muunj, arab di tisob timatmaat tinim watoonjrau pa Yoova.

¹³ Eemoghon esele ndinatudi nditamoot to tipoop di muunj, arab di tinim watoonjrau pa Yoova malep. Arabolin di pa sipsip, ve arab sipsip tonenen tinim watoonjrau. Ve ighaze arabolin di pa sipsip maau, ghoru angoor luadi ve timaat. Ve ndinatumim aidaba nditamoot tovene paam. Arabolin di tisob pa sipsip ma mbeb pida, ve agham mbeb tonenen pa Maaron tinim watoonjrau. *Nam 18:15-18, Lu 2:22-23*

14 “Muri, ighaze ndinatumim tighason gham pa ngar tonene pughu, ghoru apaes padi aghaze: ‘Muun, iit tanim mbesoonja sorok izi Isip. Eemoghon Yoova ipatoon tapiri tiina, ve igham ghiit tapul ndug tonowen.

15 Sawa tonenen, kinik to yes Isipa, ngar toni iyaryaan kat ighaze tapul ndug toni malep. Eemoghon Yoova irab yes Isipa ndinatudi aidaba toman ngai todi ndinatudi to nditinandi tipoop di muun, le tisob timatmaat. Tauto aazne, iit tarab ngai toit ndinatu nditamoot to tipoop di muun ne, tisob timatmaat tinim watoonrau pa Yoova. Ve ndinatuud aidaba tinim Yoova le paam. Eemoghon tarab di tinim watoonrau maau. Tarabolin di pa sipsip ma mbeb pida, ve tagham mbeb tonenen pa Yoova tinim watoonrau.

16 Ngar tonene, nene inim ghilaloon to ineep ila nimaad ve ndamood ve ipei mulin ngar toit pa sawa to Yoova ipatoon tapiri tiina, ve igham ghiit tapul ndug to yes Isipa ve tanim. Leso lolood imaagh pani sob, ve mataad ingali irau sawa isob.’ ”

Maaron ipatoon ataam pa yes Israela

17 Sawa to kinik to Isip ipul yes Israela tila, Yoova imuun ve ipatoon di pa ataam. Eemoghon ye igham di titaghton ataam tuku to itaghton taan to yes Pilistia ne maau. Pasa, igham ngar tovene: “Ighaze yes Israela titaghton ataam tuku tonowen, ve tivot to koiadi rikia ve malmal imundig, nene pale titoor ngar todi, ve tighau timuul tila pa Isip.”

18-19 Tauto ipamuul di tilaagh titaghton ataam mala to itaghton ndug balim ve ila ivot Te Kavi-aanja.

Sawa to yes Israela tipul Isip, tigharaat di pataghaan pa malmal ve tilaagh. Ve Mose igham Yosep tua ve tilaagh tomani. Pasa muun kat, Yosep isaav pa yes Israela nditimbudi tovene: “Muri, Maaron pale igham mulin gham ve apul ndug to yes Isipa. Sawa tonenen ighaze ivot, ghoru agham tuag ve alaagh tomani. Leso atavia izi Kanaan.” Ve yes Israela timbua saveen ariana toman Yosep tighaze yes pale titaghon ngar toni tonenen. Tauto Mose mata ingal saveen mbuaan todi tonowen, ve itaghoni. *Mbnp 50:25*

²⁰ Yes Israela tipul ndug Sukot, ve tila tivot ndug balim dige, ghoru atedi izi ndug eez, iza Etam.

²¹ Ndag to naol ne, Yoova ineep ila yaghur tae lolo ve imuun padi, lesu ipatoon di pa ataam. Yaghur tae tonowen mala. Iza ve izi. Ve mbon to naol ne, ye inim yab yama to iyaryaar iza ve isul, lesu ipatoon di pa ataam. Tovenen yes irau tilaagh pa mbon ve ndag.

²² Yaghur tae ve yab yama tonowen tipulpul di maau. Timuunmuun padi pa mbon ve ndag.

14

Yes Isipa tigham taghon yes Israela

¹ Ghoru Yoova isaav pa Mose ighaze:

² “Usaav pa yes Israela titoor di, ve timuul tila tivot naari to ndug Pi Airo. Ndag tonowen ineep ndug Migdol dige to ineep ila pa te, ve igharau ndug Bal Zepon. Tila tivot, ghoru tigharaat inadi izi tonowe ve atedi izi.

³ Lesu kinik to Isip igham ngar ighaze yam asosor pa ataam, ve awalaghlaagh izi ndug balim, ve lemim ataam eta pa aghau maau.

⁴ You pale naghham n̄gar toni iyaryaṅ muul, leso itaghon gham. Sawa to inim peria tiam, you pale napatoon tapirig pani, ve natatani toman ndaaba toni le tisob tilaledi. Leso naghham izag ivot inim tiina, ve yes Isipa tighilaal tighaze: You Yoova nanepneep.” Tovenen yes Israela titaghon saveen to Yoova isavia padi.

⁵ Sawa to tipaes pa kinik to Isip tighaze yes Israela tighau tila wa, yesṅa uraata toni titoor n̄gar todi muul, ve tighaze: “Wai, iit tagham n̄gar to borouṅ! Tapul yes Israela tila pasa? Aazne, sei masin pale tinim mbesoonṅa pait?”

⁶ Tovenen kinik isaav, ve tigharaat hos toman karis toni to malmal. Ve iyou ndaaba toni, leso tila tomani.

⁷ Ve igham karis ariṅadi to malmal toman hos irau 600, ve igham karis toman hos pida paam to yes Isipa, ve yes ndiran to malmal to tindandaloov karis. Ghorō toman ndaaba toni tisob timundig ve titaghon yes Israela tila.

⁸ Sawa to yes Israela tipul Isip, lolodi poia kat, ve tigham n̄gar tighaze Maaron todi ilib pa yes Isipa wa. Tovenen tilaagh toman pakuruun. Eemoghon Yoova igham kinik to Isip n̄gar toni iyaryaṅ muul. Tauto iyou ndaaba toni, ve titaghon yes Israela tila.

⁹ Tovenen yes ndaaba to Isip tigham karis toman hos, ve ndiran pida to malmal, ve titaghon yes Israela tila le tivot todi igharau ndug to yes Israela atedi izi pani. Ineep izi naari to ndug Pi Airoṅ ve ndug Bal Zepon.

¹⁰ Yes Israela matadi ila le tighita kinik to Isip yesṅa ndaaba toni tiṅarua di tinim. Tovenen

matughezaan tiina igham di, ve titan roran Yoova pa iuul di.

¹¹ Ve tinjoon pa Mose tighaze: “Ugham ghei nipul Isip pasa? Vena, naal to yes Isipa irau ghei maau, tauto ughereb ghei ninim ndug balim tonene, lesa nimatmaat izi sualen? *Igham 16:3-4*

¹² Ngar tonene to nimatughez pani. Tauto sawa to tanepneep izi Isip, yei nisaav payom nighaze: ‘Tambaŋa. Upul ghei nineep, ve nigham uraat pa yes Isipa.’ Eemoghon yom uloon ghei maau. Inimale nineep izi Isip ve nimbessmbees padi, tone poia. Eemoghon maau. Aazne, pale nisob nimatmaat izi ndug balim tonene.”

¹³ Eemoghon Mose irab motin saveen todi ighaze: “Amatughez malep. Ayoon ariana! Aazne, yam pale aghita katin ulaan to Yoova. Pasa, ye tau pale ivool tiam, ve igham mulin gham. Yes Isipa to aazne matamim ila padi we, muri pale aghita di muul maau.

¹⁴ Tovenen atemim izi ve aghur matamim moghon. Pasa, Yoova tau pale iparab payam.”

¹⁵ Ghoro Yoova isaav pa Mose ighaze: “Pughu vena to yom utan roran ghou ne? Usaav pa yes Israela timundig tila.

¹⁶ Ghoro uit titi tiom iza, ve upatoonŋa inarua te. Leso te ivalagi. Pida ila pa ŋas, ve pida ila pa waan, ve ighur ataam pa yes Israela, ve tilaagh ila taan mamaasa, ve tivool tila pa dige ite.

¹⁷⁻¹⁸ You pale naghams yes Isipa ŋgar todi iyaryaan ve titaghon gham. Ghoro napatoon tapirig pa kinik to Isip toman ndaaba toni to tilaagh taan, ve yes to tilaan pa hos ve karis, ve natatan di le tisob kat. Leso naghams izag ivot

inim tiina, ve yes Isipa tighilaal tighaze you Yoova nanepneep.”

¹⁹ Ghoru aņela to Maaron to imuņmuuņ pa yes Israela, ipul ina to muņgaan, ve imuul ila pa muridi. Ve yaghur tae mala to imuņmuuņ padi ne paam, imuul ila iyoon izi muridi,

²⁰ ve ineep bodbodaan pa yes Israela ve yes Isipa. Mboņ izi, ve yaghur tae tonowen ndorooma tiina ila pa yes Isipa, ve ghazonņa ila pa yes Israela. Tovenen mboņ tonenen, yes Isipa irau tila tigharau yes Israela maau.

Mbeb gharatoonņa to Maaron ighami izi Te Kavi-aanņa

²¹⁻²² Ghoru Mose iit nima iza, ve ipatoonņa ila pa te, ve Yoova igham yaghur tiina ilaagh pa taan dige to ila pa ndag iza ve inim. Yaghur ilaagh pa mboņ mboņ le ndugizau, ve iviviir te le ivalagi inim ru. Pida ila pa waan, pida ila paņas, ve taan mamaasa ivot. Te dige ru tonowen tiyoon denja tinimale didiņ, ve yes Israela tilaagh ila bodbodaan. Tovenen tilaagh titaghon taan mamaasa tonowen, ve tivoool tila pa dige ite. *1Kor 10:1+; Hib 11:29*

²³ Ghoru ndaaba tisob to Isip toman hos ve karis todi titaghon di tinim tivot izi bodbodaan.

²⁴ Ndag iza ris, ve Yoova ineep ila yaghur tae mala ve yab yama lolo, ve mata izi pa yes Isipa, ve ighamunņgar todi le tiwaghamgham.

²⁵ Ve igham hos toman karis todi aghedi tiptipia, leso tizuar pa landoon. Ve igham karis aghedi ipaspas ve titaptap tizizi. Tovenen yes Isipa tisaav tighaze: “Ee-e, tala malep! Tamuul! Nene Yoova

tau, to ivool to yes Israela ve iparab toman ghiit ne!”

²⁶ Ghoru Yoova isaav pa Mose ighaze: “Uit niamam iza, ve upatoonja ila pa te. Leso te ila ivool muul, ve itatab yes ndaaba to Isip tonowen toman karis ve hos todi, le tisob timatmaat.”

²⁷⁻²⁸ Tovenen ndag ipul te ve iza ris, ghoru Mose iit nima iza muul, ve ipatoonja ila pa te. Ghoru te ipol inim ilupi muul. Yes Isipa to titaghon yes Israela, titoova pa tighau timuul tila. Eemoghon tiraua maau. Te itatab ndaaba to kinik toman karis ve hos todi, le tisob tilaledi. Eta ineep maau. Ataam tonene, to Yoova ipandalin ndaaba tisob to Isip tizila te lolo ve timatmaat.

²⁹ Eemoghon yes Israela tilaagh ila taan maasa to ineep bodbodaan to te, le tivool tila pa dige ite. Te dige ru tonowen tiyoon kat tinimale didiin. Pida ila pa waan ve pida ila pa nas.

³⁰ Nene ataam to Yoova igham mulin yes Israela ila yes Isipa nimadi. Yes Isipa to timatmaat, yes Israela tighita patudi tiwaghengheen taghon naari.

³¹ Onoon kat, Yoova ipatoonj tapiri tiina pa yes Isipa, ve yes Israela tighita pa matadi. Tauto timatughez pa Yoova, ve tighur ila toni. Ve tighur ila to mbesoonja toni Mose paam.

15

Yes Israela tipait Maaron iza ila mboun

¹ Ghoru Mose yesja Israela timbou mboun tonene pa tipait Yoova.

“You pale nambou ve napait Yoova.

Ye iza tiina le tiina kat.

Ye iparab ariana le ilib pa koia.

Ye ipiyaav hos todi toman yes to tilaan padi ne
tizila te lolo ve tilaledi. *Syg 15:3*

² You naghhamgham tapirig ila to Yoova. Tovenen
nambou mbouŋ pa napaiti.
You irau nalaleg. Eemoghon ye igham mulin
ghou.
Ye moghon to Maaron tiou.
Tovenen naghaze napait iza pa poia toni.
Muun, taman imbesmbees pani.
Ve you paam napait iza izala le izala kat. *Mbo
118:14*

³ Tiina tiou, ye ŋgeu ariana to malmal.
Iza Yoova. Ye inepneep irau sawa isob. *Igham
3:14*

⁴ Ye ipiyaav kinik to Isip ndaaba toni toman karis
todi tisob tizila te lolo ve tilaledi.
Ve yes daba to tiraua kat pa malmal, yes
paam tighun te ve tisob timatmaat izi Te
Kaviaana.

⁵ Te itatab di ve tindal tizila tinimale yaam.
Tizila kat to mazovan bibiliina lolo we.

⁶ O Yoova, nimam waan, nene tapiri tiina le tiina
kat.
Nimam waan irab mbirisan koiamna le
tilaledi.

⁷ Yom izam tiina kat. Ulib pa mbeb tisob.
Koiamna to timundig tighaze tizoor ghom,
yom ureu mbirisan di.

Upatoon mbalmbali tiom padi, ve iwaghamun di inimale yab ighan kikiliin gorgori.

⁸Yom atem yabyab padi kat. Tauto ugham yaghur tiina imundig ve ivalag te. Pida ila pa rjas, ve pida ila pa waan.

Dige ru tonowen tingud tiza ve tiyoon kat tinimale didiin.

Te to mazovan iyoon le iyaryaan.

⁹Koiamai tigham tinidi tighaze:

‘Yei pale nigham taghon yes Israela le nikis di. Ghoru niyou mburuguun todi tisob, ve nirei di irau ghei.

Sa patajani to nighaze nigham padi, nene pale nighami moghon.

Tovenen yei pale nipas buza tiei, ve nipatoon tapirimai padi, ve nireu mbirisan di.’

¹⁰Eemoghon Yoova, yom uvib avuvum inim yaghur ve iviviir te.

Tauto itatab di le tisob tindal tizila mazovan lolo rikia moghon tinimale yaam to patajani le patajani kat.

¹¹Yoova, sa maaron to irau ghom? Eta maau.

Yom paghunam ve patabuan kat.

Ve ugham uraat tintina toman mbbeb ghara-toonadi.

Tauto tamtoghon timatughez payom, ve tipait izam. *Igham 8:10; Mbo 86:8; Syg 4:8*

¹²Yom urab koiamja pa nimam waan, ve ugham taan avo ikaak, ve itoon di tisob.

- 13 Yoova, yom lolom ineep tunja ila to tamtoghon tiom, ve uluul di itaghon saveen mbuaan tiom.
Tauto uvool todi, ve ugham mulin di pa patañani todi.
Ve yom umuun ve upatoon ataam padi.
Tovenen yom pale ungin di pa tapirim ve ugham pooz padi, le tila tivot izi inam patabuañ to nepoon.
- 14 Yes ndug ndug tiloon uraat tiom varu, le ruñadi iza pani ve lolodi imbumbu.
Matughezaan tiina igham yes Pilistia ve tisañeen.
- 15 Ve daba tisob to Edom paam, matughezaan tiina igham di.
Yes pooza to Moap tiloon varum, le tinidi irur, ve lolodi imbumbu.
Ve yes Kanaana tapiridi isob kat ve tinidi imatmaat.
- 16 O Yoova, yes tiwatag: Tapirim, nene tiina kat.
Tauto matughezaan tiina igham di, ve lolodi imbumbu.
Yom taum ugham mulin yei Israela ve ninim lem kat.
Tovenen ndug ndug tineep moghon tinimale yaam,
ve timbatut ghei, ve nimbut naghodi ve nila nigham taan tiei.
Irau tigham mbeb eta payei maau.

17 O Yoova, yom ugham ghei ninim nineep pooi izi lolooz tiom. *

Lolooz tonene, nene inam patabuanj to nepoonj.

Pasa, yom upayoon rumai tiom izala. *Mbo 78:54+, 80:8*

18 Yoova, ye kinik tiina kat.

Ye pale igham pooz itaghoni taghoni gha ila.”

Mbouj to Miriam

19 Tovenen Yoova ivalag Te Kaviana, ve pida ila pa nas ve pida ila pa waan, ve yes Israela titaghon taan mamaasa to ineep bodbodaan, ve tivool tila pa dige ite. Eemoghon sawa to ndaaba to kinik tigham hos ve karis todi, ve titaghon di, Yoova igham te ila ivool muul, ve itatab di.

20 Aron livu Miriam, ye propet liva eez. Ye igham kakaap toni ve imuuj, ve ndiliva tisob to Israel anadi tigham kakaap todi ve titaghoni, ve yesna tigham narogho.

21 Ve Miriam iit mbouj tonene padi ighaze:

“Ambou ve apait Yoova.

Ye iza tiina le tiina kat.

Ye iparab ariana le ilib pa koia.

Hos todi toman yes to tilaan padi, ye ipandalin di tizila te lolo ve tilaledi.”

Ya papaii

* **15:17:** Maaron lolooz toni, nene lolooz Zion to ndug Yerusalem ineep izala.

²² Muri ghoru, Mose isaav pa yes Israela, ve timundig tillaagh muul. Tipul naari to Te Kavi-aana, ve tillaagh tiloon tila pa ndug balim to tiwaata tighaze ‘Sur.’ Tillaagh izi tonowe irau mbon tol, eemoghon tindeen ya eta maau.

²³ Ghoru tivot ndug kanaanen eez, iza Mara. Ndug tonowen, ya inepneep. Eemoghon ya tonowen papaii. Tovenen yes Israela irau tighuni maau. Pughu tonene to tiwaat ndug tonowen iza tighaze ‘Mara.’ †

²⁴ Yes Israela timundig ve tinoon pa Mose tighaze: “Ai, ngarsuamai imamaas kat wa. Pale nighun sa?”

²⁵ Tovenen Mose itan roran Yoova pa ulaan, ve Yoova ipatoon ai suruvu eez pani. Mose igham ai tonowen ve ipiyaava izila ya, le ya ipapa muul maau, ve yes irau tighun.

Tinepneep tonowe, ve Yoova ighur tutuun pida padi ve ipatoon di pa ataam to titaghoni leso tillaagh denja ila mata. Ye igham tovene pa itoov di. Leso ighita: Pale titaghon katin alina, ma maau?

²⁶ Ye isaav padi ighaze: “You Yoova, Maaron tiam. Aloon alinag ve ataghoni, ve agham ngar to denja moghon ila matag. Ighaze aghur poian talinamim pa tutuun tisob to naghur di, ve ataghon katin di, nene you irau naghur moroghoon samia eta payam inimale naghama pa yes Isipa ne maau. Pasa, you Yoova to nagharaat gham pa moroghoon tiam ve tinimim popoia.” *Mbo*
103:3

²⁷ Ghoru yes Israela tillaagh tila tivot izi ndug Elim. Ndug tonowen, le taan saambu saangul ve ru

† **15:23:** Saveen ‘mara,’ pughu tovene: ‘papaii.’

to ya ivotvot padi. Ve ai det tamoot tol saangul (70) titub tonowe paam. Ai tonowen anonadi poia pa ghaniin. Tovenen tigharaat inadi tonowe, ve atedi izi.

16

Yes Israela pitool di ve tinooñ pa Mose yesuru Aron

¹ Muri ghoru, yes Israela timundig ve tipul ndug Elim, ve tilaagh tila tivot ndug balim to iza ‘Siin.’ Ndug tonowen ineep bodbodaan pa Elim ve Sinai. Sawa to tipamundigin laghoon todi izi Isip ve tila tivot izi Siin, yes tilaagh irau kaiyo eez ve mbon saangul ve liim wa.

² Tinepneep tonowe, ve ival tiina to Israel tinooñ pa Mose yesuru Aron muul tighaze:

³ “Inimale Yoova irab ghei nimaat izi Isip pataghaan, tone poia! Pasa, sawa to nineep tonowe, nepoon tiei poia kat. Nindaad ghei ninepneep, ve nighanghan aniin tiina toman ziga le apomai isun. Vena, yamru aghaze arab ghei nimatmaat pa pitool, tauto aghereb ghei ninim ndug balim tonene?”

Igham 14:11

⁴ Tovenen Yoova isaav pa Mose ighaze: “Aazne ve ila, you pale naghama aniin itap sambam ve izilat payam. Mbonmaagh to naol ne, pale itap sambam ve izilat. Tovenen ighaze yam ala ayoun amim, ayoun tiina malep. Ayoun irau to aghan pa ndag ee moghon. You naghama tovene pa natoov gham. Leso naghita: Pale ataghon alinag, ma maau?”

Yo 6:25+

⁵ Ighaze uraat inim liim ve eez, ghoru ayou tiina ris, irau to aghani pa ndag ru, ve anazi pataghaan ve ineep.”

⁶⁻⁷ Tovenen Mose yesuru Aron tisaav pa tamtoghon tisob to Israel tighaze: “Yei nigham sa, to atemim yabyab ve ayou avomim payei? Yei nisaav to tanim ne? Yam aṅooṅ payei, eemoghon Yoova iloon ṅoṅaan tiam wa. Tovenen rabrab izi, ghoru ye pale igham ṅgar eta payam. Leso awatag kat aghaze ye tau, to igham gham apul Isip ve anim sualen. Ve ndugizau, ghoru ipatoṅ tapiri ve poia toni payam, ve aghita pa taumim matamim.”

⁸ Ghoru Mose isaav padi muul ighaze: “Yei sei, to aṅooṅ payei? Sawa to ayou avomim payei, yam aṅooṅ payei maau. Aṅooṅ pa Yoova. Ve ṅoṅaan tiam tonanan, ye iloonṅa wa. Tovenen rabrab izi, ghoru ye tau pale igham amim man pa aghan. Ve mboṅmaagh, ghoru igham amim aniin, lesa aghan ve apomim isuṅ.”

⁹ Ghoru Mose isaav pa Aron ighaze: “Ula usaav pa yes Israela tovene: ‘Yoova iloon ṅoṅaan tiam wa. Tovenen yam asob anim alup gham ila Yoova nagho.’ ”

¹⁰ Aron isavsaav pa ival tiina to Israel, ve matadi ila pa ndug balim, le tighita Yoova ṅguruba isul ila yaghur tae lolo.

¹¹ Ghoru Yoova isaav pa Mose ighaze:

¹² “ṅoṅaan to yes Israela, you naloona wa. Tovenen usaav padi: Rabrab ndag izila goronia, ghoru adi aniin ziga izilat. Ve bozo pale aniin izilat, ve tighan le apodi isuṅ. Leso tiwatag kat tovene: You Yoova, Maaron tiam, nanepneep.”

Yoova ipan yes Israela pa aniiḡ manna ve man

¹³ Yes Israela tineep le rabrab izi, ghoru man katindi tivot le ndug to tineep pani ne man moghon. Mboḡ le ndugizau, ve waam izi irau ndug to tineep pani. *Mbo 78:27+*

¹⁴ Waam imamaas, ve yes Israela tighita mbeb pisosooḡa itatab ndug todi. Ghitooḡa inimale iigh anuvu.

¹⁵ Tighita mbeb tonowen, ve tikankaan pani. Tovenen tiwaghasonin di tighaze: “Nene sa?”

Mose isaav padi ighaze: “Nene aniiḡ to Yoova igham payam pa aghani.” *Yo 6:31; 1Kor 10:3*

¹⁶ Ve ye ighur tutuunḡ payam tovene: Tamtoghon piiz to tilup di ila mbeez ee moghon, nene tipavonin uur gegegeu eḡaḡa le irau di. Atedi imot pa youḡ aniiḡ malep.

¹⁷ Tovenen yes Israela tila, ve tiyou adi aniiḡ. Pida tiyou tiina, ve pida tiyou ris.

¹⁸ Eemoghon sawa to titoov aniiḡ ve tighita piiz to tigham di, nene tighita yes tisob adi aniiḡ irau di. Tovenen yes to tiyou tiina, tighan le tipasobi. Avodi alulu rita ineep maau. Ve yes to tiyou rismoghon, tovene paam. Timbool maau. Tighan le apodi isunḡ. Tovenen aniiḡ to tiyou di, nene irau di. *2Kor 8:15*

¹⁹ Mose isaav padi ighaze: “Aniiḡ tonene, aghani le isob. Aghur pida inim ḡaar pa bozo malep.”

²⁰ Eemoghon tamtoghon pida tizoor Mose aliḡa, ve tighur aniiḡ pida inim ḡaar. ḡaar todi tonowen ineep le ndugizau, ve iḡaraanḡ. Ve tighita motmoot tineep ila. Mose ighita ḡaar to tighami, le ate yabyab kat.

²¹ Tovenen mbonjmaagh to naol ne, yes Israela tilala ve tiyouyou adi aniiñ irau di. Ve aniiñ pida to tipuli izi ineep ila taan, sawa to ndag iza inim ve ndug ituntun, nene ireer ve ilale.

²² Ve ndag inim liim ve eez, nene tiyou aniiñ irau to tighan pa ndag ru. Tovenen nginiija to yes Israela tila tighita Mose, ve tipaesia mbeb tonenen pani.

²³ Ye isaav padi ighaze: “Aloñ. Yoova isaav tovene: Bozo, nene umbom patabuanj. Tovenen iit irau ateed izi. Irau tagham uraat eta maau. Tovenen aazne, yam atar taumim pa amim aniiñ pataghaanj. Ighaze anazi, ma amozi, nene ineep to yam taumim. Aghan pida aazne, ve pida ineep pa bozo.”

Igham 20:8+

²⁴ Tovenen yes Israela titaghon Mose aliña, ve tighur aniiñ todi pida inim ñaar. Mbonj le ndugizau, ghoru tighita ñaar todi tonowen poia. Injaraan maau, ve motmoota maau.

²⁵ Mose isaav padi ighaze: “Aazne, yam irau aghita aniiñ eta ineep izala taan pogho maau. Pasa, nene umbom patabuanj to Yoova ighuri pait leso ateed izi. Tovenen aghan aniiñ to noor aghuri inim ñaar ne.

²⁶ Ndag inim eez, ila imuul ndag inim liim ve eez, aniiñ pale ivotvot tovene, leso ayou amim. Eemoghon ndag inim liim ve ru, nene pale maau. Pasa, nene umbom patabuanj to Yoova ighuri pait, leso ateed izi.”

²⁷ Eemoghon tamtoghon pida tizoor Mose aliña. Ndag inim liim ve ru to umbom patabuanj, yes tila tighaze tiyou adi aniiñ. Eemoghon matadi ines le maau.

28 Tovenen Yoova isaav pa Mose ighaze: “Yam taliŋamim maau? Pale ŋeez o apul ŋgar tiam to zo-raaŋ saveeŋ, ve ataghon katin saveeŋ tiou toman tutuunŋ tiou?”

29 Aghita. You naghur umbom patabuanŋ payam, leso inim lemim sawa to atemim izi. Tovenen wik to naol ne, ndag inim liim ve eez, ghero you pale naghām amim aniinŋ to irau pa ndag ru pataghaanŋ. Ve ndag to inim liim ve ru, ghero yam asob aneep moghon ila inamim. Ala ndug eta malep.”

30 Tauto ndag inim liim ve ru, yes Israela titaghon Maaron aliŋa tonenen, ve atedi izi.

31 Aniinŋ to Yoova igham pa yes Israela, tiwaata tighaze ‘manna.’ *

Aniinŋ manna, nene pisosooŋa ve ghitoonŋa inimale mbeb pida uvedi. Ve ghaniinŋa poia kat, inimale palawa to titoora toman bagil suru.

32 Mose isaav pa yes Israela muul ighaze: “Yoova isaav arianaŋ pait ighaze tagham uur eez, ve tapavonini pa aniinŋ manna tonene, ve takisi ineep. Leso inim matamuri pa papaghu toit to muri pale tivot. Ighaze tighita, yes pale tiwatag: Sawa to Yoova igham nditimbudi tipul Isip ve tilaghlaagh izi ndug balim, ye ipanpan di pa aniinŋ tovene.”

33 Tovenen Mose isaav pa Aron ighaze: “Ugham uur eta, ve ula upavonini pa aniinŋ manna. Le isob, ghero ughuri ineep izi Yoova naghō. Leso takisi ineep tovene itaghoni taghoni gha ila.”

34 Tovenen Aron itaghon saveeŋ tonenen, ve ighur manna pida ila uur, ve tighuri ineep izi

* **16:31:** Saveeŋ ‘manna,’ pughu tovene: ‘Nene sa?’

Bokis to Saveen Mbuaan nagho inim matamuri.

Hib 9:4

³⁵⁻³⁶ Yes Israela tighanghan aniin manna irau ndaman tamoot ru. Tineep ila manna moghon le irau tila tivot taan Kanaan dige. Ghoru aniin tonenen izi muul maau.

17

Yoova igham ya ivot ila yaam

¹ Ghoru ival tiina to Israel tipamundigin laghoon todi muul. Tipul ndug balim to iza ‘Siin,’ ve tilaghlaagh titaghon Yoova aliya. Tighamgham tovene le tila tivot ndug eez, iza Repidim. Ghoru atedi izi tonowe. Eemoghon ndug tonowen, ya maau.

² Tovenen tiioon pa Mose tighaze: “Ughita amai ya ve nghun lak!”

Mose ipamuul alinadi ighaze: “Pughu vena to atemim yabyab ve anoon payout? Yam aghaze atoov Yoova tapiri?”

Nam 20:2+

³ Eemoghon Israela murun di le tisami kat. Tovenen tiyou avodi pa Mose tighaze: “Pughu vena to ugham ghei nipul Isip, ve ughereb ghei ninim sualen? Ughaze yeiya ndinatamai ve ngai tiei nisob nimatmaat pa ya izi sualen?”

⁴ Tovenen Mose itan roran Yoova ighaze: “O Yoova, ughita. Paam tamtoghon tonene tirab ghou pa yaam! Pale naghama vena padi?”

⁵⁻⁶ Yoova ipamuul Mose aliya ighaze: “Ugham ndolman pida to yes Israela, ve yamya amuun anim tiou izi lolooz Sinai pughu. Sawa to unum, matam ingal titi tiom to ulos ya Nil pani, ve ukisi. You pale naneep izala yaam tiina eez pogho, ve

nasaan gham. Yam anim avot, ghero ugham titi tiom ve ulos yaam to nanepneep izala pogho. Ya pale ireer ivot pani, lesa ival tiina to Israel tighun.” Tovenen Mose igham ndolman pida ve yesna tila, ve tighita Mose ilos yaam tiina tonowen pa titi toni itaghon Yoova aliya, ve ya ireer ivot. *Yo 4:14; 1Kor 10:4*

⁷ Ndug tonowen, Mose iwaat iza ighaze ‘Masa’ ve ‘Meriba.’ *

Pasa, sawa to yes Israela tineep tonowe, tiyoon pani, ve titoo Yoova tighaze: “Ye ineep toman ghiit onoon, ma maau?” *Hib 3:8*

Yes Israela tiparab toman yes Amaleka

⁸ Yes Israela tinepneep izi ndug Repidim, ve yes Amaleka tinim tighaze tiparab toman di.

⁹ Tovenen Mose isaav pa Yosua ighaze: “Uvureer tamtoghon toit pida to tiraua kat pa malmal, ve yamna agharaat gham. Lesa bozo ala aparab toman yes Amaleka. You pale nakis titi to Maaron, ve nazala nayoon izala ndug mbuza tonowen.”

¹⁰ Tovenen Yosua itaghon Mose aliya, ve igham yes Israela ve tila tiparab toman yes Amaleka. Ve Mose yesuru Aron ve ngeu ite, iza Hur, yes tol tizala tiyoon ila ndug mbuza.

¹¹ Sawa to Mose ikaak nima ru iza, yes Israela tilib pa yes Amaleka. Eemoghon sawa to nima ipaspas ve izi, ghero yes Amaleka anadi tilib pa yes Israela.

¹² Mose ikaak nima iza ila ila le nima ipaspas kat. Tovenen Aron yesuru Hur tighita yaam eez,

* **17:7:** Saveen ‘Masa’ pughu: ‘tovaan.’ Ve saveen ‘Meriba’ pughu, nene ‘nojan.’

ve tighur Mose mbole izala. Ghoro tiit nima ru iza, ve eez ipalot nima waan, ve ite ipalot nima ŋas. Tupaloti tunja ve nima inepneep sala tovene le ndag izila.

¹³ Tauto Yosua yesŋa yes Israela tiparab ariana pa buza todi le tilib pa yes Amaleka.

¹⁴ Ghoro Yoova isaav pa Mose ighaze: “Uloon, Muri, you pale napasob yes Amaleka pa taan, le irau tamtoghon matadi ingal di muul maau. Alinag tonene, umbooda ila rau. Leso yes Israela matadi ingal itaghoni taghoni gha ila. Ve usaav ariana pa Yosua, lesa mata kisini paam.”

¹⁵ Yoova isavsaav le isob, ghoro Mose igharaat artaal eez, ve iwaat iza ighaze: “Yoova, ye pilak tiou.” †

¹⁶ Ve Mose isaav muul ighaze: “Yes Amaleka tigham tinidi ve tipatoon nimadi pa Yoova. Tovenen ye tau pale iparab toman di itaghoni taghoni gha ila.”

18

Yetro inġig rawa Mose

¹ Mose rawa Yetro, ye ŋgeu to ighamgham uraat pa watoonrau to yes Midiana. Ye ineez izi ndug toni, ve iloon Mose yesŋa tamtoghon toni Israela varudi pa uraat tintina naol to Maaron igham padi, ve ataam to Yoova igham di tipul taan to yes Isipa.

† **17:15:** Ndaaba, yes ledi uli bodeeŋa (o pilak) to inim ghilaloon padi. Sawa to tila pa malmal, tikis pilak todi tonowen, ve tilaagh tomani. Ighaze tiparab toman koiadi le tilib padi, ve timuul tinim, nene titirtir pilak todi toman tinidi iza, lesa ival tiina tiwatag tighaze tilib pa koiadi wa.

²⁻⁴ Tovenen ighaze ila ighita Mose. Sawa tone-
nen, Mose azuwa Sipora toman ndinatu ru tinep-
neep toman Yetro. Pasa, Mose ighur di tila tineep
tomani muun wa. Tovenen sawa to Yetro imundig
ila pa ighita rawa, ye igham di ve yesna tila.

Mose ndinatu ru. Eez iza Gersom, ve ite iza
Eliezer. Izadi tonene, ledi pughudi. Sawa to natu
aidaba izi, Mose isaav ighaze: “Muun, naneep
nanim loom to ipul tau ndug toni.” Tovenen iwaat
natu olman iza Gersom. Ve sawa to tipoop natudi
ite, Mose isaav ighaze: “Maaron to taman iuul
ghou ve ipaghau ghou pa kinik to Isip buza toni
mata.” Tauto iwaat natu muria iza Eliezer. *
Igham 2:21+; Mbanj 7:29

⁵ Tovenen Yetro igham Mose azuwa toman ndi-
natu ru, ve yesna tila tivot to Mose izi ndug balim
to igharau Maaron lolooz toni. Sawa tonenen, yes
Israela atedi izi tonowe.

⁶ Yetro imbaan ila pa rawa Mose ighaze: “You
nagham azuwam toman ndinatum ru ve yein
nanim nivot wa.”

⁷ Mose iloon saveen tonene, ve imundig ila ig-
haze ighita rawa. Ila ivot todi, ve itud pa Yetro in-
imale pakuruunji. Ghoru iyanjin pani, ve tiwagha-
sonin di pa nepoonadi, Le isob, ghoru Mose igham
di tila pa mbeez toni.

⁸ Mose ipaes pani pa patajani naol to Yoova
ighur di pa kinik toman ival tiina to Isip, pa iuul
yes Israela. Ve ipaes pani paam pa patajani naol
to tivot pa yes Israela izi ataam luvuna, ve ataam
to Yoova igham mulin di pa patajani todi.

* **18:2-4:** Pisis Gersom, pughu tovene: ‘loom to nowe.’ Ve pisis
Eliezer, pughu tovene: ‘Maaron iuul.’

⁹ Yetro iloon saveen toni, le lolo poia kat pa ngar popoia naol to Yoova ighamgham pa yes Israela, ve ataam to igham mulin di ila yes Isipa nimadi.

¹⁰⁻¹¹ Tovenen isaav pa Mose ighaze: “You napait Yoova pa poia toni! Muun, sawa to yam aneep ila kinik to Isip toman tamtoghon toni sambadi, yes titatan gham ve tigham samin gham kat. Eemoghon Yoova igham mulin gham ila nimadi wa. Tovenen aazne, you naghilaal kat naghaze: Yoova, ye ilib pa ndimaronna tisob!” *Igham 15:11*

¹² Ghoru Mose rawa Yetro igham mbeb pida, ve irab di tinim watoonrau pa Maaron. Ye igham dodoli eez ila yab ighan suvuni, ve imoz pida, leso tamtoghon tighan ve yesna Maaron tilup di tinim ee moghon. Tovenen Yetro, Mose ve Aron toman ndolman to yes Israela tisob tilup di ila Maaron nagho pa sunuun toman ghanghaniin. *Igham 24:5*

Tighur tamtoghon pida leso tiuul Mose pa uraat to ghamuun pooz

¹³ Mbon ndugizau, ghoru Mose ipamundigin uraat toni to gharatoon patanani to tamtoghon. Ival tiina tiyondyood luvutini, ve tيسانani pa igharaat saveen todi to mbonmaagh le ila rabrab izi.

¹⁴ Yetro ighita uraat to rawa Mose ighamghami pa iuul yes Israela, nene tiina kat. Tovenen isaav pani ighaze: “Wai, yom ughamgham sa pa yes tamtoghon tonene? Pughu vena to engengom ugharaat saveen todi? Ughita. Ival tiina tonene tiyondyood luvutin ghom ve tيسانan mbonmaagh le ila rabrab izi.”

15 Mose ipamuul aliņa ighaze: “Tamtoghon tig-haze tiwatag ngar to Maaron lolo pani. Tauto tinim tiou.

16 Ve ighaze tiwazoran di pa saveeņ eta, nene tinim tiou, leso nalooņ pataņani todi ve nagharaata. Ve you leg uraat to napatoot di pa Maaron aliņa ve tutuuņ toni paam.”

17 Tovenen rawa Yetro isaav pani ighaze: “Nene poia. Eemoghon naghita ataam to utaghoni pa uraat tiom, nene pataņani.

18 Pasa, uraat tonene, tiina kat. Engengom irau uraua maau. Pale unoknoki tovene le tapirim isob. Ve tamtoghon paam, pale tisaņan tisaņan le saņaniņ isooņ di.

19 “Ulooņ. You naghaze nauul ghom pa ngar pida, leso uraat tonene iraurau payom. Ataam to naghaze nasavia payom, ighaze utaghoni, nene pale Maaron ineep toman ghom, ve iuul ghom pa uraat tiom. Yo, ighaze tamtoghon pida tiwazoran di pa mbeb eta, yom irau ugham naghodi, ve usavia pataņani todi ila to Maaron. Ve sa saveeņ to ighaze ye isavia payom, ghoru upaesia padi.

20 Ve yom irau upatoot di pa Maaron aliņa ve tutuuņ toni. Ve upasalungan di, leso laghooņ todi poia ila Maaron mata, ve titaghon ngar to ye lolo pani.

21 Ve yom irau uņgabiiz poian tamtoghon tisob to Israel, ve uvureer tamtoghon popoiadi pida, leso tiuul ghom pa uraat to nginiņ ival tiina tonene. Yes to avodi kaarom, ma matadi mbeb, ughur di malep. Ughita yes to avodi onoon, ve timatughez pa Maaron ve titaghon ngar toni, ghoru ughur di tiuul ghom pa uraat. Ughur pida tinņin tamtoghon

ndiḡndiḡ ndiḡndiḡ eez (1000), pida tiḡgin tamoot liim (100), pida tiḡgin tamoot ru saanḡul (50), ve pida tiḡgin tamtoḡhon saanḡul moghon. *Mbanj 6:3*
²² Uraat to gharatoḡ saveeḡ ve pataḡani to tamtoḡhon, nene pale inim daba tisob tonenen ledi uraat, ve tighamghami tovene itaghoni gha ila. Yes pale tigharaat saveeḡ raurau, leso tiuul ghom pa uraat tonene ve iraurau payom. Eemoghon saveeḡ pataḡani, nene yes irau tipuli ilat nimam, leso taum ugharaata.

²³ Ngar tonene, Maaron ighaze yom utaghoni. Ighaze ugham tovene, nene pale uraat ipataḡan payom kat maau. Ve tamtoḡhon tisob to tilat toman pataḡani todi, pale timuul tila pa inadi toman lolodi poia.”

²⁴ Mose ilooḡ rawa aliḡa, ve itaghon ḡgar isob to ye isavia.

²⁵ Ye iḡgabiiz tamtoḡhon tisob to yes Israela, ve ivureer yes to ledi ḡgar popoia ve tirau uraat to ghamuun pooz, ve ighur di tinim daba, leso tiuuli pa uraat to gharatoḡ saveeḡ. Pida tiḡgin tamtoḡhon ndiḡndiḡ ndiḡndiḡ eez (1000), pida tiḡgin tamoot liim (100), pida tiḡgin tamoot ru saanḡul (50), ve pida tiḡgin tamtoḡhon saanḡul moghon.

²⁶ Tovenen ndag to naol ne, yes tilooḡ saveeḡ to tamtoḡhon, ve tighagharaat pataḡani todi ḡgiira ḡgiira. Eemoghon pataḡani tintina, nene tipul di tila Mose nima, leso tau igharaat di.

²⁷ Yetro ineep ris toman Mose, ghoru Mose ighuri imuul ila pa ndug toni.

Yes Israela tila tivot lolooz Sinai pughu

¹⁻² Yes Israela timundig muul ve tipul ndug Re-
pidim, ve tilaagh tila tivot izi ndug balim Sinai.
Laghoon todi to tipul Isip ve tinim, nene tigham
kaiyo ru wa. Ve ite inim tol pani, ndag inim mata,
ghoro tila tivot izi lolooz Sinai pughu, ve atedi izi
tonowe.

³ Mose ipul di tineep, ve izala pa lolooz, leso
yesuru Maaron tisavsaav. Yoova ineep lolooz
daba, ve imboob izila pani ighaze: “Usaav pa yes
Israela to papaghu to Yakop ne tovene: *Mban 7:38*

⁴ ‘Ngar to you naghama pa yes Isipa, yam Israela
aghita pa taumim matamim wa. Yam awatag: You
nambaad gham inimale manbog imbaad ndinatu
izala bage, ve naghama gham anim avot tiou izi
sualen.

⁵⁻⁶ Aazne, ighaze yam aloon aliḡag, ve matamim
inḡal saveen mbuaan tiou, ve ataghon katin tu-
tuḡa, nene pale anim leg kat, ve itiḡa talup ghiit
tanim ee moghon. Onoon, taan isob toman tam-
toghona, nene you tiou moghon. Ve yam ghoru,
taug nasia gham, ve naghama gham anim leg kat.
You naghaze yam asob aneep ila pooz tiou samba,
ve ambees payou animale ndiran to watoonrau.
Lesu anim tamtoghon tiou patabuanḡa.’ ” *Tit 2:14;*
1Pe 2:9; Syg 5:10

⁷ Yoova isavsaav le isob, ghoru Mose imuul izila
to yes Israela. Ila ivot todi, ve ipoi ndolmana todi
tinim tilup di, ve ipaesia Yoova aliḡa isob tonenen
padi.

⁸ Yes tiloon saveen toni, ve tisob tilup avodi
tighaze: “Poia, saveen isob to Yoova isavia, yei

pale nitaghoni.” Tovenen Mose imuul izala to Yoova, ve ipaesia yokiin todi pani. *Igham 24:3*

⁹ Yoova isaav pani ighaze: “Uloon! You pale naneep ila yaghur tae asosoonja lolo ve nalat tiom, ve nasavsaav toman ghom ve ival tiina tiloonja. Leso tighur ila saveen tiom ve titaghoni taghoni gha ila.”

¹⁰⁻¹¹ Mose ipaesia yes Israela alinadi pa Yoova le isob, ghoru Yoova isaav pani ighaze: “Umuul uzila, ve usaav padi tovene: Aazne ve bozo, yes irau timen nonogiiija todi ve tigharaat di, lesu tingalaan ila matag, ve tisaanan. Pasa mbonru, ghoru yes Israela pale tisob tighita ghou nazi nanim ve naneep izala lolooz Sinai daba.

¹² “Tovenen ungun sanguyan iluvut lolooz pughu, lesu tamtoghon tineep sagan. Ve usaav ariana padi, lesu tiza tinim lolooz sob, ve titut lolooz pughu rita malep. Ighaze tamtoghon eta ilaagh inim le ivazag lolooz pughu, yam arabi imaat.

¹³ Ve ataam to rabuun, nene arabi pa nimamim malep. Aneep sagan, ve arabi pa yaam, ma avanegi. Tovenen ighaze tamtoghon eta, ma ngai eta itut lolooz pughu, nene irau ineep maau. Yam arabi imaat. Saveen tonene pale ineep tovene le irau aloonjavuur itan le mala, ghoru yam irau azala lolooz.” *Hib 12:20*

¹⁴ Yoova isavsaav le isob, ghoru Mose ipul lolooz daba, ve imuul izala to yes Israela, ve isaav padi ighaze timen nonogiiija todi ve tigharaat taudi, lesu tingalaan ila Yoova mata, ve tisaanan.

¹⁵ Ve ipaes padi ighaze: “Aazne ve bozo, yam agharaat taumim ve asaan. Agheen toman

ndiliva malep. Pasa mbonru, ghoru Yoova izi inim.”

Maaron ivot to yes Israela

¹⁶ Tinepneep le mbon ru isob, ve mbonmaagh, ghoru yaghur tae asosona inim ikau lolooz daba. Ve ndug milia, ve lalaav irabrabi. Ve mbeb eez itan inimale tavuur, eemoghon avolutu tiina kat. Tovenen yes Israela tisob timatughez le tapiridi isob.

¹⁷ Mose igham di tipul ndug todi to nepoon, ve tila tiyoon tigharau lolooz pughu, leso yesna Maaron tilup di.

¹⁸⁻¹⁹ Ghoru Yoova izi inim toman yab tiina izala lolooz Sinai daba, ve mbuas tiina ikau lolooz le tighita muul maau. Ve yongyoog tiina itok, le lolooz katkatia ilala ininim. Ve mbeb to itan inimale tavuur, itantan ve indurnduur inim inim le avolutu ivot inim tiina kat.

Ghoru Mose isavsaav toman Maaron. Ve sawa to Maaron ipamuul saveen toni, aliya inimale lalaav avolutu.

Mbo 29:3+; Hib 12:18+

²⁰ Tovenen Yoova izi inim ineep izala lolooz Sinai daba, ve ipoi Mose ighaze izala toni tonowe.

²¹ Tovenen Mose izala toni, ve Yoova isaav pani ighaze: “Umuul uzila, ve uveivei pa ival tiina tovene: Tizoorndug pa tiza tinim tighita ghou malep. Pasa, ighaze tiza tinim, nene pale tamtoghon katindi timatmaat.

²² Yes ndiran to watoonrau paam. Ighaze lolodi tighaze tinim tigharau ghou, nene yes irau tigharaat taudi le tingalaan kat. Le isob, ghoru tinim tivot tiou. Ighaze tigharaat taudi maau, nene pale ateg yabyab padi, ve narab di tilaledi.”

²³ Mose isaav pa Yoova ighaze: “Tamtoghon eta irau iza inim lolooz tonene maau. Pasa, yom taum usaav ariana payei ughaze ningun sanguyan iluvut lolooz pughu, lesu tamtoghon tighita lolooz tonene inimale ndug patabuan ve tiroron pani.”

²⁴ Yoova isaav pani muul ighaze: “Poia. Umuul uzila ugham togham Aron, ve yamru moghon aza anim. Eemoghon yes ndiran to watoonrau toman ival tiina to Israel tizoornug pa tiza tinim tighita ghou malep. Ighaze tiza tinim, nene pale ateg yabyab padi, ve narab di tilaledi.”

²⁵ Yoova isavsaav le isob, ghoru Mose imuul izila, ve ipaesia aliña pa yes Israela.

20

Tutuun Saangul

¹ Maaron isavia saveen isob tonene inarua yes Israela enaena ighaze:

² “You Yoova, Maaron tiom. Muun, yom unum mbesoona sorok izi taan to Isip. Eemoghon you naghm mulin ghom, tauto upul ndug to patanani tonowen.

³ Yom irau umbees pa you engengou. Ughur maaron ite paam imuun payou ve umbees pani malep.

Mk 12:30; Lu 10:25+

⁴ “Ve ugharaat mbeb eta ve ughuri inim Maaron payom malep. Sa mbeb to tineep sambam, taan, ve te lolo, ugharaat eta nagho, ve ughuri inim maaron payom, ve umbees pani malep. * *Igham*

* **20:4:** Tutuun tonene, ngara tovene: Iit irau tagharaat mbeb eta, ve taghaze Maaron nagho raraate tovene ne maau. Pasa, mbeb eta to taan nagho inimale Maaron maau. Yesu moghon to ipatoon katin Maaron nagho pait (Yo 14:9).

34:17; 1Kor 10:14; 1Yo 5:21; Syg 21:8

⁵⁻⁶ Uput aghem pa mbeb eta tovene ve umbees pani malep. Pasa, you Yoova moghon, to Maaron tiom. Matag pariuun. Naghaze tamtoghon tiou timbees pa you engengou moghon. Yes to tighur koi payou, nene pale matag kisin sosor todi, ve naghur atia iza to yes taudi, toman ndinatudi, nditimbudi, ve saas todi. Eemoghon yes to tighur lolodi payou ve titaghon tutuun tiou, nene pale lolog ineep tunja ila todi ve papaghu todi, ve poia tiou izaza todi itaghoni taghoni gha ila. *Igham*

34:7

⁷ “You Yoova, Maaron tiom. Uwaat sorokin izag malep. Pasa, tamtoghon to ighaze iwaat sorokin izag, ma ipariaan saveen kaarom ila you izag, nene irau naghurghuri maau. Pale naghur atia injarua pa sosor toni. *Mt 5:33+*

⁸ “Matam injal umbom to Maaron ve upatab pani. *Igham 16:23+*

⁹⁻¹⁰ Tovenen ndag inim eez, ila imuul ndag inim liim ve eez, nene sawa to ugham uraat tiom. Ve ndag inim liim ve ru, ghoru yom irau upul uraat tiom tisob tineep, ve upatab pani. Pasa, nene umbom patabuan to Yoova, Maaron tiom. Tovenen yamja ndinatum, mbesoona tiom, ngai tiom, ve yes loomba to tineep toman ghom ne paam, yam asob irau apul uraat tiam ineep, ve atemim izi. *Igham 23:12, 34:21*

Igham 23:12, 34:21

¹¹ Pasa, sawa to you Yoova naghur sambam, taan, ve te, toman mbeb tisob to tineep ila, naghani uraat irau mbon liim ve eez moghon, ve napasob uraat tonenen. Ve sawa to inim liim ve ru, ateg izi. Tauto napait sawa tonenen, ve naghuri inim um-

bom patabuan, ve naghur poia tiou ineep izala.
Mbnp 2:1+

¹² “Matam lonlonainja pa tamam ve tinam, ve utandag padi. Leso uneep mala izi taan to you Yoova, Maaron tiom, pale naghham payom. *Mt 15:4; Mk 7:10; Ep 6:2+*

¹³ “Urab tamtoghon imaat malep. *Mt 5:21; 1Yo 3:15; Syg 21:8*

¹⁴ “Ughur maat malep. *Mt 5:27+; 1Kor 6:15+; Ep 5:5; Hib 13:4; Syg 21:8*

¹⁵ “Uyub malep. *Mt 19:18; Ro 13:9; Ep 4:28*

¹⁶ “Upariaan saveen kaarom pa uwaghamun itam ite malep. *Mk 10:19; Lu 18:20; Syg 21:8, 22:15*

¹⁷ “Lolom igham pa nditam ruum todi malep. *Lu 12:15*

“Ve lolom igham pa ndizwadi, mbesoonja, ngai, ma mbep todi ite paam malep.” *Ro 7:7, 13:9*

Yes Israela timatughez pa Maaron

¹⁸ Yes Israela tiloon lalaav avolutu, ve tighita ndug milia, ve tiloon mbep to itantanj inimale tavuur, ve tighita yab mbuasa asosoonja ikau lolooz, le timatughez ve tinidi irur. Tovenen tiyoon sagan pa lolooz pughu,

¹⁹ ve tisaav pa Mose tighaze: “Yom irau ugham Maaron avo, ve upaesia alinja payei. Pasa, yei nimatughez. Ighaze ye tau isavsaav toman ghei, nene pale nisob nimatmaat!” *Hib 12:18+*

²⁰ Mose isaav padi ighaze: “Amatughez malep. Aazne, Maaron izi inim itaghon ataam tonene, pa ipatoon tapiri payam, lesa awatag katini ve amatughez pani, ve agham sosor muul sob.”

²¹ Tovenen ival tiina to Israel tiyoon saguan pa lolooz pughu, ve Mose enjeni imuul izala, le îla igharau yaghur tae asosooŋa to Maaron ineeŋ ila.

Tutuunŋ pida to artaal

²² Ghoru Yoova isaav pa Mose ighaze ipaesia aliŋa pa yes Israela tovene: “Yam taumim aghita wa. You naneep sambam, ve aliŋag izilat payam.

²³ Ambees pa you moghon. Alup ghou toman maaron kaarom eta malep. Tovenen agharaat maaron kaarom eta pa silva ma gol ve ambees pani malep.

²⁴ “Yam irau andou taan, ve agharaata inim artaal payou, leso agham watoonrau tiam izala. Sipsip ve makau tiam to arab di tinim watoonrau, aghur pida tizala yab, leso yab ighan suvun di. Ve pida, amoz di ve taumim aghan di, leso itiŋa talup ghiit tanim ee moghon. Ndug sine to ighaze you naghuri payam inim inamim to suŋuunŋ, yam irau alup gham pa suŋuunŋ ve apait izag tonowe. Leso matamim iŋgal ghou, ve nanim naneep toman gham, ve naghur poia tiou iza tiam.

²⁵ Ve ighaze andou yaam inim artaal payou, ayou yaam dodolidi moghon. Yaam to ighaze agharaata ve asap dige, nene aghami pa artaal tiou malep. Yaam tovene, poia pa artaal maau. Pasa, nene ndug patabuanŋ.

²⁶ Ighaze agharaat artaal eta, izala kat malep. Pasa, ighaze ataghon ndeet azala, nene pale tighita mbolemim.”

21

Tutuunŋ pida to iŋarua yes mbesooŋa ve daba todi

¹ Maaron iseenj saveenj toni muul ighaze: “Nene tutuun pida to naghaze usavia pa yes Israela. Leso ipatoon di pa sa ngar to pale titaghoni.

² “Ighaze ughol Hibru taamdi eta inim lem mbesoonja, ye pale imbees payom irau ndaman liim ve eez. Ve ighaze ndaman inim liim ve ru, ghoru upuli ila. Ve upoi pa lem atia malep. Pasa uraat toni, tauto iyat mulin yaam to yom ugholi pani.

³ Ighaze muun ye ivai maau, ve yom ugholi inim lem, sawa to ighaze upuli ila, ghoru upul enjeni ila. Ve ighaze muun ye ivai, ve yom ughol yesuru azuwa tinim lem, upul yesuru tila.

⁴ Ve ighaze mbesoonja eta daba toni igham liva eta pani inim azuwa, ve liva tonenen ipoop, sawa to ighaze mbesoonja tamoot uraat toni isob, nene pale enjeni ila. Azuwa toman ndinatu pale tineep toman daba toni.

⁵ Eemoghon ighaze mbesoonja tonenen isaav ghazoonja ighaze: ‘You lolog pa daba tiou, azuwag, ve ndinatug. Irau napul di tineep, ve engengou nala ne maau.’

⁶ Nene pale daba toni ighami ve yesuru tila tivot Maaron nagho ila ndug to tisunjun pani, ve ipaak mbesoonja tonenen taliņa ila ataam, ma ataam avo dige. Ghoru igham kiruun, ve irab purusan mbesoonja tonenen taliņa. Leso inim ghilaloon pani ighaze muri, ye irau ipul uraat maau. Pale ineep toman daba toni, le irau sawa toni to mateenj.

Tutuun pida to injarua ndiliva mbesoonja ve daba todi

⁷ “Ighaze tamoot eta igholia natu liva ila pa ngeu ite inim mbesoonja pani, nene liva tonowen pale ineep toman ngeu tonenen. Ighaze muri

daba toni ighaze ipuli ila, ye irau itaghon ngar to tighamgham pa yes mbesoonja nditamoot ne maau.

⁸ Ighaze ngeu to igham liva tonenen inim le ne, lolo pani muul maau, ye irau igholia ila ndug ite paam maau. Ye irau igholia imuul ila to liva tonenen tau sinj toni. Pasa, saveen mbuaan toni toman liva tonenen, ye itaghoni maau.

⁹ Ighaze ngeu tonowen igham liva tonenen pa natu eta, ye irau igham poiani inimale ye tau natu liva.

¹⁰ Ve ighaze ngeu tonowen ivai liva tonenen, ve muri ivai liva ite paam, ye irau mata ingal liva to ighami muun ne pa a aniin, ve le olija, ve yesuru tilup di pa ghenoon paam. Ipuli ineepp sorok malep. *1Kor 7:3+*

¹¹ Ighaze ye itaghon ngar tol tonene maau, ye irau ipul liva tonenen ila. Ve irau ipoi pa le atia maau.

Atia to yes to tiwaghamun tamtoghon

¹² “Ighaze tamtoghon eta irab ita ite imaat, yam arabi imaat paam. *Mbnp 9:6*

¹³ Eemoghon ighaze ye iwaat rabuunji maau, yam arabi malep. Pasa, you Maaron to napul patanani tonenen ivot. Tamtoghon tovene irau ighau ila pa ndug pida to yongaan to muri pale napatoon di payam, leso ineepp pooi.

¹⁴ Eemoghon ighaze tamtoghon eta ate yabyab pa ita ite, ve iwaat rabuunji ve imaat, ve muri ighau ila pa artaal pughu, leso artaal ndamo pani ve ineepp pooi, yam aghurghuri malep. Ala asasaara ivot ila pumuri, ve arabi imaat.

¹⁵ “Ighaze tamtoghon eta irab tama ma tina, arabi imaat.

16 “Ve ighaze ngeu eta ikis tamtoghon ite, ve igholia ila to tamtoghon ite paam, ma tau ikisi inim le mbesoonja, arabi imaat. *Mbnp 37:28; 1Tim 1:10*

17 “Ighaze tamtoghon eta ate yabyab pa tama ma tina, ve ipiyaav saveen samia padi, arabi imaat. *Mt 15:4; Mk 7:10*

18-19 “Ighaze nditamoot ru tiparab, ve eez irab katin ita ite pa yaam ma nima, le tini isami kat. Eemoghon imaat maau. Inim narape moghon. Ngeu to irabi, pale ighol ita ite tonenen pa sawa to ye inim narape ve irau igham uraat maau. Ve ye irau ingini ve imbees pani le tini poia muul. Ighaze ita ite tonenen ikis titi ve tau imundig ilaagh, ghorosob. Sosor toni, ye igharaata wa.

20 “Ighaze tamtoghon eta ilos mbesoonja toni tamoot ma liva eta pa ai, ve mbesoonja toni imaat pataghaan, yam aghur atia pa tamtoghon tonenen.

21 Eemoghon ighaze mbesoonja toni imaat rikia maau, ve ineep mboj eez ma ru, ghorosob, yam aghur atia pani malep. Pasa mbesoonja tonowen, ye ineep ila daba toni tonenen nima.

22 “Ighaze liva eta apo, ve sawa toni to popaan sone. Ve ighaze nditamoot pida tiparab, ve todi eta ipiyaav nima le irab sorokin liva tonenen, ve muri ipoop le natu imazug, ve ye tau poia. Nene pale atia piiz to azuwa toman yes pooza tighuri pa ngeu tonenen, ye irau igholi.

23 “Eemoghon ighaze liva to apo igham samia, yam irau aghur atia pa ngeu tonenen itaghon sosor to ye ighami. Tovenen ighaze ye irab liva

tonenen imaat, yam arab ngeu tonenen imaat paam.

²⁴ Ve ighaze iwaghamun mata, yam awaghamun ngeu tonenen mata. Ve ighaze iwaghamun livo, ma nima, ma aghe, yam paam agham ngar raraate moghon pani. *Mt 5:38*

²⁵ Ve ighaze ye itun liva tonenen pa yab, yam anamim atun ngeu tonenen paam. Ve ighaze imbuti, ma irabi le tini imburmburtaan, ataghon ngar raraate moghon pa ngeu tonenen.

²⁶⁻²⁷ “Ighaze ngeu eta irab mbesoonja toni tamoot ma liva eta le mata isami, ma livo ipol, ye irau ipuli ila. Irau inim mbesoonja pani muul maau. Nene ataam to ngeu tonenen igharaat sosor toni.

Tutuun to injarua ngai taudi

²⁸ “Ighaze makau tamoot eta ingal tamoot ma liva eta pa ndoonja le imaat, yam arab makau tonenen paam pa yaam le imaat. Eemoghon aghani malep. Ve aghita makau tama aghaze ye inim pughu pa patanjani tonenen malep.

²⁹ Eemoghon ighaze makau eta moghon moghon ingalngal tamtoghon pa ndoonja, ve makau tama iwatagi wa. Eemoghon ye ingin poian makau toni maau, ve igham tovene muul pa tamtoghon eta, yam arab makau tonenen pa yaam le imaat. Ve makau tama paam, arabi imaat.

³⁰ Eemoghon ighaze ye to imaat ne ndita lolodi isamin makau tama, ve tiyok pani pa igharaat sosor toni, nene atia piiz to tighuri pani, ye irau igholi. Leso igham mulin tau, ve imaat sob.

³¹ Ighaze makau eta iwaghamun pain kainaŋen ma liva kainaŋen eta, yam ataghon ŋgar raraate moghon.

³² Ve ighaze makau tamoot eta ingal mbesooŋa tamoot ma liva eta pa ndooŋa, makau tama irau ighol yaam silva tamoot ee saanŋul (30) * ila pa daba to mbesooŋa tonenen. Ve yam irau arab makau tonenen pa yaam le imaat.

³³⁻³⁴ “Ighaze ŋgeu eta itai puura ve ipoona maau, ma ireu mbeb to tipoon saambu avo pani, ve ighaze makau ma esele eta itap izila le imaat, nene ŋgeu tonenen irau igharaat ŋgai tama. Ve ŋgai pale ineev ve inim ye to igham sosor ne le.

³⁵ Ighaze makau to ŋgeu eta iwaghamun makau to ita ite eta ve imaat, ndiran ru tonenen irau tigholia makau to poia ne, ve tivalag yaama. Ve makau to imaat, nene yesuru irau tipaal balagini inim ru, ve pida ila to ŋgeu eez, ve pida ila to ita ite.

³⁶ Eemoghon ighaze makau tonenen moghon moghon ighamgham tovene, ve makau tama ingin poiani maau, ve igham tovene muul, ye pale irabolin makau to imaat ne, pa toni eta to raraate, ve makau maate tonenen ineev inim a.

22

Tutuun pida to inarua ŋgar to paraboliin mbeb

¹ “Ighaze ŋgeu eta iyub makau ma sipsip eta, ve irabi ve ighani, ma igholia ila pa tamtoghon ite, ye pale iyat mbeb to iyubi ne, ve igham pida paam

* **21:32:** Yaam silva to saveeŋ waaro tonene isavia ne, iza ‘sekel.’ Sekel eez, nene inimale 12 Kina. Tovenen 30 sekel, nene inimale 360 Kina ma venen.

izala pogho. Leso igharaat sosor toni. Ighaze iyub makau, ye pale iyati, ve igham makau paan paam izala pogho. Ve ighaze iyub sipsip, ye pale iyati, ve igham sipsip tol paam izala pogho. *Lu 19:8*

²“Ighaze ngeu yubyub eta ireu ruum pa mbonj ve iloonj ila, ve tamtoghon eta ighita ve irabi imaat, nene ye le saveeja maau.

³Eemoghon ighaze ngeu eta irab yubyub eta le imaat pa ndag, nene ye igham sosor. Tovenen yam irau aghur atia pani inimale moghon moghon aghuri pa yes to tirab tamtoghon imaat.

“Ighaze tamtoghon eta iyub mbbeb, ye irau igharaat mbbeb to iyubi ne ila to mbbeb tonowen tama. Ve ighaze ye irau igharaata maau, nene pale tigholia tamtoghon tonenen ila inim mbesoonja pa tamtoghon pida, ve tigham yaama ila to mbbeb tonowen tama. *Mt 18:25*

⁴“Ighaze ngeu eta iyub esele, ma makau, ma sipsip eta, ve ighaze tindeenj mbbeb tonowen imaat maau ve inepneep ila ngeu tonenen nima, ye pale ipamuula, ve igham tau toni eta ila tomani, lesa igharaat sosor toni.

⁵“Ighaze ngeu eta ipul ngai toni tivool tila pa uum to tamtoghon ite ve tiwaghamuni, ye irau iyat aniiñ ve vaen to ngai toni tiwaghamun di ne pa aniiñ ve vaen popoiadi kat to titub ila uum toni.

⁶Ve ighaze ngeu eta itun ndug, ve yab ighan uum to tamtoghon ite ve iwaghamun wit toni papaghu, ma wit matua to ndounj ne, ye irau iyat suvun wit to yab ighani.

⁷“Ighaze ngeu eta ipul yaam toni ma mbu-ruguunj toni pida ila tamtoghon ite nima pa inñin di. Ve ighaze yubyub eta iyub mbbeb tonowen ila

ruum toni, ve muri tindeenja, sa mbeb to ye iyubi, ye irau ipamuula imuul ila, ve ighur ite paam izala pogho pa igharaat sosor toni.

⁸ Eemoghon ighaze andeen yubyub tonenen maau, yam agham ngeu to ingin mbeb tonenen, ve ala apayoonda ila Maaron nagho. Ghorosun pa Maaron, leso ipatoon ngeu tonenen: Ye nima isosor pa ita ite mbeb toni, ma maau?

⁹ “Ve ighaze tamtoghon ru tiwazoran di pa makau, esele, sipsip, nonogiija, ma mbeb ite paam. Ve eez ighaze ye toni, ve ite ighaze ye toni. Nene agham yesuru ve ala avot Maaron nagho, ve tisavia saveen todi izi tonowe. Ghorosun pa Maaron, leso ipatoon sei to igham sosor. Tamtoghon to igham sosor, pale ipamuul mbeb to tiwazoran di pani ne imuul ila to ita ite, ve ighur ite paam izala pogho pa igharaat sosor toni.

¹⁰ “Ighaze ngeu eta ipul esele, makau, sipsip, ma ngai toni ite paam ila ita ite nima pa ingini. Ve ighaze mbeb tonenen imaat, ma isami, ma yubyubja tiyubi, ve ighaze tamtoghon eta ighita mbeb tonenen maau.

¹¹ Nene pale mbeb tonenen tama yesuru ita ite to ingin mbeb toni, tila tiyoon ila Yoova nagho. Ve ighaze ye to ingin mbeb toni ne, isaav ighaze: ‘Onoon kat, Maaron ighita ghou ve nasaav. Nimag isosor pa mbeb to itag ite tonene maau.’ Sawa to mbeb tonenen tama iloon saveen ghazoonja tovene, nene irau le saveen muul maau, ve ye irau ighur mata pa ita ite tonenen pa iyat mbeb toni maau.

Hib 6:16

¹² “Eemoghon ighaze ita ite ingin poian mbeb tonenen maau, ve yubyubja tiyubi, ye irau iyat

mbeb to ilale imuul ila to mbeb tonenen tama.

¹³ Ve ighaze mbeb sagsag eta ighan ngai tonenen ve isaas motini, nene ngeu to ingini irau igham suruvu ila, ve ipatoonja pa ngai tonenen tama. Leso iwatag ighaze ita ite tonenen iyub ngai toni maau. Mbeb sagsag to iwaghamuni. Tovenen ita ite tonenen irau iyati maau. Pasa, ye le sosor maau.

¹⁴ “Ighaze ngeu eta ighason ita ite pa bapolo toni, lesu iuuli pa uraat. Ve ighaze bapolo tama inep maau, ve bapolo tonowen imaat, ma mbeb eta iwaghamuni, nene ngeu tonenen irau iyati.

¹⁵ Eemoghon ighaze bapolo tama inepneep, ve patanjani tovene ivot, nene ngeu to igham bapolo tonenen pa uraat, irau iyati maau. Ve ighaze ye igharaat bapolo tama pataghaan wa, ve patanjani tovene ivot, nene paam irau iyati maau. Pasa, ye igharaat atia ila to bapolo tama wa.

Tutuun pida

¹⁶ “Ighaze ngeu eta ighereb liva paghu eta to tisia sone, ve imogheer pani, ye irau ighol liva tonenen ve ivaii.

¹⁷ Ve ighaze liva tama iyok padi pa tivai maau, nene pale yesuru tivai maau. Eemoghon ngeu tonenen irau igharaat liva tama, raraate inimale tigholghol ndiliva papaghu.

¹⁸ “Ndiliva to tighamgham mur, apul di tineep malep. Arab di timaat.*

¹⁹ “Ighaze tamoot eta imogheer pa ngai liva eta, ma liva eta ipatoonj tau pa ngai tamoot lesu ngai

* **22:18:** Saveej waaro tonene injarua yes ndiliva moghon maau. Injarua yes nditamoot paam. Ughita Wok Pris 20:27.

imogheer pani, arabi imaat. *Wok Pris 18:23, 20:16; Lo 27:21*

²⁰ “Yam irau agham watoonrau pa Yoova moghon. Ighaze tamtoghon eta igham watoonrau pa maaron kaarom eta, arabi ilale.

Lolood isamin yes mbolaaja

²¹ “Loomba to tineep ila lolomim, yam agham samin di, ma agham patanani padi malep. Yam irau agham poian di. Pasa, matamim ingal: Muun, yam paam anim loomba izi Isip.

²² Ve yes ndinaara ve paroonja tovene paam. Agham samin di malep. *Yems 1:27*

²³ Pasa, ighaze agham tovene padi, ve titañ roran ghou pa ulaan, you pale naloon taniiz todi ve nauul di.

²⁴ Ve you pale ateg yabyab kat payam, ve nambut gham pa buza tiou ve amatmaat, ve ndizwamim tinim ndinaara, ve ndinatumim tinim paroonja.

Lu 18:7

²⁵ “Ighaze tamtoghon tiou eta mbolaan ighami ve igham bun ilat tiom, yom utaghon ngar to yes ndiran to tighamgham yaam pa tamtoghon leso tigham ledi avua izala pogho ne malep. Tovenen ye to igham bun ilat tiom, ighaze muri iyati, nene ye irau iyat yaam anonja moghon. Upoi pa avua izala pogho malep.

²⁶ Ve ighaze ugham nonogiiña toni to monjeaan ineep tiom, leso mata ingal bun toni ve iyati, rabrab to naol ne, yom irau ugham nonogiiña toni imuul ila pani le isob, ghoron mbon izi. Ve mbonmaagh, ghoron ye ighami imuul ilat.

²⁷ Pasa, ye le mbeb ite paam pa itatab tau pani maau. Tovenen ighaze ukis nonogiiña toni pa

mboŋ, nene pale moŋeŋaŋ ighami, ve igheen pooi maau. Ve ighaze ye itaŋ roran ghou pa nauuli, nene pale naloŋ taŋiiz toni. Pasa, yes to tineep ila pataŋani lolo, you lolog isasamin di, ve naluul di.

Tamatughez pa Maaron ve tatandag pa yes pooza

²⁸ “Uveleg Maaron malep, ve upiyaav saveeŋ samia pa daba eta to iŋgin gham ne malep. *Igham 20:7; Mbaŋ 23:5*

²⁹ Aniiŋ toman vaen ve oliv tiom mata, uŋguruut di payou malep. Ugham di tinim payou. Ve natum tamoot aidaba tovene paam, upuli inim leg. *Igham 13:2; Lu 2:23*

³⁰ Ve makau ve sipsip tiom to nditinandi tipoop di muuŋ ne paam. Upul di tineep toman nditinandi irau mboŋ liim ve ru. Ve mboŋ inim liim ve tol, ghoru ugham di tinim, ve urab di tinim watoŋrau payou.

³¹ Yam irau ataghon ŋgar patabuaŋ. Pasa you naghama gham anim leg wa. Tovenen ŋgai to ighaze mbeb sagsag eta isaas motini ve irabi imaat, aghani malep. Apiyaava ila ŋgavuun tighani.”

23

Tawaghamun tamtoghon izadi malep

¹ “Ighaze ulooŋ mbeb eta varu, ghoru usavia pa tamtoghon rikia malep. Pa vene, saveeŋ kaarom ma venen. Ve ighaze tamtoghon eta igham ŋgar samia ve tipayoonda pa sava saveeŋ, uvool toni ve usavia saveeŋ kaarom pa uuli malep. *Igham 20:16; Mbo 15:3; Mt 19:18*

² “Ighaze ival tiina tilup di pa tigham n̄gar samia eta, yom ula toman di malep. Ve sawa to gharatoon̄ saveeñ, ighaze ival tiina tisavia saveeñ kaarom pa tighamun saveeñ, yom ula toman di ve upariaañ kaarom todi tonowen malep. Yom irau usavia saveeñ onoon moghon.

³ “Ighaze tipayoon mbolaaña eta pa savsaveeñ, uvool toni sorok malep. Uloon̄ poian saveeñ toni pughu le isob, ghoron̄ un̄gabiiza itaghon n̄gar denja.

Tauul koiaad

⁴ “Ighaze ughita makau ma esele to koiam eta ilaghlaagh pumuri, ughami imuul ila to tama.

⁵ Ve ighaze ughita esele to koiam eta to imbaad mbeb patañani ve itap izi igheen, upuli malep. Ula ve uul koiam tonanan ve yamru atoov agham esele toni iza iyoon.

Ataam to gharatoon̄ saveeñ

⁶ “Ighaze yom daba to ndug, ve mbolaaña eta le patañani, ve ighuri ilat nimam pa ugharaata, utatan saveeñ toni malep. Uloon̄ saveeñ toni ve ugharaat poiani.

⁷ Ve ighaze tamtoghon tingal saveeñ pa n̄geu eta ve tipayoonda sorok pa savsaveeñ, yom ula toman di pa saveeñ todi malep. Uneep saguan padi. Tamtoghon denja to le sosor eta maau, urabi imaat malep. Pasa, yes to tigham sosor tovene, nene irau naghurghur di maau. Pale naghur atia padi.
Igham 20:16; Lu 23:13-25; Ep 4:25

⁸ Ighaze tamtoghon eta ighaze ighol ghom leso uuli pa kaarom toni, uyok pani malep. Pasa, n̄gar tovene ighamun n̄gar to tamtoghon. Yes to tighazoon̄ pa n̄gar poia ne paam, pale ighamun

ngar todi. Tovenen sawa to tigharaat saveeņ, yes pale tivoool to yes to tighol di, ve tighamun saveeņ to yes to titaghon ngar denja.

⁹“Ugham samin yes loomba malep. Pasa muuņ, yam paam aneep anim loomba izi Isip. Tovenen pataņani to yes loomba, taumim ayamaana wa. *Igham 22:21*

Saveeņ pida to injarua umbom patabuan

¹⁰“Uvavazog aniiņ ila taan tiom, ve uyouyou di le irau ndaman liim ve eez.

¹¹ Ve ighaze ndaman inim liim ve ru, ghoru upul taan tonanan ineep inim ranęaat. Ndaman tonenen, yes mbolaņa to tineep ila lolomim, pale tila ranęaat tiom tonanan, ve tikaal adi nakapoņa pa tighan. Ve ighaze tipul aniiņ pida ineep, nene pale inim mbeb sagsag adi. Sawa isob, ighaze ndaman inim liim ve ru, yom irau utaghon ngar tovene. Ve utaghon ngar raraate moghon pa oliv ve vaen tiom paam.

¹²“Ndag inim eez, ila imuul ndag inim liim ve eez, nene sawa tiom to ugham uraat. Ve ndag inim liim ve ru, yom irau upul uraat tiom ineep, ve atem izi. Leso makau ve esele tiom, toman yes mbesoņa to nditinandi tipoop di ila ruum tiom, ve yes loomba to yamņa anepneep ne paam, atedi izi ve avuvudi ila. *Mbnp 2:2+; Igham 20:8*

¹³“Saveeņ isob to you nasavia payam, matamim kisini ve ataghoni kat. Ve asuņ pa maaron kaaromņa malep, ve izadi ivot ila avomim rita malep.

Lupuņ tintina tol to suruņ pale ivot irau ndaman to naol

14 “Ndaman to naol ne, lupuuñ tintina tol to sunjuuñ pale tivot. Sawa todi ighaze ivot, ghero yamña ival tiina to Israel alup gham pa sunjuuñ, ve apait ghou.

15 Lupuuñ to ivot muuñ, nene Pasova. Nene pale ivot pa kaiyo Abib. *

Pasa, kaiyo tonenen to naghham gham apul taan to yes Isipa ve avot. Sawa tonenen, yam alup gham pa sunjuuñ, ve aghan mberet to le yis maau irau mboñ liim ve ru, itaghon tutuuñ to muuñ naghuri payam.

“Tamtoohon to ighaze isun payou ne, nima nginiña ve inim ivot naghog malep. *Igham 12:17, 34:20*

16 “Lupuuñ inim ru, nene Sawa to Aniiñ Mata. Uvazog aniiñ ila uum tiom, ve usasañan le ighaze aniiñ mata imatu, ghero lupuuñ tiina tonene ivot. Tovenen ulaagh toman aniiñ tiom mata unum, ve yamña ival tiina to Israel alup gham pa sunjuuñ.

“Lupuuñ inim tol, nene Sawa to Taitain. Ndaman igharau ighaze isob, ve utai aniiñ ila uum tiom, ghero lupuuñ tiina tonene ivot. Tovenen yam asob irau alup gham pa sunjuuñ, ve apait ghou pa aniiñ to naghham payam. *Igham 34:22*

17 “You Yoova, Maaron tiam. Tovenen ndaman to naol ne, ighaze sawa tol tonene tivot, ghero nditamoot tiam tisob tilup di ila naghog, ve tisuñ payou.

Tutuuñ pida

18 “Ighaze urab mbeb eta inim watoonrau payou, ulup mbeb to yis ineep ila ne, tomani malep. Ve

* **23:15:** Kaiyo Abib ivotvot pa Mas ma Epril.

sawa to yamᅇa ival tiina alup gham pa suᅇuᅇ ve ugham watoonᅇrau payou, yab irau ighan suvun watoonᅇrau tiom tonanan minda toman ᅇgoreeᅇa. Ngiiira rita ineep mboᅇ le ndugizau malep.

¹⁹ “You Yoova, Maaron tiom. Aniiᅇ tiom mata to tivot ila taan tiom, yom uvureer popoia moghon ve ugham di tinim rumai tiou.

“Ighaze unaz mekmek natu eta, unazi toman tuz to tina malep.” *Igham 22:29, 34:26*

Aᅇla to Yoova pale imuᅇᅇ pa yes Israela ve iᅇgin di pa ataam

²⁰ “Alooᅇ! You pale nambaᅇᅇ aᅇla tiou ilat, leso imuᅇᅇ payam, ve iᅇgin gham pa ataam. Ye pale igham gham ala avot izi taan to you naghuri payam pataghaᅇᅇ pa aneep pani. *Igham 32:34, 33:2*

²¹ Aghur taliᅇamim pani pooi, ve alooᅇ saveeᅇ toni. Azoor aliᅇa malep. Pasa, ighaze yam azoor aliᅇa, ye irau ighurghur gham maau. Pale ighur pataᅇani iza tiam. Pasa, ye igham naghog, ve izag ineep toni.

²² “Eemoghon ighaze yam alooᅇ aliᅇa, ve ataghon katin saveeᅇᅇ isob to you nasavia, nene pale naghur koi pa yes to tighur koi payam, ve naparab toman yes to tiparab toman gham.

²³ Tovenen aᅇla tiou tonene pale imuᅇᅇᅇ payam, ve igham gham ala avot izi taan to yes Amora, Hita, Peresa, Kanaana, Hivia, ve Yebusa. Ve you taug pale narab di tilaledi, leso agham taan todi inim lemim. *Mbnp 15:19+*

Yoova ighaze yes Israela timbees pani moghon

24 “Sawa to ala aneep izi taan Kanaan, ataghon di pa ngar todi malep. Tovenen aput aghemim pa maaron kaaromņa todi ve ambees padi malep. Arab mbirisan di. Ve yaam todi patabuaņa to tiyondyood ila ndug todi to sunuņ, tovene paam. Arab mbirisan di le timbiriis. *Igham 20:5, 34:13*

25 “You Yoova, Maaron tiam. Yam irau ambees payou moghon. Leso poia tiou iza tiam, ve naghām amim aniiņ ve ya, ve nandiir moroghoon ighau payam. *Igham 15:26*

26 Ve ndiliva tiam tisob, popaanj todi pale poia moghon. Eta irau uupa maau, ve pain eta to ineep ila tiina apo lolo irau imazug maau. Ve you pale matag payam, lesō aneep mala izi taan to naghaze naghām payam. Irau amaāt rikia maau.

27 “Sawa to yam alaagh ala, you taug pale namuņ payam, ve naghur matughezaan tiina ivot pa yes ndug ndug to pale ala avot todi. Leso naghām koiamimņa ngar todi iwaghāmghām, ve timatughez payam ve tighau.

28 Ve you pale nambaanj nguruub ndiņndiņ ndiņndiņ timuņ payam. Leso tireu yes Hivia, Kanaana, ve Hita tighau. *Mbnp 35:5*

29 Eemoghon irau nandiir di tisob tighau pa ndaman ee moghon maau. Pa vene, taan todi ineep sorok, ve mbeb sagsag timasa tinim naol izi ndug todi, ve tiwaghāmghām.

30 Tovenen you pale nandiir di poipoi ve tila, le irau yam avot anim naol, ghorō aghām taan todi isob inim lemim.

31 “Taan to naghaze naghām payam ne, dige eez, nene itaghon naari to Te Kaviaaņa, le ila imuul izi naari to Te Mediterenian to yes Pilistia

tineep pani. Ve dige ite, nene itaghon ndug balim to magargaar moghon, le ila imuul ya Euprates. You pale naghur taan tonowen tamtoghona tilat nimamim, lesu andiir di tighau, ve agham taan todi inim lemim.

³² Tovenen yamṇa ambua saveeṇ pa alup gham anim ee moghon malep. Ve maaron kaaromṇa todi tovene paam. Ambua saveeṇ toman di pa yamṇa alup gham malep. Aneep saganu padi.

³³ Ve ayok padi pa tineep toman gham ila taan tiam malep. Pale tiyes gham pa ṅgar todi sam-samia, ve agham sosor ila matag. Ve aghita. Ighaze tiweu gham ve ambees pa maaron kaaromṇa todi ve asuṇ padi, nene pale inim liis payam.”

24

Yes Israela timbua saveeṇ toman Yoova

¹ Yoova isaav pa Mose ighaze: “Yamru togham Aron, toman ndinatu ru Nadap ve Abiu, ve daba tamoot tol saṅgul (70) to yes Israela aza anim tiou to lolooz daba ne. Eemoghon anim agharau ghou kat malep. Aneep saganu ris, ve aput aghemim, ve asuṇ payou.

² Le isob, ghoru yes pida tineep tonowe, ve yom engengom unum ugharau ghou. Ve yes ival tiina to Israel tovene paam. Tiza tinim tigharau ghou malep. Tineep saganu.”

³ Tovenen Mose imuul izila to yes Israela, ve ipaes padi pa saveeṇ ve tutuuṇ tisob to Yoova isavia di. Isavsav padi le isob, ghoru tilup avodi tighaze: “Saveeṇ isob to Yoova isavia, yei pale nitaghoni.”

Igham 19:8

⁴ Ghoru Mose imbood saveeṇ isob to Yoova ila rau.

Mboŋ ndugizau, ghoru Mose imundig, ve indou yaam pida izi lolooz pughu inim artaal, ve ipayoon yaam saangul ve ru tinim ghilalooŋ pa rumai saangul ve ru to yes Israela.

⁵ Ghoru imbaaŋ ndipain todi pida tila tigham watoonrau pa Yoova. Yes tigham mbeb pida ve tighur di tizala yab ve ighan suvun di. Ve timoz makau papaghu pida ve tighan di, leso yesŋa Yoova tilup di tinim ee moghon.

⁶ Mose iwato mbeb to tirab di tinim watoonrau ne siŋidi, ve iliŋ pida ila oon pida lolodi, ve igham pida, ve itirtiri izala artaal.

⁷ Ghoru igham rau to saveeŋ mbuaaŋ todi toman Yoova ineeŋ ila, ve iraava, ve iwaata, ve ival tiina tilooŋ. Tiloona le isob, ghoru tisaav tighaze: “Saveeŋ isob to Yoova isavia, yei pale nitaghoni kat.”

⁸ Ghoru Mose igham siŋ to ineeŋ ila oon lolodi, ve itirtiri izala ival tiina poghodi, ve isaav padi ighaze: “Aazne, Yoova imbua saveeŋ toman gham, ve yamŋa alup gham anim ee moghon. Siŋ tonene ipariaaŋ saveeŋ mbuaaŋ tiam toman Yoova. Lupuuŋ toit toman Yoova, nene iyoon izala saveeŋ to ye igham pait. Ighaze tataghoni kat, nene pale lupuuŋ toit toman Yoova ineeŋneep tovene itaghoni taghoni gha ila.” *Mt 26:28; 1Kor 11:25; Hib 9:16+*

⁹ Ghoru Mose igham Aron, Nadap, Abiu, ve daba tamoot tol saangul (70) to yes Israela, ve yesŋa tizala pa lolooz.

¹⁰ Tila tivot tonowe, ghoru tighita Maaron to Israela. Ye iyoon izala mbeb eez pogho. Mbeb tonowen babaŋa, ve bibiliina inimale tata.

¹¹ Yes daba to Israela tineep toman Maaron, ve tighan ve tighun tonowe. Onoon kat, yes tighita Maaron. Eemoghon ye iwaghamun di maau. *Mbnp 32:31*

Mose izala pa lolooz Sinai daba

¹² Muri pa mbbeb tonenen, Yoova isaav pa Mose ighaze: “Malmalim uza unum tiou to lolooz daba ne, ve uneep izi sualen. Pasa, you nangetet saveen ve tutuun tiou ila yaam babañadi wa. Leso ipatoon yes Israela pa ngar to titaghoni. Ve naghaze naghur yaam tonene tilat nimam.”

¹³⁻¹⁴ Tovenen Mose isaav pa yes daba tonenen ighaze: “Yam aneep to sualen, ve asañan yeru Yosua. Aron yesuru Ur to tinepneep ne. Ighaze lemim patañani eta, yesuru irau tigharaata.” Isavsaav padi le isob ghoru igham ulaaña toni Yosua ve yesuru tinau tizala ris. Ghoru Mose ipul Yosua izi, ve enjeni malmali izala pa lolooz to Maaron daba.

¹⁵ Sawa tonenen, yaghur tae izi inim ikau lolooz Sinai daba.

¹⁶⁻¹⁷ Ve Yoova nguruba isul izala lolooz daba. Yaghur tae tonowen ikau lolooz irau mbon liim ve eez. Ival tiina to Israel to tineep sila, matadi izala pa lolooz, ve tighita Yoova nguruba isul inimale yab tiina ighanghan izala lolooz daba. *Mt 17:5; Hib 12:18,29*

Ndag inim liim ve ru, ghoru Yoova ineep yaghur tae lolo, ve isaav izila pa Mose ighaze izala toni.

¹⁸ Tovenen Mose izala lolooz daba kat, le iloon ila yaghur tae lolo. Ve ineep tonowe irau mbon tamoot ru. *Mt 4:2*

25-31

Paesiij tuku pa mbeez patabuanj to Maaron

Mose ineep izi lolooz Sinai daba, ve Yoova isaav pani pa mbeez patabuanj to ye ighaze yes Israela tigharaata. Tirei mbeez tonowen, leso inim Maaron ina to nepoonj, ve ipatoonj yes Israela ighaze Maaron ineep toman di.

Yoova isaav pa yes Israela pa tigham mal-imoonj pa mbeez tonowen ighaze tingoog mbeb tovene: yaam milmilia inimale silva ve gol, uli to tigharaata pa sipsip oro, uli to tigharaat di pa mbeb naol naol ulidi, ai arianaadi naol naol, ngoreenj ve naunaunj to vuzidi popoia, ve yaam naol naol to bodeenjadi popoia. Leso tigharaat mbeez tonenen ve tipambooda. Yoova tau isavia mbeez tonenen anunu pa Mose, leso ana isavia ila pa yes Israela, ve tigham uraat pani. (Ughita Hib 8:5.)

Tovaanj to mbeez tonenen, nene vene: Mala toni irau roov liim ve tol (15 mita). Ve tuku toni irau roov tol (5 mita). Ve sila ve izala, nene irau roov tol (5 mita).

Titatab mbeez patabuanj pa uli tintina paan. Uli to ineep izila sila, bodeenja poia kat. Tigharaata pa teret to bodeenjadi naol naol inimale aindan, kavianaaja, ve bibiliinja. Ve tipambooda pa anjela anunudi. Uli ite inim ru pani, nene tigharaata pa mekmek oro. Ve inim tol pani, nene tigharaata pa mekmek ulidi to tigharaat di le kavianaadi, ve tisai di tinim eemoghon. Ve uli inim paan pani, nene tigharaata pa lamboi ulidi to tisai di tinim eemoghon.

Mbeez lolo

Yoova isaav pa yes Israela ighaze tindaad uli to bodeenjadi popoia kat leso tirab motin mbeez lolo inim suruvu ru. Suruvu eez tiina, ve suruvu ite kainanjen.

Suruvu kainanjen

Mbeez suruvu kainanjen, nene patabuanj le patabuanj kat. (Ughita Mt 27:51, Mk 15:38, Hib 9:3.) Bokis eez ineep ilooj ila. Bokis tonowen, tigharaata pa ai, ve tipaak gol ila lolo ve dige paam pa tipambooda. Ghoru tigham yaam babañadi ru to Yoova injeret tutuunj toni ila, ve tizeev di tilooj tila. Ve tisap anela ru anunudi, ve tipayoon di tizala bokis tonenen pogho. Tiwaat bokis tonenen tighaze 'Bokis to Saveen Mbuaanj.' Yes Israela tighita bokis tonenen tighaze nene Yoova ina to ghamuunj pooz. Tauto bokis tonenen inim ghilalooj padi ighaze Yoova tau ineep toman di (Ughita Syg 11:19.)

Sawa eemoghon kat ila ndaman enaenja, daba to watoonjrau enjeni moghon ilooj ila mbeez suruvu to kainanjen, ve itir sinj izala bokis to saveen mbuaanj pogho. Leso Yoova ireu ival tiina to Israel sosor todi, ve yesja Yoova tilup di muul (Ughita Hib 9:7,24-26, 10:1-4.) Tauto tiwaat bokis tonowen avo tighaze 'Ndug To Rewaanj Sosor.' Uraata pida to watoonjrau, ma tamtoghon sorok eta irau ilooj ila mbeez suruvu kainanjen to patabuanj kat ne maau. Maau le maau kat. (Ughita Hib 10:19-21.)

Suruvu tiina

Mbeez suruvu tiina, nene patabuanj paam. Eemoghon patabuanj kat inimale suruvu kainanjen

maau. Tovenen ndiran to watoonrau tisob irau tiloon tila suruvu tiina, ve tigham uraat todi.

Toŋ to mberet patabuan

Ruum suruvu tiina, mbeb tol tineep ila. Eez, nene toŋ to tigharaata pa ai ve tipaak gol izala pogho. Toŋ tonowen, tighurghur mberet patabuan toman ai suru to vuzi poia ne izala pogho. Wik enaena, titun ai suru tonowen, ve tigham mberet mungina izi, ve ndiran to watoonrau tighani. Ghoru tighur paghu izala. Mberet tonowen ipatoon di ighaze Maaron ineep toman di. Ival tiina irau tighani maau. Yes to watoonrau moghon to tighani. (Ughita Mk 2:26.)

Lam toman aia

Ve mbeb ite to iyoon iloon ila mbeez suruvu tiina, nene lam aia to tigharaata pa gol. Mbeb tonowen pughu eemoghon, ve boga liim ve ru. Boga enaena ledi lam ineep ila. Rabrab to naol ne, ndiran to watoonrau tila titun lam, lesu ighan pa mboŋ le ndugizau.

Artal kainanen to tunuun mbeb to vuzidi popoia

Ve mbeb to inim tol pani, nene artaal kainanen to tigharaata pa gol. Yes to watoonrau titun-tun mbeb to vuzidi popoia izala artaal kainanen tonowen pa mboŋmaagh ve rabrab. (Ughita Lu 1:8-10.)

Mbeb tol tonenen tineep iloon ila mbeez suruvu tiina. (Ughita Hib 9:2-5.) Ve tipatoon ghiit pa Maaron tighaze ye patabuan ve paghuna kat. Ve ye ineep toman ghiit irau sawa isob, ve inim aniin mata yaryaara pait, ve inginngin ghiit pa aad aniin ve leed mbeb. Ve ye inim ghazona pait.

Oon to ririwaan

Oon tiina eez to tigharaata pa bras iyoon sagan ris pa mbeez nagho. Oon tonowen, ya ineep ila lolo. Ighaze yes to watoonrau tighaze tigham uraat pa watoonrau to tamtoghon, ma tiloon tila mbeez patabuan lolo pa tigham uraat, yes irau timen nimadi ve aghedi muun. Le isob, ghoru tigham uraat todi.

Artaal tiina

Artaal tiina ineep igharau ataam avo. Nene timozmoz watoonrau to yes Israela izala. Artaal tiina ve oon tonenen ngara tovene: Iit irau tala tavot to Maaron sorok maau. Ye ireu sosor toit, ve igham ghiit tangalaan kat, ghoru iit irau tala tavot toni.

Tindaad uli arianadi saangul tiluvut mbeez tonenen toman artaal tiina ve oon to ririwaan tinim didiin. Ndug to tindaad uli tiluvuti, mala toni irau 44 mita, ve tuku toni, nene 22 mita. Ve tigharaat ataam eemoghon to tiloon tila. Artaal tiina ineep igharau ataam tonenen.

Ndiran to watoonrau

Yoova isavia uraat todi ngara, ve nonogiina todi paam ila to Mose. Yes moghon to ledi izadi pa tiloon tila mbeez patabuan to Maaron. Ve ival tiina, ghoru maau.

Tutuun pida

Yoova isavia mbeez patabuan mosi ila to Mose le isob, ghoru isavia tutuun pani ighaze yes nditamoot tisob to ndaman todi irau tamoot ee ve iza, yes irau tighol mulin taudi pa yaam sekel alulu.

Yaam tonowen, tighuri ila to yes to watoonrau, lesu tikisi pa uraat pida.

Tovenen Mose ineep toman Yoova izi lolooz Sinai daba, ve Yoova isavia ngar isob tonenen pani. Ghoru igham yaam babanadi ru to ye tau ingeret tutuun saangul ila, ve ighur di tila Mose nima.

32

Yes Israela tigharaat makau anunu inim maaron padi

¹ Mose ineep mala izi lolooz Sinai daba. Tovenen yes Israela tisanani le maau, ghoru tila tiluvut Aron, ve tisaav pani tighaze: “Aron, ugharaat leed maaron eta! Lesu imuun pait ve ingin ghiit. Pasa, ngeu to igham ghiit tapul taan to yes Isipa ve tanim, yei nikankaan pani. Mbeb eta avaat ivot pani wa.”

² Aron iloon saveen todi, ve isaav padi ighaze: “Poia. Yam ala angoog pandood to ndizwamim ve ndinatumim to tigharaat di pa gol, ve agham di tinim.”

³ Tovenen ival tiina tipas pandood todi tizi pa talinadi, ve tigham di tila to Aron.

⁴ Ghoru ye igham gol todi tonowen, ve igharaata inim makau anunu. Ival tiina tighita makau anunu tonowen, ve tisaav tighaze: “Ai yam Israela, aghita. Nene maaron toit to igham ghiit tapul Isip ve tanim.”

⁵ Aron ighita ngar todi tonowen, ve igharaat artaal eez ila mbeb tonowen nagho, ve isaav padi ighaze: “Bozo, pale talup ghiit pa sunuun, ve tapait Yoova!”

⁶ Mboŋ le ndugizau, ghoru ival tiina timundig, ve tiyou mbeb todi pida tila, leso tigham watoonrau pa maaron todi tonowen. Watoonrau pida, yab ighan suvun di. Ve tigham pida, leso yesŋa maaron todi tonowen tilup di tinim ee moghon. Ghoru mboledi izi ve tighanghan. Tighanghan ve tighunghun, ve mala maau tipamundigin narogho, ve mogheraan toman ngar samsamia naol tivot. *1Kor 10:7*

Maaron ate yabyab kat pa yes Israela

⁷⁻⁸ Tighamgham tovene, ve Yoova isaav pa Mose ighaze: “Ai, rikia moghon uzila! Pasa, tamtoghon tiom to ugham di tipul Isip ve yamŋa anim, ngar todi isami, ve tiwaghamgham. Ataam to avog iyaryaŋ padi naghaze titaghoni, nene tipuli wa. Ulooŋ. Tigharaat ledi makau anunu, ve tiput aghedi pani, ve tigham watoonrau pani. Ve ti-savsav tighaze: ‘Yam Israela, aghita. Maaron toit to igham ghiit tapul Isip ve tanim, tau tonene!’

⁹ Ndiran tonowen, you nawatag di wa. Matadi zoraan saveen kat.

¹⁰ Tovenen ateg yabyab padi kat, ve aazne naghaze napasob di tilaledi. Ve yom unŋalsekin ghou malep. Pasa, naghaze naghur yamŋa papaghu tiom agham inadi. You pale nagham gham amasa anim naol, ve izamim tintina.”

¹¹ Eemoghon Mose itoova pa irab Maaron toni Yoova ate. Ighaze: “Aa Yoova, pughu vena to atem yabyab kat pa tamtoghon tiom? Yom taum to upatoon tapirim ve ugham mbeb gharatoonadi tintina, tauto ugham di tipul Isip ve tinim.

¹² Ighaze uwaghamun di, nene pale yes Isipa tisaav tighaze: 'Laak, Maaron to yes Israela ighaze iwaghamun di ve ipasob di pa taan. Tauto itombaan di, ve igham di tipul ghiit ve tila ndug to bide lolooza, leso irab di tonowe.' Tovenen uwaghamun di malep. Onoon, atem yabyab kat. Eemoghon utatan atem, ve utoor ngar tiom. Ukaria tamtooghon tiom malep. Lolom imuul padi.

¹³ "Matam ingal mbesoonja tiom Abaram, Isak, ve Yakop. Muun, yom umbua saveen toman di, ve upariaanja le iyaryaan kat ughaze yom pale ugham papaghu todi timasa tinim naol tinimale pitum to sambam paronania. Ve ugham taan Kanaan isob inim ledi, leso tineep pani itaghoni taghoni gha ila." *Mbnp 12:7, 17:8, Mbnp 26:3+, 28:13*

¹⁴ Yoova ngar toni iyaryaan ighaze iwaghamun yes Israela. Eemoghon Mose isun ariana, tauto Yoova itatan ate, ve itoor ngar toni, ve irab tamtooghon toni maau. *Yona 3:10*

¹⁵⁻¹⁶ Ghoru Mose igham yaam babañadi ru to Maaron ingeret tutuun toni ila, ve imuul izila to yes Israela. Yaam ru tonowen, Maaron tau igharaat di, ve ingeret tutuun toni ila. Ve bodeen ineep ila digedi ru. Tutuun tonowen, nene pa ipariaan yes Israela, leso matadi kisin saveen to yesja Maaron timbua, ve titaghon ataam toni. *Igham 24:12*

¹⁷ Yosua to ulaanja to Mose, ye isasanani izi lolooz luvuna. Mose izila ivot toni, ve yesuru malmalidi tizila. Tigharau ndug to ival tiina tinepneep pani, ghoru Yosua iloon oroor tiina. Tovenen isaav pa Mose ighaze: "Wai, nowe avaat malmal eta?"

18 Eemoghon Mose isaav pani ighaze: “Maau. Oroor tonowen inimale pakuruuŋ to yes ndaaba to tilib pa malmal ne maau. Ve inimale tanjiz to ndaaba to koiadi tilib padi, nene paam maau. Mbouŋ to naloona we, tamtoghon avaat tinidi iza pa mbab eta.”

19 Mose ivot todi izi lolooz pughu, ve ighita di titortor luvutin makau anunu, le ate yabyab kat. Tovenen ipiyaav yaam babaŋadi ru to ikiskis di ne, tizila taan le berberia. *

20 Ghoro ila igham makau anunu tonenen, ve ipiyaava izala yab ighani, ve itututi ila le imbiriiis inim avab. Ghoro itiri izila ya, ve isaav ariana pa yes Israela ve tighuni.

21 Ghoro iyaan Aron ighaze: “Laak, ndiran tonene tigham vena payom, to ulooŋ di, ve uweu di ve tigham sosor tiina tonene?”

22 Aron ipamuul aliŋa ighaze: “Wai, tiina tiou, atem yabyab payou malep. Yom uwatag: Ndiran tonene, moghon moghon lolodi ipapazaagh di pa ŋgar samsamia naol.

23 Yes tisaav payou tighaze: ‘Ugharaat leed maaron eta lak! Leso imuunŋ pait ve iŋgin ghiit. Pasa, ŋgeu to igham ghiit tapul taan to yes Isipa ve tanim, yei nikankaan pani. Mbab eta avaat ivot pani wa.’

24 Yes tisaav payou tovene, tauto nasaav padi naghaze: ‘Poia. Sei to ighaze ipambood tau pa gol, ghoro iduduuma izi ve ighami inim.’ Tovenen yes

* **32:19:** Sawa to Mose ipiyaav yaam babaŋadi ru tizila taan le berberia, ene inim ghilaloŋ pa yes Israela ighaze lupuuŋ todi toman Maaron, yes tireua wa.

tila tiyou gol todi tinim tiou, ve nasuruuv di tizala yab, ve rikia moghon makau anunu ivot!”

²⁵ Mose ighita ighaze Aron ingin poian yes Israela maau, ve ipul di tiwaghamgham, tauto tigham ngar samsamia naol. Tovenen imatughez: Ighaze koiadi tinim ve tighita di, nene pale tiveleg di ve tinj padi.

²⁶ Tauto ila iyoon ila ataam avo, ve imboob ighaze: “Aloon! Sei to ighaze itaghon Yoova, ghoru inim tiou!” Tovenen yes to rumai Levi tisob tila tilup di ila Mose mata,

²⁷ ve Mose isaav padi ighaze: “Yoova to Maaron to iit Israela, aliņa ilat payam ighaze agham buza tiam, ve alaagh taghon ndug lolo, ve ambul yes to tiput aghedi pa maaron kaarom tonenen, le tisob timatmaat. Ighaze tonvetaz tiam, ma nditamim, ma yes to tineep tigharau gham, aghurghur di malep. Buza ighan di moghon.”

²⁸ Tovenen yes Levia titaghon Mose aliņa, ve sawa tonenen timbut nditamoot irau ndinndin tol (3000) pa buza ve timatmaat.

²⁹ Ghoru Mose isaav padi ighaze: “Yam rumai to Levi, aloon. Onoon, nene ipataņan pa yam arab ndinatumim ve tonvetaz tiam timatmaat. Eemoghon yam aghurghur di maau, ve ataghon katin Yoova aliņa. Tauto aazne, ye igham gham anim uraata toni, ve ighur poia toni iza tiam.”

³⁰ Mbon ndugizau, ghoru Mose isaav pa ival tiina ighaze: “Aloon! Sosor to yam aghami, nene tiina le tiina kat. Eemoghon you pale namuul nazala to Yoova, ve natoova pa nagharaat saveen tomani, ve naghita: Pale irau iloon ghou, ve ipul sosor tiam tonene, ma maau?”

³¹ Tovenen Mose imuul iza ila to Yoova, ve isaav pani ighaze: “O Yoova, ival tiina tonowen tigham sosor tiina kat payom. Pasa, tigharaat ledi maaron kaarom pa gol.

³² Eemoghon aazne, naghason ghom pa lolom isamin di ve upul sosor todi. Ighaze maau, ghorozag to umbooda ila rau tiom, umusi ighau paam.”
Mbo 69:28; Ro 9:3; Syg 3:5, 21:27

³³ Yoova ipamuul aliņa ighaze: “Vana maau. Tamtoghon to ighaze izoor ghou ve igham sosor payou, ye tonenen to pale namus iza ighau pa rau tiou.

³⁴ Tovenen umundig umuul uzila todi, ve ugham di ve yamņa ala pa ndug to muuņ nasavia payam. Anęla tiou pale imuuņ payam, ve yamņa ala. Eemoghon muri, you pale naghur atia padi pa sosor todi.”

³⁵ Tauto muri, Yoova igham moroghoonj samia ivot padi, ve iyat nęar todi to tizoorndug pa Aron tighaze igharaat ledi makau anunu inim maaron kaarom.

33

Maaron isaav ighaze ye irau ila toman yes Israela muul maau

¹ Ghorozag to Yoova isaav muul pa Mose ighaze: “Yamņa yes Israela to ugham di tipul Isip ve anim, amundig apul ndug tonene, ve alaagh muul ala pa taan Kanaan. Pasa muuņ, you nambua saveeņ toman Abaram, Isak, ve Yakop, ve napariaaņa le iyaryaanj kat naghaze you pale naghām taan tonowen pa papaghu todi. *Mbnp 12:7, 26:3, 28:13*

² You pale nambaan anjela tiou imuun payam, pa indiir taan tonowen tamtoghona tighau. Nene yes Kanaana, Amora, Hita, Peresa, Hivia, ve Yebusa.

³ Leso agham taan todi inim lemim, ve aneep pani. Taan tonowen ngoreenja tiina, ve mbef naol titub pooi pani. Eemoghon you taug irau itinja tala maau. Pasa, yam matamim zoraan saveen. Ighaze itinja tala, ve agham ngar samia ite paam izi ataam luvuna, nene pale apas ateg, ghoru napasob gham.”

⁴ Ival tiina tiloon saveen ariana tonene, le lolodi ipatanan kat ve titaan tiina. Titiik taudi muul maau. Tipul taudi tinimale timon.

⁵ Pasa, Yoova isaav pa Mose ighaze: “Usaav pa yes Israela tovene: ‘Yam matamim zoraan saveen. Irau itinja tala maau. Pasa, ighaze naneep toman gham pa sawa ris, ve apas ateg muul, nene pale napasob gham. Tovenen mbef tiam popoia naol to atiik taumim pani, aduduum di tisob tizi, ghoru matag ingal sa ngar to pale naghama payam.’ ”

⁶ Tovenen sawa to yes Israela tipul lolooz Sinai ve inim, yes titiik taudi pa mbef popoia muul maau.

Mbeez to tilup di toman Yoova

⁷ Sawa to yes Israela tilaghlaagh izi ndug balim, ve ighaze atedi izi ataam luvuna, ghoru Mose ipayoon mbef eez ineep sagan pa mbef pida. Mbef tonowen, tiwaata tighaze: ‘Mbef to lupun.’ Tamtoghon tisob to tighaze tighason Yoova pa mbef eta, tilala tonowe, ve tighurghur alinadi ila to Mose, lesa ana isavia ila to Yoova.

⁸⁻⁹ Sawa to naol, ighaze Mose ilaagh ila pa mbef tonowen, ival tiina tisob timundig, ve tiyon irau

mbeez todi todi naghodi, ve matadi itaghoni le ilooŋ ila mbeez lolo. Ghoru yaghur tae induur izi inim ve ipoon mbeez nagho, ve Mose yesuru Yoova tisavsaav.

¹⁰ Sawa to ival tiina tighita yaghur tae tonowen izi inim ipoon mbeez nagho, yes tiput aghedi, ve tisun irau mbeez todi todi.

¹¹ Ve Yoova yesuru Mose tiwaghiton di, ve tisavsaav tinimale tamtoghon ru to avodi imbesmbees. Tisavsaav le isob, ghoru Mose ivot, ve imuul ila pa Israela inadi to nepooŋ. Eemoghon Yosua to Nun natu ne, ipulpul mbeez tonenen maau. Inŋini irau sawa isob. Yosua, ye pain paghu ve inim ulaaŋa to Mose.

Mose ighason Maaron pa ipatooŋ tau pani

¹² Tinepneep le sawa eez, ghoru Mose isaav pa Yoova ighaze: “Laak, yom usaav payou ughaze naghelib ival tiina tonene ve yeiŋa nila pa taan Kanaan. Ve ughaze tinim imot inim tiou ve ugham ghou nanim itam ite kat. Eemoghon sei to ughaze umbaŋa inim toman ghou pa iuul ghou, nene yom upaghazoŋan ghou pani sone.

¹³ Ighaze onoon tinim imot inim tiou, ghoru upatooŋ ghou pa ataam toman ŋgar tiom. Leso nawatag katin ghom, ve laghoon tiou poia ila matam. Aa Yoova, matam inŋal ival tiina tonowen paam. Pasa, yes tamtoghon tiom. Yom taum usia di tinim lem.”

¹⁴ Yoova ipamuul aliŋa ighaze: “Ugham ŋgar naol malep. You taug pale natal toman ghom, lesu naghama ghom lolom poia ve atem izi.”

¹⁵ Mose ilooŋ saveeŋ tonene, ve isaav pani ighaze: “Nene poia pa unum toman ghei. Pasa,

ighaze taum unum toman ghei maau, yei irau nipul ndug tonene maau. Pale nineep moghon to sualen.

¹⁶ Pasa, ighaze unum toman ghei maau, nene pale sa mbeb igham tamtoghon tighilaal tighaze yom lolom payei, ve poia tiom inepneep toman ghei? Maau. Eemoghon ighaze unum toman ghei, nene pale tamtoghon tiwatag tighaze yom usia ghei ninim lem, ve yom taum upas ghei nivot sagan pa ndug tisob to taan.”

¹⁷ Tovenen Yoova isaav pa Mose ighaze: “Poia. Mbeb to yom ughason ghou pani, you pale naghami. Pasa, tinig imot ilat tiom, ve naghmaghom unum itag ite kat.”

¹⁸ Mose iloon saveej tonene, ve ighason Maaron muul ighaze: “Aa Yoova, ighaze venen, upatoon taum toman tapirim ve poia tiom payou, ve naghita katin ghom!” *Yo 1:14,18; Kol 1:15; Hib 1:3*

¹⁹ Yoova ipamuul aliya ighaze: “You pale napaatoon suvun poia tiou payom, ve navotia izag Yoova toman gabuag ila matam. Ighaze lolog poia pa tamtoghon eta ve naghaze naghmaghom poiani, nene pale naghmaghom poiani. Ve ighaze lolog isamin tamtoghon eta ve lolog pa nauuli, nene pale nauuli. *Ro 9:15*

²⁰ Eemoghon yom irau ughita naghmaghom maau. Pasa, ighaze tamtoghon eta ighita katin ghou, ye irau inep maau. Pale imaat. *Mbnp 32:31*

²¹ Ughita ndug to inep digeg ne. Unum uyoon izala yaam pogho tonene.

²² Sawa to nanim ve naghaze napaatoon taug toman tapirig ve poia tiou payom, nene pale naghmaghom uloon ula yaam saambu tonene, ve

nagoon ghom pa nimag, le irau nasalib payom ve nala.

²³ Ghoru nimag ighau, ve ughita ndimog. Eemoghon naghog, tamtoghon eta irau ighita maau.”

34

Yoova ipatoon poia toni pa Mose

¹ Ghoru Yoova isaav pa Mose muul ighaze: “Ugharaat yaam babañadi ru, le raratedi tinimale papazogi you naghham payom ve upiyaav di tizi berberia. Leso nanjeret saveen ila raraate inimale muun nanjereti. *Igham 24:12, 32:19*

² Ugharaat di pataghaan, lesu bozo mbonmaagh, ugham di, ve uza unum tiou sualen izi lolooz daba.

³ Tamtoghon ite paam inim toman ghom malep. Ve lolog pa naghita tamtoghon eta ilaagh taghon lolooz dige maau. Ve ngai tovene paam. Tilaagh tigharau lolooz pughu malep.”

⁴ Yoova isavsaav le isob, ghoru Mose ila igharaat yaam babañadi ru, le raratedi tinimale papazogi Yoova igham pani. Mbon ndugizau, ndoromaanja kat, ve Mose imundig, igham yaam ru tonowen, ve inau izala pa lolooz Sinai daba itaghon Yoova aliña.

⁵ Ghoru Yoova ineep ila yaghur tae lolo, ve izi inim iyoon igharau Mose, ve ivotia tau iza ve gabua.

⁶⁻⁷ Ye ilaagh imbut Mose nagho, ve isaav ighaze: “You Yoova. Izag tau tonene: Yoova.

You Maaron to lolog isasamin mbesoonja tiou, ve naghhamgham poian di.

Ateg yabyab rikia maau.

Poia tiou, nene tiina kat. Lolog ineep tunjia ila to tamtoghon tiou ve nauluul di, ve nataghon saveen mbuaan tiou irau sawa isob.

Ngar to lolog ineep tunjia ila to tamtoghon tiou ve nauluul di, nene napatoonja pa tamtoghon ndinndin ndinndin.

Ve ngar todi to zoraan saveen, toman ngar todi pida to iyel pa ataam tiou, sosor todi naol tonowen, moghon moghon you nareureu di.

Eemoghon yes to ledi sosor, you naghurghur di maau.

Naghurghur atia pa yes taudi, toman ndinatudi, nditimbudi, ve saas todi.”

Igham 20:5+, 33:19

⁸ Mose iloon saveen tonene, le rikia moghon iput aghe, nagho izila pa taan, ve isun.

⁹ Ighaze: “Aa Yoova, ighaze lolom poia payou, ve ughaze ugham poian ghou, unum toman ghei ve itina tala. Onoon, ival tiina tonowen, dabadi ariana, ve tilonloon saveen maau. Eemoghon lolom isamin ghei, ve ureu sosor tiei. Ngar tiei naol to tiyel pa tutuun tiom, ureu di tilaledi. Ve ugham ghei ninim lem kat.”

Maaron yesja yes Israela timbua saveen muul

¹⁰ Mose isavsaav le isob, ghoru Yoova isaav pani ighaze: “Aazne, you naghaze nambua saveen toman yam Israela, leso itina talup ghiit tanim ee moghon muul. You pale naghham mbbeb gharaatoonadi tintina ila tamtoghon tiom tisob matadi. Uraat to naghaze naghham di, nene pale ite kat. Muun ve inim, ndug tisob to tineep irau taan isob,

tighita mbeb eta tovene pa eta sone. Tovenen ndug ndug to tineep tigharau ne, ighaze tighita di, nene pale matughezaan tiina igham di.

¹¹ Tutuun to aazne naghuri payam, yam asob matamim kisini, ve ataghoni kat. Leso namuun payam, ve nandiir yes Amora, Kanaana, Hita, Peresa, Hivia, ve Yebusa to tineep izi taan Kanaan, tisob taghau tila.

¹² Eemoghon matamim imosmoos pa taumim. Yamna taan tonowen tamtoghona ambua saveen pa alup gham malep. Aneep saguan padi. Pasa, ighaze yamna alup gham, nene pale tinim liis payam, ve tiweu gham ve agham ngar samia. *Igham 23:32; 1Kor 5:11*

¹³ “Tovenen alup gham toman di malep. Ve mbeb todi naol to sunjuun, areu mbirisan di. Artaal todi, toman yaam todi patabuana to tipayoon di tigharau inadi to sunjuun, yam arab babalagin di. Ve ai to tilup di ila sambadi ve tipait maaron liva todi Asera, nakavas ighan suvun di tizi.

¹⁴ Yam ambees pa maaron ite paam malep. Pasa, you Yoova to Maaron tiam. Matag pariuun, ve naghaze yam ambees pa you moghon. Tauto tiwatwaat izag tighaze ‘Ye to mata pariuun.’

¹⁵ “Tovenen ambua saveen toman taan tonowen tamtoghona pa alup gham malep. Pasa, ighaze yes tigham watoonrau pa maaron kaaromna todi, ve tilup di ve tighanghan, ve tipoi gham pa ala toman di, nene pale yamna aghan aniin to watoonrau todi tonowen. Ve ighaze agham tovene, yam anim maaron kaaromna todi tonowen ledi, ve apul murimim payou. *1Kor 10:20*

¹⁶ Ndinatumim tovene paam. Tivai ndiran tonowen ndinatudi liva malep. Pasa, ighaze ndiliva tonowen timbees pa maaron kaaromņa todi, nene pale tiweu ndinatumim tila timbees pa maaron kaaromņa tonowen, ve tighur muridi payou.

¹⁷ “Agham ain, gol, ma silva, ve agharaat mbeb eta inim maaron payam ve apaiti malep. *Igham 20:4,23*

¹⁸ Ve matamim ingal lupuuņ tiina to ghaniin mberet to le yis maau ne. Yam apul Isip pa kaiyo Abib. Tovenen ndaman isob, ighaze kaiyo tone-nen ivot, yam alup gham pa ghaniin mberet to le yis maau ne irau mboņ liim ve ru itaghon alinag. *Igham 12:17*

¹⁹ “Ndinatumim nditamoot to aidaba, toman ngai tiam ndinatudi to tipoop di muuņ, nene tisob tinim leg moghon. Tovenen ngai tiam ndinatudi nditamoot to tipoop di muuņ, arab di tisob timat-maat tinim watoonrau payou. *Igham 13:2*

²⁰ Eemoghon esele ndinatudi to tipoop di muuņ, arab di tinim watoonrau payou malep. Arabolin di pa sipsip, ve arab di tinim watoonrau payou. Leso agham mulin esele tiam. Ve ighaze arabolin di maau, ghoru arab polin luadi timaat. Ve ndinatumim aidaba tovene paam. Arabolin di pa sipsip, lesu agham mulin di.

“Tamtoghon to ighaze isuņ payou ne, nima nginiņa ve inim ivot naghog malep. *Igham 22:29, 23:15*

²¹ “Ndag inim eez, ila imuul ndag inim liim ve eez, yam irau agham lemim uraat. Eemoghon

ndag inim liim ve ru, agham uraat malep. Atemim izi. Sawa to vazogiin ve taitain paam, yam irau matamim ingal sawa tonenen ve atemim izi. *Igham 20:8+, 23:12*

²² “Ndaman isob, sawa to Pasova ighaze isob, ve wik liim ve ru inim ila ve aniin wit mata ivot, ghoru yam asob alup gham pa sunuun. Ve ighaze ndaman igharau ighaze isob, ve sawa to taitain ivot, yam asob alup gham pa sunuun muul.

²³ You Yoova to Tiina to yam Israela. Tovenen ndaman isob, ighaze sawa tintina tol tonene tivot, ghoru nditamoot tiam tisob tinim tilup di ila naghog, ve tisuun payou. *Igham 23:14*

²⁴ “You pale namuun payam ve nandiir tamtoghon tisob tighau pa taan to naghaze naghham payam, leso inim lemim. Ve you pale naseen taan tiam ila inim tiina. Ighaze sawa tintina tol tonene tivot, ve yam asob apul ndug tiam tiam, ve anim alup gham ila naghog pa sunuun, agham ngar naol pa taan tiam malep. Pasa, tamtoghon eta irau lolo ipazaagha pa ighami sorok ne maau.

²⁵ “Sin to watoonrau to yam aghaze agham payou, alupi toman mberet to yis ineep ila ne malep. Ve sawa to alup gham pa ghanghaniin to Pasova, ve arab mbeb pida tinim watoonrau, apul alulu ineep le ndugizau malep. Ighaze alulu ineep, aghuri ila yab ighan suvuni le isob, ghoru ndugizau. *Igham 12:10*

²⁶ “Aniin mata to tivot ila taan tiam, yam avureer popoia moghon, ve agham di tinim rumai to Maaron tiam Yoova. *Igham 23:19.*

“Ighaze anaz mekmek natu eta, yam anazi toman tuz to tina malep.” *Igham 23:19*

Yaam papaghu ru to tutuunj ineep ila

²⁷ Yoova isaav muul pa Mose ighaze: “Saveenj tiou isob tonene, taum umbood di. Pasa saveenj to itinja tambua pa talup ghiit tanim ee moghon, nene iyoon izala saveenj tonene.”

²⁸ Mose ineep toman Yoova izi lolooz daba irau mboj tamoot ru (40). Sawa tonenen, ye ineep sorok. Ighan aniinj eta maau, ve ighun ya maau. Ve injeret tutuunj saangul ila yaam babañadi ru. Tutuunj tonowen isavia ataam to titaghoni, leso lupuunj todi toman Maaron ineep ariana. *Igham 24:18; Mt 4:2*

Mose nagho isul

²⁹ Mose igham yaam babañadi ru to tutuunj saangul ineep ila, ve imuul izila. Yaam ru tonowen, nene pa ipalot yes Israela, leso matadi kisin saveenj mbuaanj todi toman Yoova ve titaghoni kat. Sawa to Mose ipul lolooz Sinai daba ve izila, nagho isul kat. Eemoghon ye tau iwatagi maau. Nagho isul pasa, yesuru Yoova tilup di ve tisavsaav.

³⁰ Mose ila ivot to yes Israela, ve Aron toman ival tiina tighita nagho isul. Tovenen timatughez pani, le tila tigharai maau. *2Kor 3:7*

³¹ Eemoghon ye ipoi di ighaze tinim, tauto Aron igham yes daba to Israel, ve yesña tila to Mose. Ghoru Mose isavsaav toman di.

³² Le isob, ghoru ival tiina anadi tinim tigharai, ve ye ipaesia saveenj isob to Yoova isavia pani izi lolooz Sinai daba, ve avo iyaryaanj padi leso titaghon katin saveenj tonenen.

³³ Isavsaav padi le isob, ghoru ipoon nagho pa uli.
2Kor 3:13

³⁴ Eemoghon sawa isob to ye ighaze iloon ila mbeez to Yoova, ghoru igham uli tonowen ighau pa nagho, ve yesuru Yoova tisavsaav. Tisavsaav le isob, ghoru ivot ila pumuri, ve ipaesia saveen to Yoova isavia pani ne pa yes Israela ve tiloonja.

³⁵ Sawa to ye ivot ila pumuri, yes Israela tighita nagho isul. Tauto Mose iponpoon nagho, ve inepneep le sawa to ighaze imuul iloon ila mbeez, ghoru igham uli tonowen ighau pa nagho, ve yesuru Yoova tisavsaav.

Mbeez patabuan to Yoova ighaze yes Israela tigharaata leso inim ina to nepoon, ye tau isavia ngara pa Mose pataghaan wa. Ve Yoova ighur tamtoghon ru, izadi Besalel ve Oliap, timuun pa uraat to mbeez tonowen. Ve igham Avuvu izeev yesuru, ve igham ledi ngar, leso tigham poian uraat tonowen. Tovenen yesuru timuun pa uraat, ve yes Israela timaliim pa mbeez tonowen.

40

Yes Israela tipayoon mbeez patabuan to Maaron

¹ Ghoru Yoova isaav pa Mose ighaze:

² “Ndaman to naghood, kaiyo to ivot muun, ve ndag inim mata, ghoru upayoon mbeez patabuan. Leso inim inag to nepoon, ve itinja taluplup ghiit tonowe pa savsaveen. Ugham tovene:

³ Bokis to Saveen Mbuaan to tutuun tiou ineep ila lolo, ughuri imuun iloon ila mbeez suruvu to mungaan we. Tutuun tonenen isavia ataam to ataghoni leso lupuun toit ineep tunja. Ghoru undaad uli tiina ila mbeez lolo, leso ipoon bokis

tonowen. Mbeez suruvu tiina to ineep potla, nene patabuan. Ve suruvu kainanen to bokis tonenen ineep pani, nene patabuan le patabuan kat.

⁴“Undaad uli le isob, ghero ughur tonj to mberet patabuan iloonj ila mbeez suruvu tiina to ineep potla, ve ughur mberet patabuan izala.

“Le isob, ghero upayoon lam aia iloonj ila, ve ughur lam liim ve ru tila inadi.

⁵“Ghero ugham artaal gol kainanen to tunuun mbep to vuzidi popoia, ve ughuri iloonj ila mbeez suruvu tiina. Ve utoora le nagho inarua Bokis to Saveen Mbuaan. Uyou mburuguun to mbeez lolo tiloonj tila le isob, ghero undaad uli tiina ite ipoon mbeez nagho.

⁶“Ghero ughur artaal tiina to watoonrau ineep sagan ris pa mbeez nagho,

⁷ve ughur oon tiina to ririwaan ineep bodbo-daan pa mbeez nagho ve artaal tiina, ve ulinj ya ila lolo.

⁸Ghero undaad uli mamala iluvut mbeez, ve undaad uli ariana ila sirsiir avo inim ataam pani.

⁹“Upasob uraat naol tonenen le isob, ghero ugham ngoreen, ve ulinj izala mbeez toman mburuguun to tineep ila lolo, leso ughur di tinim leg. Mbep naol tonanan, patabuan.

¹⁰⁻¹¹Le isob, ghero ulinj ngoreen izala artaal tiina to watoonrau, toman mburuguun to artaal, ve oon to ririwaan, toman tonj to oon tonanan ineep izala pogho ne paam. Leso ughur di tinim leg. Artaal tonanan, patabuan le patabuan kat.

¹²“Upasob uraat naol tonenen le isob, ghero ugham Aron toman ndinatu nditamoot tila tigha-

rau ataam avo to mbeez patabuan, ve urughuuz di.

¹³ Urughuuz di le isob, ghoru undud Aron pa nonogiija toni patabuan to uraat, ve ulinj ngoreen izala daba pa ughuri inim leg. Leso inim ngeu to watoonrau ve imbees payou.

¹⁴ Ghoru ugham ndinatu anadi tinim, ve undud di pa nonogiija todi to uraat paam.

¹⁵ Ve ulinj ngoreen izala dabadi inimale ugham pa tamandi. Leso tinim ndiran to watoonrau ve timbees payou. Yesja papaghu todi to muri pale tivot, pale tikis uraat tonene, itaghoni taghoni gha ila.”

¹⁶ Yoova isavsaav le isob, ghoru Mose ipamundi-gin uraat. Ye igham mbeb tisob tonowen uraata itaghon saveen to Yoova isavia pani.

¹⁷ Tovenen sawa to yes Israela tivoool pa ndaman paghu, kaiyo to ivot pa ndaman tonenen muun, ve ndag inim mata, ghoru tipayoon mbeez patabuan to Yoova. *

¹⁸⁻¹⁹ Tighur mbeb pa pos tiyoon izala, ghoru ti-payoon pos tizala poghodi. Ve tizeev ngaltereniinj itaghon saambu to tikir di pataghaan ila pos ne, lesu ikis pos tiyoon tunja. Ve tipayoon gungun mamala paan ila pa mbeez nagho, ve tiraav uli tintina pida izala mbeez pogho, itaghon Yoova aliija to isavia ila to Mose.

²⁰ Ghoru Mose igham yaam ru to tutuun to Yoova ineep ila, ve ighur di tila Bokis to Saveen

* **40:17:** Yes Israela tipul Isip, ve tilaagh tila le kaiyo inim tol pani, ghoru tivot izi lolooz Sinai. Tineep tonowe irau kaiyo liim ve paan, ghoru tivoool pa ndaman paghu. Sawa kat to ndaman paghu tonenen imundig, yes tipayoon mbeez patabuan.

Mbuaan lolo. Yaam ru tonowen, nene pa ipalot yes Israela, lesu matadi kisin saveen mbuaan todi toman Yoova ve titaghoni. Ve Mose izeev sig ru itaghton inadi to ineep Bokis To Saveen Mbuaan dige, lesu timbaada. Ve ipakud bokis avo. Bokis avo tonowen, tiwaata tighaze 'Ndug To Rewaan Sosor.'

Hib 9:4

²¹ Ghoru Mose ighur Bokis to Saveen Mbuaan iloon ila mbeez lolo, ve indaad uli tiina eez ve ipoona itaghton Yoova aliņa.

²²⁻²³ Le isob, ghoru ighur ton to mberet patabuan iloon ila mbeez suruvu tiina to ineep potla. Ineep dige ila pa kagu. Ve ighur mberet patabuan izala, lesu ineep ila Yoova nagho, itaghton Yoova aliņa to isavia pani.

²⁴ Ghoru igham lam aia iloon ila mbeez suruvu tiina, ve ipayoonda ila dige to ila pa daudau, ve itoora le nagho inarua ton to mberet patabuan.

²⁵ Ve ighur lam liim ve ru izala, lesu tisul ila Yoova nagho, itaghton Yoova aliņa to isavia pani.

²⁶ Ghoru ighur artaal gol kainanjen to tunuun mbeb to vuzi popoia ne ila igharau uli tiina to irab motin mbeez lolo.

²⁷ Ve itun mbeb to vuzi popoia izala, itaghton Yoova aliņa to isavia pani.

²⁸ Mose igharaat mbeez toman mbeb tisob to tineep ila lolo ne le isob, ghoru indaad uli tiina ila ipoon ataam avo, ve igham uraat to pumuri.

²⁹ Ighur artaal igharau sirsiir to mbeez patabuan ataama, ve igham watoonrau pida itaghton Yoova aliņa to isavia pani. Ye ighur ngai toman wit pida tizala artaal, ve yab ighan suvun di tinim watoonrau.

³⁰⁻³² Le isob, ghero ighur oon tiina ineep bod-bodaan pa mbeez nagho ve artaal tiina, ve ilin ya ila lolo. Leso sawa to ye tau, ma Aron, ma Aron ndinatu tiloon tila mbeez lolo, ma tigharau artaal, ghero timen nimadi ve aghedi pa ya tonowen.

³³ Igham uraat tonenen le isob, ghero indaad uli mamala tiluvut mbeez toman artaal tiina tinim sirsiir pani, ve indaad uli ariana eez inim sirsiir ataama.

Tovenen uraat naol to Yoova isavia di, Mose igham di le tisob.

Yoova ipatoon nguruba pa yes Israela

³⁴⁻³⁵ Ghero yaghur tae to Yoova ineep ila, izi inim le itatab mbeez patabuan, ve Yoova nguruba isul toman tapiri tiina irau mbeez lolo. Tovenen Mose irau iloon ila maau. *Yo 1:14; Syg 15:8*

³⁶⁻³⁷ Sawa to yes Israela tilaghlaagh izi ndug balim, matadi ilala pa yaghur tae tonowen. Ighaze ipul mbeez patabuan pogho ve induur ila, nene yes paam timundig, tiyouyou, ve tilaagh titaghoni. Ve ighaze ineep tunja izala mbeez pogho, nene irau tilaagh maau. Tineep ve tisanan le tighita yaghur tae induur muul, ghero timundig tilaagh.

³⁸ Tovenen sawa to yes Israela tilaghlaagh izi ndug balim, matadi ilala pa yaghur tae tonowen ve titaghoni. Ighaze ndag, ghero tisob tighita yaghur tae to Yoova ineep ila, inepneep izala mbeez patabuan pogho. Ve ighaze mbon, ghero tighita yaghur tae tonowen isul inimale yab iyaryaar. *Igham 13:21; 1Kor 10:1*

Maaron Saveen Toni Patabuan
The New Testament and portions of the Old Testament
in the Oov Dialect of the Saveeng language of Papua
New Guinea. The Saveeng language is also called Mutu
or Mutu-Tuam.

Sampela hap Buk Baibel long tokples Saveeng Oov
long Niugini

copyright © 2011 Wycliffe Bible Translators, Inc.

Language: Saveeng (Mutu)

Dialect: Oov

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

PDF generated using Haiola and XeLaTeX on 18 Apr 2025 from source files dated 31 Aug 2023

c7a45d99-91a2-564f-9c55-d2efc8be7fae